



續名醫類案卷十五

錢塘魏之琇編集

海昌王士雄孟英  
定州楊照藜素園 同校

# 汗

竇材治一人額上時時汗出乃腎氣虛也陽明熱則額上出

汗常人多有此症未可卽斷爲腎虛也凡病虛實無不對

待未可執一不治則成癆瘵先灸臍下百壯服金液丹而愈

一人夜多虛汗亦腎氣虛也服全真丹黃芪建中湯而愈

一人每日四五遍出汗灸關元穴亦不止乃房事後飲冷傷

脾氣復炙右命門百壯而愈。

常東軒挺晚苦陰汗有教之用牡蠣粉撲之者始雖少減久之至潰腐見其罌丸焉豈非殺之以藥乎

志雅堂  
襍抄

琇按陰汗必由下部濕熱而成以牡蠣收瀼之故鬱瘀而潰爛也。

宋懷州知州李治與一武臣同官怪其年七十而輕健面如渥丹能飲食叩其術則服首烏丸也乃傳其方後治得病盛暑中半體無汗已二年竊自憂之造丸服至年餘汗遂澁體其治血治風之功大有補益方用赤白何首烏各半斤米泔浸三夜竹刀刮去皮切焙石白搗爲末煉蜜丸梧

子大每空心温酒下五十九丸亦可未服

本草綱目

滑伯仁治一人暑月病身冷自汗口乾煩躁坐臥欲干坭水

中脈浮而數按之豁然空散曰脈至而從按之不鼓諸陽

皆然此為陰甚格陽得之飲食生冷坐臥當風所致以真

武湯附朮茯苓冷飲一進汗止再進躁去三飲而安

琇按江案暑門滑治一人汗出如雨身熱煩躁醫悞用

朮附乃以黃連人參白虎三進愈之宜參看

薛立齋治一婦盜汗不止遂致廢寢神思疲甚口乾引飲作

血虛有熱用當歸補血湯代茶炙芪一兩當歸三錢又以

六黃湯加人參五味子二劑而愈

陳三農治一人感寒用麻黃發汗汗遂不止用建中湯汗出

愈多痰喘有聲此傷寒損血兼用藥之過陰虛而陽無所

附遂用川芎三分白芍生地各二錢當歸一錢雄按芎歸尚有可議

元胡索香附各三分再服而愈四物是矣加香附元胡是所不解

一少年人汗出三年不愈用棉子炒黑入湯一滾服四五日

脚腿能立後以歸脾補中等湯而安

楊乘六治朱氏子年二十外勞倦發熱上半身自汗如雨三

晝夜不止一切歛汗方法無效脈之浮細沉洪軟弱無力

而白無神舌胖而軟且白滑意此必肺氣大虛而腠理不

固也以黃芪湯加五味附子各二錢自子至卯連進三劑

其汗如故。思之良久。乃用蜜炙黃芪二兩。人參五錢。白朮

一兩。蜜炙升麻。柴胡。陳皮各一錢。上半身有汗。下半身無

汗。明是陽氣不能內歛。琇按柴胡升麻究竟無謂歸身炙草炒黑乾姜

各二錢。白芍五味附子各三錢。大棗五枚。一劑而歛。此症

本以勞力傷其脾肺中藏之陽。陷而不升。衛外之陽虛而

不固。以致陰氣不肯下降。乘虛外溢。故特用升麻以升提

下陷之氣。用黑姜以收固衛外之陽。使在外而為陰之衛。

在內而為陽之守。後用清金滋水等劑而愈。

薛立齋治一婦人。盜汗自汗。遍身痠疼。五心發熱。夜間益甚。

或咳嗽咽乾。月經兩三月一至。用加味道遙散六味地黃

九兼服臨臥又服陳朮丸

陳皮白朮

三月餘諸症悉愈其經乃

兩月一至又服兩月而痊

一婦人患前症食少倦怠肌肉消瘦日晡發熱至夜益甚月

水過期漸至不通

猶奪汗者無血也

時發渴燥

汗多而津液涸

誤用通經

之劑熱倦愈重飲食愈少乃用八珍加升麻丹皮山梔柴

胡治之熱漸退又用八珍丹皮軟柴胡調理而愈

羅謙父曰齊大兄因感寒邪頭項強身體痛自用酒服靈砂

丹四五粒遂大汗出汗後身輕至夜前病復發以前藥復

汗其病不愈復以通聖散發汗病添身體沉重足脛冷而

惡寒是日方命醫醫者不究前治又以五積散汗之翌日

身重如石不能反側。足脢如冰冷。及腰背頭汗如貫珠。出而不流。心胸躁熱。煩亂不安。喜飲西瓜梨柿冰水之物。常置左右。病至於此。命診之。六脈如蛛絲。微微欲絕。乃以死決之。主家曰。得汗多矣。焉能爲害。曰。夫寒邪中人者。陽氣不足之所致也。而感之有輕重。治之豈可失其宜哉。仲景云。陰盛陽虛。汗之則愈。汗者助陽退陰之意也。且寒邪不能自汗。必待陽氣泄。乃能出也。今以時月論之。大法夏月宜汗。然亦以太過爲戒。况冬三月閉藏之時。無擾乎陽。無泄皮膚。使氣亟奪。爲養藏之道也。逆之則少陰不藏。此冬氣之應也。凡有觸冒。宜微汗之。以平爲期。邪退乃已。急當



衣煖衣。居密室。服實表。補衛氣之劑。雖有寒邪。勿能爲害。此從權之治也。今非其時。而發其汗。乃謂之逆。仲景有云。一逆尙引日。再逆促命期。今本傷而并汗。汗而復傷。傷而復汗。汗出數四。使氣亟奪。衛氣無守。陽泄于外。陰乘于內。故經云。獨陽不生。獨陰不長。不死何待。雖盧扁不能治。活也是日。至夜將半。項強。身體不仁。手足搐急。爪甲青而死。今矣。金匱要畧云。不當汗而妄汗之。奪其津液。枯槁而死。今當汗之症。一過中。亦絕其命。况不當汗而強汗者乎。

華陀傳。縣吏尹世。苦四肢煩。口中乾。不欲聞人聲。小便不利。

陀曰。試作熱食。得汗則愈。不汗後三日死。卽作熱食而不

汗出陀曰藏氣已絕于內當啼泣而絕果如陀言

此亦藏氣傷燥

之病

三國志

馬元儀治沈康生夫人病經一月兩脈浮虛自汗惡風此衛虛而陽弱也與黃芪建中湯一劑汗遂止夫人身之表衛氣主之凡所以溫分肉實腠理司開闔者皆此衛氣之用故內經曰陽者衛外而為固也今衛氣一虛則分肉不溫腠理不密周身毛竅有開無闔由是風之外入汗之內出其孰從而拒之故用黃芪建中湯以建立中氣而溫衛實表也越一日病者又手自冒心間脈之虛濡特甚此汗出過多而心陽受傷也仲景云發汗過多病人又手自冒心

心下悸者。桂枝甘草湯主之。與一劑良已。

丁庠生頭汗火升食少。心悸恍惚不甯。或議用滋陰脈之兩寸獨鼓。兩關尺虛微少神。此脾腎交虧。真陽欲脫之候也。與人參桂附理中湯。大培火土。以復虛陽。彼以生平不任熱劑為辭。曰若謂頭汗火升。為火邪上熾耶。不知此乃真氣上越也。且謂心悸恍惚為陰氣內虧耶。不知此乃真元無主也。遂與人參四錢。白朮五錢。附子玉桂各三錢。乾姜二錢。炙草一錢。連進四劑。脈始和。症始退。再溫養元氣一月而安。

○羅謙甫治刑部侍郎王立甫之壻。年二十五。仲冬因勞役憂

漢論遠淑

思煩惱飲食失節而病時發躁熱肢體困倦盜汗濕透其  
衾不思飲食氣不足以息面色青黃不澤診其脈浮數而  
短澇兩寸極小曰此危症也治雖粗安春至必死當令親  
家知之夫人不以爲然遂易醫至正月躁熱而卒他日王  
謂羅曰吾壻果如君言願聞其理曰此非難知也內經曰  
主勝逆客勝從天之道也蓋時令爲客人身爲主冬三月  
人皆懼寒獨渠躁熱盜汗是令不固其陽時不勝其熱天  
地時令尙不能制藥何能爲冬乃閉藏之月陽氣當伏于  
九泉之下至春發爲雷動爲風鼓折萬物此奉生之道也  
如冬藏不固春生不茂爲疫癘之災且人身陽氣亦當潛

伏于內不敢妄擾。無泄皮膚。使氣亟奪。此冬藏之應也。令  
壅汗出于閉藏之月。腎水已涸。至春何以生木。陽氣內絕。  
無所滋榮。不死何待。乃嘆息而去。

施笠澤治一人。服參芪數日後。每將昏反發熱。至夜得盜汗。  
而解曰。此陰虛不能勝其陽也。參芪雖能補陽助陰。而陰  
血未易驟生。乃用六味丸料。加參歸陳皮。一劑而熱退汗  
止。後以六味丸參苓白朮散全愈。

庠友張君牙患寒熱。咸作瘧治。服解表之劑。乃盜汗潮熱。肢  
節頸項強痛。夜臥則汗出如沐。濕透重衾。二旬餘。目不交  
睫。診得左寸微細欲絕。右尺浮大無力。此汗多亡陽症也。

與加味歸脾湯不效。自加麥冬。更服二劑。胸膈滿悶。飲食不進。遂疑參朮不可服。一僧欲進大劑苦參湯。施曰診法陰盛陽衰者。不可以柔藥。柔藥助陰。陽氣衰弱。陰氣益著。實實虛虛之禍。其能免乎。今君相二火俱虧。非急進歸脾湯。加桂心五味不可。豈前藥有陳腐或炮製失宜耶。今取藥一劑。是夜即安。汗亦漸止。間進八味丸。一月而愈。

庠生施爾祁病脈之曰。陰虛火動也。病使人發熱盜汗。肢節作楚。正合丹溪滋陰降火之劑。服三日後。服虎潛丸。病全愈。所以知爾祁之病者。切其脈虛而數。經云。血虛脈虛。腎水之真陰不足。而虛火妄動也。先是一醫謂是歷節風。飲

以風劑。卽肢節浮腫。痿弱不能行。汗出如淋。經云足受血而能步。又云奪血者無汗。奪汗者無血。蓋風能生火。又能耗血。血虛則內熱益甚。肢熱則腫。肺熱則痿矣。

錢國賓治荊州李山人。年四十餘。凡飲食頭上汗多。氣如烟霧。必頻抹乃止。寸關浮洪。兩尺沉實。胃脈倍盛。而數此胃熱蒸籠頭也。飲食人胃。遇熱上薰心肺。心主汗液。火性上騰。肺主皮毛。腠理不密。故頭汗出。若蒸籠之氣。因煎迫而如烟霧也。以三黃石羔湯。數劑清胃熱愈。

文田按此脈真合用白虎湯矣

魏玉橫曰。詹渭豐母。年六旬外。素有肝病。因患瘧。自五月至

九月瘧愈。而他症蜂起。自汗如洗。徹夜不眠。食少便溏。脇

痛齒痛口淡惡心惡風畏寒頭頂皮帽身襲皮衣重幃夾  
幔猶慄慄不勝診時以止汗爲嚆脈之弦小急知爲陰虛  
火盛瘧邪未清誤作陽虛多與補氣歛汗之劑而然叩之  
果服歸脾五味子麻黃節浮麥龍骨甚夥乃與生地杞子  
地骨釵斛首烏鱉甲黃連萸仁渭豐曰諸醫咸謂頭爲諸  
陽之首惡寒若此又自汗而喜熱飲明屬陽虛今方中唯  
與養陰又口淡便澹惡心皆屬脾胃虛寒黃連萸仁安可  
用至瘧疾已愈何必用首烏鱉甲再所重在汗多而又全  
不治汗其故何也曰此症乃火鬱之極內真熱而外假寒  
也瘧本胆腑之邪因肝虛而腑傳臟故寒熱止而變爲諸



症故以生地。地骨。欒。斛。養肝治其本。黃連。清伏暑。蔓  
仁。散鬱熱。以治標。首烏。鱉甲。入肝而去瘧邪。蓋肝火熾盛  
逆胃。胃絡上蒸。則爲汗。下迫。則爲瀉。若見汗。則收斂。見瀉  
則固。嚮一藥肆人足矣。醫云乎哉。如方服之。數劑而愈。

濟生歸脾湯。人參。龍眼。黃耆。甘草。白朮。茯苓。木香。當歸。棗  
仁。遠志。

何某年七旬矣。偶于冬間苦盜汗。乃水衰肝火內熾。當閉藏  
之候。反蒸鬱而爲汗也。或教以黃芪。煮黑棗。服之。四五日  
汗果止。而咳嗽作。或以爲傷風。與前胡。桔梗。杏仁。蘇子。秦  
芫。防風之類。或以爲痰火。與二陳。姜汁。竹瀝。或以爲血虛。

與四物知母黃柏咸不效。已半年診其脈則弦數而促。其症則痰多食少。天柱已傾。雙足浮腫。投以生地麥冬杞子地骨沙參女貞。四劑無進退。已召畫工傳真矣。告曰某本籍越中。今病已膏肓。量不可起。治任欲歸。第乞疏一方。俾可服多劑者。以希萬一耳。仍前方加熟地婁仁與之。後二年偶遇之。客坐彼前致謝甚殷。余茫然叩其故。曰某何姓。昔患咳嗽幾斃。蒙惠方。渡江後服二十餘劑。竟獲全愈。此再造之德也。視其容貌充腴。迥非疇曩。其病之痊殊意外矣。書此以爲輕信單方。并見汗治汗之戒。

以此條與羅謙甫治王立甫壻

之案叅看可見閉藏之令過汗雖屬危症亦非斷無生機羅公於此有遺憾矣

楊元植年四旬外，早衰鬚髮盡白，素患肝腎病。客吳門，病瘧，瘧愈而汗出不止。凡生脈飲六黃湯、牡蠣龍骨、五味、黑豆，一切歛汗之藥，莫不嘗之矣。吳醫技窮，乃遄歸。就予診脈，但虛數，與熟地一兩、杞子五錢、棗仁五錢、麥冬一錢、萸仁一錢、胡黃連四分、地骨皮三錢，一服減，二服瘳。

趙坤維令正病，自首至胸汗出如淋，動則尤甚，頗能食，然食入則滿，面淋漓，衣領盡透。醫與玉屏風散、當歸六黃湯俱不效。延診，右關寸數大，問面浮及齒痛否，曰然。此少厥二陰之火，上逆胃絡也。與重劑玉女煎，入杞子五錢、川連少許，二帖而瘳。

楊兆成病瘧瘧愈大汗如雨一日夜約斗餘醫盡力與固表收瀼反較麻黃姜活爲甚延診脈洪數有力日啖粥十數甌猶覺饑蓋瘧時多服半夏豆蔻蒼朮厚朴藿香橘皮諸燥烈之劑擾動胃火而然若與六黃湯則汗止而瘧必更作乃用生地一兩石膏五錢黃連八分麥冬三錢蔓仁一錢半一服減二服瘧亦不作。

張玉書年近六旬素患陰虛火甚兩手脈上溢入掌心夏月偶不快就混堂澡浴以圖汗解歸而寒熱大作頭痛兩耳後焮腫上連承靈下至天牖急邀余視余適他出別延外科謂當成耳枕癰勢甚危投以搜風敗毒之劑腦後肩甲

筋絡益抽掣急絆燥渴躁悶小便淋瀝如火迨余至困憊  
不支矣脈之洪數異常知其中熱邪在陽明少陽以陰虛  
過汗火就升上又爲風藥所鼓而然不可與柴胡乃君以  
黃芩石膏臣以鮮乾兩地黃佐以滑石生甘草使以連翹  
木通大劑飲之次日腫痛減腫處尙赤色前方入萊豆一  
合腫痛全消再與導赤散合六一散而愈

徐靈胎曰治病之法不外汗下二端下之害人其危立見故  
醫者病者皆不敢輕投至於汗多亡陽而死者十有二三  
雖死而人不覺也何則凡人患風寒之症必相戒以爲甯  
暖無涼病者亦重加覆護醫者亦云服藥必須汗出而解

故病人之求得汗。人人以爲當然也。秋冬之時。過暖尙無大害。至於盛夏初秋。天時暑燥。衛氣開而易洩。更加閉戶重衿。復投發散之劑。必至大汗不止而亡陽矣。又外感之疾。汗未出之時。必煩悶惡熱。及汗大出之後。衛氣盡洩。必陽衰而畏寒。始之暖覆。猶屬勉強。至此時雖欲不覆而不能。愈覆愈汗。愈汗愈寒。直至汗出如油。手足厥冷。而病不可爲矣。其死也。神氣甚清。亦無痛苦。病者醫者及旁觀之人。皆不解其何故。而忽死。惟有相顧噩然而已。總之有病之人。不可過涼。亦不宜太暖。無事不可令汗出。惟服藥之時。宜令小汗。仲景服桂枝湯法云。服湯已。溫覆令微汗。不

可如水淋漓此其法也。至於亡陽未劇猶可挽回。傷寒論中真武理中四逆等法可考。若以脫盡無可補救矣。又盛暑之時病者或居樓上或臥近竈之所無病之人一立其處汗出如雨。患病者必至時時出汗。卽不亡陽亦必陰竭而死。雖無移徙之所必擇一席稍涼之地而處之。否則神丹不救也。

裴兆期曰一士人大病久虛後已大受餐且日服大補氣血之藥兼旬越月宜其起矣不謂飲食頓減遍體畏寒自汗盜汗晝夜不止已延二三名家進以桂附參耆汗愈多而寒益甚參耆加至兩許亦不驗余以姜活防風爲君蒼朮

半夏爲臣。黃連陳皮砂仁厚朴茯苓桂枝浮麥爲使。一劑而汗收。並不畏寒矣。隨製人參大補脾丸與之。調理不踰月而康。蓋大病久虛之後。胃雖強而脾尙弱。易於加餐。難於運化。且湯藥之補無虛日。濕熱鬱於中宮。故飲食頓減。而多汗多寒也。人身捍衛之氣出於胃。胃旣爲痰涎所閉。則捍衛之氣不能布皮毛。充腠理。先哲謂中腕有痰。令人多寒。脾濕不流。令人多汗。此之謂也。其多汗而反用姜防者。以其腠理開疏。風氣乘虛來客。必先去其風。而汗始易收也。其畏寒而反用黃連者。以寒非虛寒。乃濕熱生痰所致之寒濕清。而寒自止也。凡人當大病之後。切不可恣投



以藥。無論藥謬。卽對病者。亦不可不慎。蓋人之元氣。以胃氣爲本。胃氣又以穀氣爲本。大病之人。與穀氣久疏。則所喜者食物。所惡者藥。物理之常也。此際正當以食投其所好。以養胃氣。胃氣旺則元氣亦旺。不補之中。有至補者在。安用此拂意之物。妨碍胃氣耶。今之醫者。不明此理。每遇病久乍痊。必謂氣血兩虛。尙須大補。其藥不外當歸地黃。枸杞。故紙。山藥。茯苓。參耆。苓朮等類。不煎則丸。恣投無忌。有服之而飲食反減者。有服之而作瀉作嘔。與腫滿者。甚至有膈脹不能食。而反生他症者。名爲補人。而實害人矣。可不戒哉。

裴兆期治一孝廉爲諸生時以遷居縈擾復不免有少年事  
於秋盡冬初日晡發熱亦恬不爲意裴診之則六脈已虛  
疾無倫爲之駭然以人參五錢桂附歸朮各二錢囑曰急  
急煎服庶可無虞猶泄泄未之遽信不移時輒汗流如洗  
手足冷而目眩神疲就枕不能佈語始急以前藥連服五  
六劑人參加至一兩餘勢乃稍定脈尙幾幾欲絕越日往  
視脈狀如前汗復以時至裴卽宿於其家用人參一兩附  
子半枚另用黃芪二兩煎湯煮藥凡四進汗猶不止時漏  
已三下無處市藥不得已以前渣合煎以濟權時之急至  
子後陽生胃氣方回啖糜粥二甌肉食數箸汗始漸止脈

亦自此有敘。天明急市參以繼之。調理而愈。

藜按此自汗之極重者。不惟陽虛。陰亦大傷。純用參芪桂附。已不免偏勝之弊。參入當歸。尤不合法。得藥渣甘淡之力。胃氣始回復。得粥食。助其胃氣。而汗始斂。非得力于參者。桂附也。

徐靈胎曰。經云。奪血者無汗。奪汗者無血。血屬陰。是汗多乃亡陰也。故治汗之法。必用涼心斂肺之藥。何也。心主血。汗爲心之液。故當清心火。汗必從皮毛出。肺主皮毛。故又當斂肺氣。此正治也。惟汗出太甚。則陰氣上竭。而腎中龍雷之火。隨水而上。若以寒涼折之。其火愈熾。惟用大劑參附。

佐以鹹降之品如童便牡蠣之類冷飲一碗直達下焦引其真陽下降則龍雷之火反乎其位而汗隨止此與亡陰之汗真大相懸絕故亡陰亡陽其治法截然而轉機在頃刻當陽氣之未動也以陰藥止汗及陽氣之既動也以陽藥止汗而龍骨牡蠣黃芪五味收澁之藥則兩方皆可隨宜用之醫者能於亡陰亡陽之交分其界限則用藥無誤矣其亡陰亡陽之辦法何也亡陰之汗身畏熱手足溫肌熱汗亦熱而味鹹口渴喜涼飲氣粗脈洪實此其驗也亡陽之汗身反惡寒手足冷肌涼汗冷而味淡微粘口不渴而喜熱飲氣微脈浮數而空此其驗也至於尋常之正汗

熱汗邪汗自汗。又不在二者之列。此理知者絕少。卽此汗之一端。而聚訟紛紛。毫無定見。誤治甚多也。

又曰。汗出總由於心火不甯。屬熱者多。屬寒者少。今人皆用補陽治法。乃一偏之見。皆由不知汗出之液。在何經也。誤人多矣。亡陽之汗。乃陽氣飛越。下焦空虛。此乃危急之症。非參附不能回陽。與自汗盜汗。大不相同。醫者全然不知。并爲一病。貽誤無窮。深爲可笑。

尤在經曰。一人食鹹。頭汗如注。食淡則否。診之心脈獨大。而持指。因問曰。燥欲飲乎。曰然。每晨起。舌必有刺。因悟。所以頭汗出者。心火太盛。而水不勝之也。味鹹屬水。而能降火。

火與水持。火盛水微。不能勝之。而反外越也。其出於頭者。水本潤下。而火性上炎。水爲火激。反從其化也。食淡則否。者。鹹味湧泄爲陰。淡味滲泄爲陽。陽與陽從。不相激射。攻得遂其滲泄之性。而下行也。

# 欬嗽

徽宗寵如苦痰嗽。終夕不寐。面浮如盤。詔內醫李防禦用藥。令供狀。三日不效。當誅。李憂撓技窮。與妻對泣。忽聞外間。叫云。咳藥一文一帖。喫了。今夜睡得。李使人市藥十帖。其色淺碧。用淡薑水滴麻油數點調服。李疑草藥性獷。或

使臟腑滑泄併三為一。自試之既而無他。於是取三帖合

為一。攜入禁庭。授如請分兩服。是夕嗽止。比曉面腫亦消

上喜。賜金帛直萬緡。李念病即安。倘索方無以為對。令僕

俟前賣藥人過。邀飲以百金賂其方。乃蚌粉一物。新瓦炒

合通紅。拌青黛少許耳。叩其從來曰。壯而從軍。老而停汰。

頃見主帥有此方。故剽得之。以其易辦。姑藉以度餘生。無

他長也。李給之終身。

槎菴小乘

文田按咳嗽症辛升太過腎氣逆上故蚌粉以養其腎陰

所以能愈

潘墳曰。予夏秋之交。火嗽月餘。晝夜不輟聲。不能伏枕。幾殆。

羣醫皆主故常曰。西方金司令。肺氣盛耳。當瀉。或曰。久嗽

肺虛當補或曰歛之愈予曰金初司令穉金也火尙未伏壯火也壯火能爍舞金瀉之金愈弱火愈熾此嗽所以不能止也經曰無違時無伐化又曰無伐生生之氣今氣初生而瀉之伐化也殆於不可况五火相煽肺失清化之令補之恐反助火歛之恐不能散火請更思之醫不聽各主所見饋藥不敢嘗日飲解毒涼膈散去硝黃加白朮以助胃氣晨服童便不時服梨汁瓜漿各十數杯醫乃暗投人參五味煎以予飲而予不知也飲之則愈嗽加喘乃專主已見飲前藥數日火退嗽止而病瘳矣

褚記室

解毒涼膈

散大黃芒硝甘草連翹黃芩薄荷梔子爲末加竹葉生蜜



漢陽庫兵王六病痰嗽并喘百藥不效于岳陽遇一道人教  
用五味子白礬等分爲末每服三錢以生豬肺炙熟蘸末  
細嚼白湯下兩服病遂不發久病乃可服此

本草綱目

張子和治東門高三郎病嗽一年半耳鳴三月矣嗽吐膿血  
面多黑點身表俱熱喉中不能發聲曰嗽之源心火之勝  
也。秋傷干濕冬生咳嗽冬水既旺水濕相接隔絕于心火  
火不下降反而炎上肺金被燥發而爲嗽金煨既久聲反  
不發醫補肺腎皆非也令先備西瓜冰雪等涼物次用涌  
泄之法又服去濕之藥病日已矣

劉氏一男子年二十餘病勞嗽咯血吐唾粘臭不可聞秋冬

少緩春夏則甚寒熱往來日晡發作狀如瘧瘧寢汗如水  
累服麻黃根敗蒲扇止汗汗自若也又服甯神散甯肺散  
止嗽嗽自若也張先以獨聖散吐其痰狀如雞黃汗隨湧  
出昏憤三日不省時時飲以凉水精神稍開飲食加進又  
與人參半夏丸桂苓甘露散服之不數日乃愈

趙君玉妻病嗽時以十月矣張處方用陳皮歸身甘草白朮  
枳壳桔梗趙以其不類嗽藥張笑曰君怪無烏梅鶯粟囊  
乎夫冬嗽乃秋之濕也濕上逆而爲嗽此方皆散氣除濕  
解結和經三服而愈

竇材治一人病咳嗽盜汗發熱困倦減食四肢逆冷六脈弦

緊乃腎氣虛也。先灸關元五百壯，予保命延壽丹二十九  
鐘乳粉二錢，間日服金液丹百丸，一月全安。

一人病咳嗽，脈症與上條同，但病人怕灸，止服延壽丹五十  
粒，金液丹百粒，鍾乳粉二兩，五日減可，十日脈沉緩，乃真  
氣復也。仍服前藥一月全安。蓋此病早不灸亦可，遲必加  
灸，否則難治。

凌漢章治里人病嗽，絕食五日，眾投以補劑，益盛。凌曰：此寒  
濕積也。穴在頂，針之，必暈絕。逾時始蘇，命四人分牽其髮，  
使勿傾側，乃針果暈絕。家人皆哭，凌言笑自若。頃之氣漸

蘇，復加補始出針，嘔積痰斗許，病即除。

明史

一中年婦人乾咳寸脈滑動似豆狀。餘皆散大不浮左大于右。每五更心躁熱有汗。但怒氣則甚。與桔梗貝母諸藥不效。遂以石膏香附爲君。蒼連青黛門冬瓜蒌仁陳皮炒柏歸梗爲臣。五味砂仁川芎紫苑爲佐。凡二十餘帖而安。

醫學

綱目

崔某療久嗽熏法。每旦取欵冬花如鷄子大。少許密拌花使潤。約一升鐵器鑊中。又用一瓦碗鑽一孔。內安小竹筒。或筆管亦得其筒。少長置碗鑊相合。及插筒處皆麵糊塗之。勿令泄氣。鑊下著炭火。少時欵冬烟自竹管出。以口含筒。吸取咽之。如胸中稍悶。須舉頭。卽將指頭捻竹筒頭。勿令

漏烟出氣及烟盡止凡如是五日一為之至六日則飽食

羊肉餛飩一頓永瘥

一法不用鐺碗用有嘴瓦瓶燒藥蓋住瓶口却以口干瓶嘴吸烟咽之尤

捷也

街譚希曾咳嗽吐痰手足時冷以為脾肺虛寒用補中益

氣加炮姜而愈

賈林以肢冷為腎氣虛

一婦人患咳嗽脇痛發熱日晡益甚用加味逍遙散熟地治

之而愈年餘因怒氣勞役前症仍作又太陽痛或寒熱往

來或咳嗽遺尿此肺氣虛肝火盛而尿脬失制也用前散

及地黃丸月餘而瘥

表弟婦咳嗽發熱嘔吐痰涎日夜約五六碗喘咳不甯胸痞

燥渴飲食不進崩血如涌此命門火衰脾土虛寒用八味丸及附子理中湯加減治之而愈

一婦人久咳嗽面色痿黃或時眊白肢體倦怠飲食少思稍多則瀉此脾土虛而不能生肺金朝用補中益氣湯夕用六君子湯爲主間佐以八珍湯三月餘漸愈後感寒邪喘嗽胸腹作脹飲食不入四肢逆冷此中氣尙虛不能充皮毛實腠理司開闔之所致也遂用六君加生姜及桔梗而愈

一婦人患勞嗽晡熱內熱寒熱往來作渴盜汗小便頻數其經兩三月一行此肝脾氣血虛損用八珍湯六味丸六十

餘劑諸症漸愈。其經兩月一行。仍用前二藥。間以加味道遙散各三十餘劑。後恚怒。適經行去血過多。諸症悉至。飲食少思。腹脹氣促。用十全大補湯數劑漸愈。仍用前藥調補。復因喪子。胸腹不利。食少內熱。盜汗便血無寐。用加味歸脾湯。仍兼前藥而愈。

錦衣李大用。素不愼。起居吐痰自汗咳嗽發熱。服二陳芩連枳壳山梔之類。前症不減。飲食少思。用四物二陳芩連元參知柏之類。前症愈甚。更加胸腹不利。飲食亦少。內熱晡熱。加桑皮紫蘇杏仁紫苑桔梗之類。胸腹膨脹小便短少。用猪苓澤瀉白朮茯苓枳壳青皮半夏黃連蘇子胸膈痞

滿脇筋膨脹小便不通加茵陳葶藶喘促不臥飲食不進  
診之六脈洪數肺腎二部尤甚曰脾土既不能生肺金而  
心火又乘之此肺癰之候也當滋化源緩則不救不信後  
唾膿痰復求治胸膈痞滿脾土敗也喘促不臥肺金敗也  
小便不通腎水敗也脇肋膨脹肝木敗也飲食不化心火  
敗也此化源既絕五臟已敗藥豈能生已而果然

絲客姚荃者素鬱怒年近六十脾胃不健服香燥行氣飲食  
少思兩脇脹悶服行氣破血飲食不入右脇脹痛喜用手  
按彼疑爲膈氣痰飲內傷曰肝木尅脾土而脾土不能生  
肺金也若內有瘀血雖單衣亦不敢著肉用滋化源之藥



四劑諸症頓退。彼以爲愈。曰火令在適。當保脾土以補肺金。彼不信。後復作。另用痰火之劑。益甚。求治左關右寸滑數。此肺內潰矣。仍不信。服前藥果吐穢膿而歿。

嘉興周上舍。每至夏患咳嗽。服降火化痰之劑。咳嗽益甚。脾肺腎脈皆浮而洪。按之微細。此脾土虛不能生肺金。肺金不能生腎水。而虛火上炎也。朝用補中益氣湯。夕用六味地黃丸。而痊。後至夏遂不再發。

一婦人不得於姑。患咳嗽胸膈不利。飲食無味。此脾肺俱傷。痰鬱于中。先用歸脾湯。加山梔川芎貝母桔梗。諸症漸愈。後以六君加川芎桔梗。間服全愈。

一婦人咳嗽脇痛。或用清氣化痰降火等劑。久不愈。更加內熱。晡熱。若兩脇或小腹內熱。其嗽益甚。小便自遺。此屬肝經血虛火動。用六味丸加五味子。滋腎水以生肝血。用補中益氣生脾。土以滋肺金而尋愈。

上舍陳道復長子。虧損腎經。久患咳嗽。午後益甚。薛曰。當補脾土。滋化源。使金水自能相生。時孟春不信。乃服黃柏知母之類。至夏吐痰引飲。小便頻數。面目如緋。薛以白朮當歸。茯苓。陳皮。麥冬。五味。丹皮。澤瀉。四劑。乃以參。芪。熟地。山茱。爲丸。俾服之。諸症頓退。復請視。以爲信。遂以前藥如常。與之。仍泥不服。卒致不起。

陸養愚治吳氏妾。寡居夜熱，以煩勞感冒，乾咳無痰，醫與疏風藥，反增嘔惡。更以二陳症不減，而夜不能寐，若失神志，煩亂不安，脈之沉弦而數，曰乾咳乃火鬱之甚，最爲難治。况寡居多年，其鬱可知。雖有風寒，但於養氣養血，舒鬱清熱中，微加疏散。若竟發其表，升動陰火，則病反甚。重以二陳之燥，宜其煩亂不寐，神志如失也。用清氣養榮湯加黃芩、前胡、薄荷、杏仁、蘇葉二劑，咳嗽煩悶俱減。第睡未安，脈微浮而數，去蘇葉，前胡、杏仁加貝母、知母、山梔、棗仁、竹茹、大棗二劑，諸症俱愈。但四肢倦怠，氣乏不足，以息脈浮數而弱，此虛火已平，真氣衰乏之候，仍用前湯，加貝母、棗仁。

更入人參一錢五分數劑而愈

陳曙倉室咳嗽。或時純血。或時純痰。或時痰血相半。夜熱頭眩。胸膈不舒。脚膝無力。服滋陰降火藥已半年矣。飲食漸少。精神漸羸。脈之兩寸關沉數而有力。兩尺澹弱而微浮。此上盛下虛之症也。上盛者。心肺間有留飲瘀血。下虛者。肝腎之氣不足。用人參固本丸。令空腹服之。日中用貝母蘇子山渣丹皮桃仁紅花小蘗。以茅根煎汁入藥同煎。十劑痰清血止。後以清氣養榮湯。與固本丸間服。三月後病痊而孕。

陸肖愚治吳遜齋患咳嗽身熱脇痛。日輕夜重。寢食俱廢。咸

以年高病重爲慮，脈之左手浮弦，右手弦滑。曰：此病極輕，何必憂疑。乃內有食積痰飲，外感風邪所致也。少爲消導，疏散卽愈矣。用蘇葉、柴胡以解其表，青皮、白芥以治其脇。桑皮、前胡、杏仁以治其嗽，陳皮、半夏以清其痰，山楂、枳實以消其食。二劑而減，四劑脫然。

陸祖愚治費表母，生平飲酒多而穀食少，釀成痰火。每至五更則疾作，喘嗽頻併，氣逆息粗，不能伏枕，由來久矣。年近七旬，其痰大發，日夜昏暈，數次四肢厥冷，自汗如洗，形容瘦削，六脈如絲。或與清火清痰，毫不應，乃用附子理中料，干杵蜜丸，淡鹽湯服以助。下元另以知母、貝母、桑皮、葷煎。

湯徐徐含嚥清其上膈。數劑嗽稀喘止肢溫汗歛。再用十全大補湯料九服。數十年痼疾從此遂瘳。

陳三農之室。遇夜嗽甚多。痰作陰虛火動。以四物換生地貝母。知母。薏仁。杏仁。麥冬。五味。二劑而愈。

孫文垣姪婦。喉中掀痒。咳嗽紅痰。兩寸關洪大。內熱生瘡。山梔。小薊。生地。丹皮。滑石。青皮。麥冬。甘草。黃連。薏仁。水煎服。血止嗽除。後遇勞卽咳嗽。嗽喉中血腥。總由上焦熱甚而然。以枇杷葉。山梔。生地。白芍。甘草。丹皮。地骨皮。天花粉。滑石。紫苑。常服三五劑。兩月而安。

溫天衢冬月病。目醫與發散太過。至春間吐血碗餘。及夏下

午潮熱咳嗽胸膈脹疼早晨冷汗淋漓大便溏一日兩行  
飲食少肌肉消十之七脈數孫曰據症脈法在不治衆懇  
不能辭乃用瀉白散加五味白芍貝母馬兜鈴服下其夜  
帖然而臥不嗽惟大便溏前藥加扁豆山藥茯苓汗亦漸  
止復與瀉白散加石斛馬兜鈴貝母陳皮苡仁白芍山藥  
五味桔梗調理三月而痊。

琇按此與孫治吳肖峰內人注夏誤服參蘇飲成咳嗽  
同爲發散所傷世俗謂傷風不醒變成勞者是也過表  
之害詢然然亦有風寒痼閉不出而成勞者魏君猶知  
其一未知其二也。不知此等皆爲市醫不分虛實恣用

門  
疏散散病變之重而重者至死猶曰傷風不醒哀哉。吳案見痿

李士材治一人咳而上氣凡清火潤肺化痰理氣之劑幾無遺用而病不少衰診其腎脈大而軟此氣虛火不歸元用人參三錢煎湯送八味丸五錢一服而減後用補中益氣湯加桂一錢附子八分凡五十劑及八味丸二斤而痊一人經年咳嗽更醫數十人藥不絕口而病反增劇自謂必成勞嗽李曰不然脈不數不虛惟右寸浮大而滑是風未解必多服酸收故久而彌甚用麻黃杏仁半夏前胡桔梗甘草橘紅蘇子五劑減十劑已



馮楚瞻治李孝廉患咳嗽甚頻視其身長肥白。頰色常紅。知爲表有餘而裡不足。上假熱而下真寒。病必當劇。勸以重服藥餌。時有通譜新貴甚精醫藥。乃託其治。所用乃山梔黃岑花粉橘紅貝母蘇子杏仁之類。止之勿聽。數劑後嗽轉甚。煩躁喜冷。倍常益信寒涼爲對症。倍用之。轉劇再進。煩躁更甚。粒不下。咽飲水無度。更以爲實熱。以三黃丸下之。利行不多。漸加喘促。再劑夜半喘大作。有出無入。遍身麻木。潰汗如雨。神昏目直。口噤不言。委頓極矣。亟招馮診。兩寸左關僅存。時當六月。欲與四逆理中。主人畏懼。改以人參一兩。麥冬二錢。五味六分。肉桂錢許。始允急煎服之。

喘減片刻。奈病大藥小。頃復大作。乃不咎寒涼之誤。反以參桂爲罪矣。因思盡吾之力。尙可以活。若徇彼之見。必死而已。乃堅定一方。勒令服之。用炒白朮三兩。人參二兩。炮姜三錢。五味子一錢。五分製附子三錢。煎濃汁。灌之下咽。後病人張口大聲云。心中如火。烙欲死。此不與冷服故傍觀疑怨。交起不爲動。頃之又大聲曰。臍間更疼。更熱。欲死矣。乃竊喜其陽能下達。未之絕也。果少焉。喘定。汗收。手足溫。而神思清。語言反甚無力。此方亦多參少者。因中宮久困寒冷。不先爲理中。則陽氣難下達也。

呂東莊治徐鸞和內病咳嗽。醫以傷風治之。益甚。邀診則中

虛脈也。曰鼻塞垂涕痰急。皆傷風實症。何得云虛。曰此虛實真假所辨在脈。庸醫昧此。誤人多矣。彼不知脈。請卽以症辨之。其人必晡熱潮熱。至夜半漸清。至晨稍安。然乎。曰。然。然則中虛何疑乎。所言喜者。正此鼻塞垂涕耳。乃投以人參白朮當歸黃芪白芍各三錢。軟柴胡升麻各一錢。陳一皮甘草五味各六分。三劑而咳嗽立止。再診謂之曰。上症已去。唯帶下殊甚。近崩中耳。驚應曰。然卽前方重用人參。加補骨脂阿膠各二錢。數劑兼服六味丸而愈。

柴嶼青治陳氏甥女。咳嗽吐痰。夜間發熱。衆醫以爲必成勞症。診其脈雖稍洪。尙有根柢。並非細數。何至不治。純用滋

陰之藥調養半年而愈。

同學蔡爲章患痰嗽夜難就寢身不勝衣夜臥床不能轉側診其六脈微弱氣血兩劇擬用參芪補劑蔡以痰嗽不宜用補爲疑乃力任之先用六君子湯加炮姜桂附數帖而嗽減繼用養榮湯十數劑始能下牀行動調理月餘而康張惕中咳嗽吐痰醫誤認風寒服藥十數劑病增劇身熱喘嗽夜不能臥胸膈痞塞困於床第小便短縮診得人迎脈緩絕非外感氣口空大左寸弱甚兩沉微微此心腎不足的係內傷之症其小便不利者三焦之氣化不能運于州都也從東垣治內傷條師其意而變通之旬日而痊。

左中丞夫人年二十餘，形體瘦弱，痰嗽息粗，夜不能寐，醫頻與消痰理氣，愈委頓。診其脈甚微細，此氣虛也。仲景云：氣虛有痰，腎氣丸補而逐之。遂用六味湯加麥冬、五味治之而愈。惟夜間尙未熟睡，再用養榮湯加茯神、棗仁，十數劑，卽加餐安睡，漸得復元。

丙寅，新正，岡卿諱伊喇齊長郎賀節至寓云：咳嗽求方診其兩脈細數，右寸鬱結，斷其難以收功，勉用麻黃湯。伊斷斷不可，曰：我子陰虧，他醫熟地人參服過數兩，柴曰：陰虧誠然，但風邪閉塞肺氣，補劑又從而壅遏之，非此不能去邪，力爭不信，早決其不起，果然。

琇按凡損症脈見右寸厥厥然如豆按之梗指其病原屬不起以肺金敗也。今以右寸鬱結斷爲風邪閉塞然必見鼻塞聲重或頭痛痰濃或咳嗽連續方是其候

王肯堂治一婦人咳嗽不已服諸藥不效漸成勞瘵診之六脈濡弱此血弱又因憂感太過而成斯疾合用當歸等藥治之必愈遂先以占今錄驗橘皮湯空心服蘇子降氣湯徐用金釵煎熟地黃丸當歸丸調理而安 橘皮湯文田按今見千金方五十四卷橘皮麻黃各三兩柴胡乾紫蘇各三兩宿姜杏仁各四兩石羔八兩右七味咬咀水九升煎麻黃兩沸去沫下諸藥煮取三升分三服

張路玉治吳江郭邑侯喘嗽氣逆診之兩尺左關弦數兩寸

右關濇數。弦者腎之虛。濇者肺之燥。夏暑內伏肺絡。遇秋

月燥收之。令發為咳嗽也。自言每歲交秋則咳。連發四載。

屢咳痰不得出。則喘。至夜不能臥。咳劇則大便枯燥。有血。

曾服越脾湯。嗽即稍可。張曰。公腎氣素強固。水虧火旺。陰

火上熒。肺金燥不能生水。咳甚則使燥有血者。肺移熱

于大腸也。賴有合用千金麥門冬方。除去半夏。生姜之辛

燥。易以葳蕤白蜜之甘潤。藉麻黃以鼓舞麥冬。生地之力

與越脾湯中麻黃石膏分解互結之燥熱同一義也。郭曰。

諸醫咸詆麻黃為發汗重劑。不可輕試。僅用杏仁蘇子甘

梗前胡等藥服之其咳轉甚何也。曰麻黃雖云主表今在  
麥門冬湯中不過借以開發肺氣原非發汗之謂麻黃在  
大青龍湯麻黃湯麻杏甘石湯方其力便峻以其中皆有  
杏仁也杏仁雖舉世視爲治嗽通藥虛實混用然辛溫走  
肺最不純良耗氣動血莫此爲甚熬黑入大陷胸丸佐甘  
遂等搜逐結垢性味可知遂用前方連進二劑是夜便得  
安睡脈弦雖未退按之稍爽氣口則虛濡乏力與六味生  
脈加葳蕤白蜜作湯四服嗽頓減卽以此方製丸恒服至  
秋無復嗽之虞。先是公子柔痊用桂枝湯及六味作湯  
加蝎尾服之而瘥其後夫人素有敗痰生道左右兩脇俱



有結塊大如覆盆發則咳嗽喘逆腹脇掣痛六脈止促按之少力用六君子加胆星枳實香附沉香二劑大吐稠痰結垢一二升嘔止嗽甯不必更進他藥矣

何督學媳素常咳嗽不已痰中間有血點恆服童真丸不徹以父歿哀痛迫切咳逆倍常痰中雜見鮮血因與瑞金丹四服仍以童真丸烏骨雞丸調補而安

勞太夫人年五十餘素稟氣虛多痰數日來患風熱咳逆咳甚則兀兀欲吐且宿有崩淋近幸向安法當先治其咳以桔梗湯加葳蕤白薇丹皮橘紅蜜煎生姜四劑撤其標症次與六君子加葳蕤以安胃氣繼進烏骨雞丸方療其綱

疾以久不茹葷不忍傷殘物命改用大溫經湯加麋茸角  
腮作丸藥雖異而功則一也

陳三農治一婦咳嗽痰喘飽脹水火不通眠食俱廢以人參  
白芍爲君蘇子炒研細爲佐枇杷葉三大片白茯苓佐之  
二服得眠大小便通

東坡蓋公堂記云始吾居鄉有病寒而咳者問諸醫醫以爲  
蠱不治且殺人取其百金而治之飲以蠱藥攻伐其腎腸  
燒灼其體膚禁切其飲食之美者期月而百病作內熱惡  
寒而咳不已纍然真蠱者也又求于醫醫以爲熱投之以  
寒藥旦夕吐之暮夜下之于是始不能食懼而反之則鍾

乳烏喙襍然並進。而漂疽癰疥眩瞽之狀無所不至。三易醫而病愈甚。里老父教之曰。是醫之罪。藥之過也。子何疾之有人之生也。以氣爲主食。爲輔。今子終日藥不釋口。臭味亂于外。而百毒戰于內。勞其主。隔其輔。是以病也。子退而休之。謝醫却藥。而進所嗜。氣全而食美矣。可以一飲而效。從之。期月而病良已。

容齋五筆

後文節

薛立齋治甥范允迪。咳嗽痰盛。胸腹不利。飲食少思。肢體倦怠。脈浮大。按之微弱。服二陳枳壳等藥。愈甚。脾肺腎虛也。用補中益氣湯六味丸而愈。

萬密齋治監生胡篤菴。咳久不止。汗之不可下之不可。因表

裏之邪俱甚也爲製方。用蘇葉薄花葉桑白皮杏仁霜瓜  
萹霜桔梗甘草等分爲末。虛者阿膠蜜丸白湯下。或口中  
噙化五日而安。後以治人多效。

立齋治一癩婦咳而無痰。日晡發熱脈浮數。先以甘桔湯少  
愈。後以地皮骨散而熱退。更以腎氣丸及八珍湯加柴胡  
地骨皮丹皮而愈。丹溪云咳而無痰者此係火鬱之症。及  
痰鬱火邪在中。用苦梗開之下。用補陰降火之劑。不已則  
成勞嗽。此症不得志者多有之。又原病式曰人瘦者腠理  
疏通而多汗。血液衰少而爲燥。故爲勞嗽之痰也。文田  
按薛方誠未盡善。然癩症少陽盛而少陰虛。立齋之偶驗。

亦倖中耳。予亦嘗見癩症須用附子而後愈者。至少陽之

用柴胡。則中庸定理王氏治病從溫病人。故頗畏朮附而

酷惡柴胡。所謂過猶不及矣。

癩癩爲勞怯之根。加以乾咳潮熱。則勞症成矣。此數方者

烏足以愈之。大約薛氏因丹溪有此論。故附會言之。否則其病少衰。便以爲愈耳。不足信也。

一男子咳嗽氣急胸膈脹滿睡臥不安。以葶藶散二服少愈。更以桔梗湯而瘥。

一男子咳嗽項強氣促脈浮而緊。以參蘇飲二劑少愈。更以桔梗湯四劑而痊。

馬元儀治楊咸時咳嗽多痰氣逆作喘自汗不食已兩月脈之虛微無神。此勞倦致傷脾肺也。經云勞則氣耗氣與陰

火勢不兩立。氣衰則火自勝。土虛既不能生金。陰火又從而尅之。故喘嗽而汗作矣。若行疏泄以定喘止嗽。是耗散其氣也。用人參二錢。黃芪五錢。炙草五分。貝母一錢。杏仁蘇子各二錢。紫苑桔梗防風以佐之。兼進七味丸以培土母。歸脾大造膏以實脾肺而愈。

來天培治一婦年二旬餘。季夏酷熱患咳嗽頭痛發熱胸膈不舒。或以蘇杏前貝生地黃芩治之。轉甚。視其面色浮腫。懶言氣怯。咳嗽聲微。胸膈脹滿。飲食不下。六脈微弱。此風寒內伏。裏虛致感也。始宜以參蘇飲倍姜棗。一二劑可已。今增虛矣。非薑附不能瘳也。以補中益氣湯去升麻柴胡。

加川芎炮姜附子。一劑汗出遍身。腫脹漸消。再劑熱退。改用八珍加姜附二劑而咳嗽除。終以歸脾加熟地炮姜四劑聲高食進矣。彼云舊有風症。兩手不能舉。今服藥乃能舉于頭矣。此治病必求其本之謂歟。

沈明生治金斐文夏患咳嗽。清痰續續不已。時風熱嗽甚多。金謂所投之劑非疏風化痰。卽清金條熱及診曰。是非溫補不痊。金駭愕問故。曰君以外感盛行之際。必無內因者耶。初得之症。必無屬虛者耶。是則時有一定之方。症有一定之藥。人皆可以爲醫矣。夫嗽屬外因。必肺氣脹滿咳嗽相屬。或兼頭疼鼻塞。涕唾稠濃。聲壯氣壅。脈浮數有力。或



人迎脈大。此為外因。今脈不浮而沉。非風也。不數而緩。非熱也。按之不鼓。非有餘也。嗽雖頻而氣短。不續痰雖多而清薄不濃。若疏解則徒耗肺家之金。清涼則轉瘠中州之土。是欲去病而反重病也。宜用補中益氣與六君子。參合複方。藉參苓朮以補肺之母。使痰無由生。藉橘半升柴以升清降濁。則嗽可不作。一二劑嗽微減。再服浹旬而愈。

吳橋治鄱陽王令領邑甫及期。病咳嗽。唾痰稠黏而臭。且雜以血。久之潮熱失聲。食少肉消。閉戶踰月。將乞骸骨歸。幸橋至診之。橋獨任其無害。令愕然。且固問橋。橋曰。此肝氣凌脾。治者謬以為陰虛火動。劑涼則脾益滯。津液不通。肝



愈熾而無所制矣。法當扶脾抑肝。三劑如脫七劑而出視。

事太函集

徐靈胎曰。咳嗽由於風寒入肺。肺爲嬌臟。一味誤投。卽能受害。若用熟地麥冬黃肉五味等。滋膩酸斂之品。補住外邪。必至咯血失音喉癰肛癰喘急寒熱。近者半年。遠者三年。無有不死。蓋其服此等藥之日。卽其絕命之日也。間有見機而停藥者。或能多延歲月。我見以千計。故今之吐血而成勞者。大半皆因咳嗽而誤服補藥所致也。或云五味子乃仲景治嗽必用之藥。不知古方之用五味。必合乾姜一散一收。以治寒嗽之症。非治風火之嗽也。况加以熟地麥

冬則受禍尤烈。又嗽藥中多有桔梗。桔梗升提。甘桔湯中用之。以載甘藥上行。治少陰之喉痛。與治嗽宜清降之法者。非宜。苟誤服之。往往令人氣逆痰升。不能著枕。凡用藥當深知其性。而屢試屢驗。方可對病施治。無容冒昧也。

張柳吟曰。亦有咳嗽屬於陰虛肺燥者。誤投溫散。劫其津液。必成勞損。卽此論之對面也。醫者臨症。可不詳審其病情哉。

徐靈胎曰。今之醫者。謂吐血爲虛勞之病。此大謬也。夫吐血有數種。大概咳者成勞。不咳者不成勞。間有吐時偶咳者。當其吐血之時。狼狽頗甚。吐止卽痊。皆不成勞。何也。其吐

血一止則週身無病飲食如故而精神生矣即使亡血之  
後或陰虛內熱或筋骨疼痛皆可服藥而痊若咳嗽則血  
止而病仍在日嗽夜嗽痰壅氣升多則三年少則一年而  
死矣蓋咳嗽不止則腎中之元氣震蕩不甯肺爲腎之母  
母病則子亦病故也又肺爲五臟之華蓋經云穀氣入胃  
以傳於肺五臟六腑皆以受氣其清者爲營濁者爲衛是  
則臟腑皆取精于肺肺病則不能輸精於臟腑一年而臟  
腑皆枯三年而臟腑竭矣故咳嗽爲真勞不治之疾也然  
亦有咳嗽而不死者其嗽亦有時稍緩其飲食起居不甚  
變又其人善於調攝延至三年之後起居如舊間或一發

靜養卽愈。此乃百中難得一者也。更有不咳之人，血症屢發，肝竭肺傷，亦變咳嗽。久而亦死。此則不善調攝，以輕變重也。執此以決血症之死生，百不失一矣。

久嗽不愈。由於肺虛有火，法當清肺潤肺。忌用澁燥閉氣之藥。設若誤用粟壳訶子，俾火壅於肺，不得下降。若兼參朮半夏，卽死不旋踵矣。世醫往往蹈此覆轍，相尋卒無悟者。聊爲論著，敢告方來。廣筆記

葉天士治陸某咳嗽，乃秋暑燥氣上受，先干於肺，令人咳熱。此爲清邪中干，當以辛涼清潤，不可表汗，以傷津液。青竹葉連翹花粉杏仁象貝六一散。

又陸某濕必化熱。薰蒸爲嗽。氣隧未清。納穀不旺。必薄味靜養壯盛。不致延損。飛滑石花粉象貝苡仁綠豆皮通草。

胡某年六十六。脈右勁。因疥瘡頻以熱湯沐浴。衛疏易傷。冷熱皮毛內應乎肺。咳嗽氣塞痰多。久則食不甘便燥結。胃津日耗。不司供肺。况秋冬天降燥氣上加。漸至老年痰火之象。此清氣熱以潤燥。理勢宜然。倘畏虛日投滯補益。就枯燥矣。霜桑葉甜杏仁麥冬玉竹白沙參天花粉甘蔗漿甜梨汁熬膏。徐靈胎曰老年而無外感之嗽麥冬玉竹亦可用

一人年四十。脈弦胸膈痺痛。亥嗽頭脹。此燥氣上侵。肺氣不

宣使然。當用輕藥以清上焦。枇杷葉桑葉川貝母杏仁冬

瓜子

一人年二十七脈細促久嗽寒熱身痛汗出由精傷及胃用黃芪建中湯去薑

又一人年二十四脈弦右大久嗽背寒盜汗用小建中去薑加茯神

徐靈胎曰咳嗽服姜必吐血并能令人失音去之爲宜此亦人所不知也風嗽挾火者服桂枝必吐血百試百驗又曰葉氏用建中諸法治久嗽而中宮虛乃補母之義真古聖相傳之正法也若陰火虛勞之嗽與建中正相反也葉氏用此得手而誤施於虛勞亦辨之不審耳

馮長年孝廉素患陰虛咳嗽而犯時氣遂用葱白香豉湯加  
人中黃童便三日而安又一地師宿有血症亦感時氣卽  
用前湯更加犀角丹皮服後大便下血而愈王公峻治一  
孕婦風熱咳嗽已經發散後胎上逼心上氣倚息咳則遺  
漏用紫蘇飲去川芎腹皮加葳蕤白薇一劑而胎寔張誕  
先治一少年陰虛而傷秋燥常時火炎乾咳五心煩熱妄  
夢失精小水時白時黃杪秋忽大咳嗽坐間遍地清痰周  
身凜凜畏寒肌表微微發熱咳甚則嘔嘔則鼻衄如注小  
便結燥小水如淋先用異功散去朮加山藥次與六味丸  
加麥冬五味半月而嗽方止歷推治驗凡陰虛而更感風

寒未有不重在本病者。大抵火炎乾咳。悉是陰虛。古人雖有腎肝同治之論。然細格病情。多屬腎水枯竭。肝臟多火之證。所以只宜壯水制陽而導火之法。斷斷不可輕試也。薛一瓢曰。久咳移邪犯胃。因咳而肺肅無權。故氣升逆。勿用瀉損肺氣之藥。水梨去心帶皮搗爛。絲棉濾清。慢火煎膏。收入磁瓶內。每日開水送下五錢。

古人造字。兩火着力爲勞。故爲君相二火而說。溫補中州以靜痰之源。補下焦以益水之源。但病勢已深。恐非一繫可破也。熟地、枸杞子、元參、牛膝、茯苓、紫石英。

橫則爲坎。豎則爲水。中間一點真陽。水虧則露爲龍火。震下



之陽與之同源。升爲雷火。所以雷爲木屬。皆陰中之火也。純陰之藥。愈潑愈熾。一切草木。無能制之。當用一元丹。久服愈矣。澹秋石五六斤。紅棗漿爲丸。早服五六錢。晚服二三錢。以陽秋石點湯送下。

脈弦數尺。獨大。咳而喉痛失音。在數載失血之後。其陰虧火炎。不言可喻矣。惟有至靜之品。引陽潛入陰中。庶近內經之旨。然須作靜攝工夫。使陰密陽密。得坎離相變之力。爲妙熟地。用海石粉搗爛。金石斛。北沙參。茯苓。麥冬。生白芍。龜腹板山藥。

此病起於費心勞碌。風寒不節。遂致咳嗽吐痰。久則內傷。

內傷者內中之臟氣傷也。卽古人所謂虛勞。總不得愈。必須絕去費心勞碌之事。一毫凡念不起。助之以藥。或可延年。麥冬。阿膠。桔梗。炙草。沙參。苡仁。茯苓。

此真陰虧證。俗名百日勞也。稍有伏暑。所以寒熱愈甚。惜乎治之不早。爾熟地。茜草。青蒿。元參。滑石。丹皮。

脈得數而且弦。此陰虧證也。並非外感。今以虛火升而頭痛。漸有金水兩傷之勢。靜攝乃得藥餌。其次也。熟地。女貞子。麥冬。龜板。元參。澹秋石。棗漿。爲丸。開水送下。

心陰虛則多汗。肺陰虛則多嗽。肝陰虛則火升。腎陰虛則發熱。脾陰虛則便溏。非一真陰乎。怯症之漸也。但知頭痛醫

頭之爲良醫不知履霜堅冰至君子其爲憂危之心也炒  
白芍小生地麥冬棗肉桂枝尖甘草青蒿梗雲苔

此由金水不相承挹故咳久不愈切勿理肺肺爲嬌臟愈  
理愈虛亦不可泛然滋陰北沙參玉竹雲茯苓神川石斛甜  
杏仁生扁豆

治咳嗽神方甜杏仁一兩去皮尖搗如泥分爲三服每服加  
冰糖三錢開水沖連末服下早晚各一次三服愈煎服則  
不驗

1653

續名醫類案十六卷

錢塘魏之琇編集

海昌王士雄孟英

定州楊照藜素園

同校

# 痰

洞虛子曰痰之爲病。成偏頭風。成雷頭風。成太陽頭痛眩暈。如坐舟車。精神恍惚。或口眼瞤動。或眉稜耳輪俱痒。或頰腮四肢遊風腫硬。似疼非疼。或渾身燥痒。搔之則陰疹隨生。皮烘熱。色如錦斑。或齒頰似痒似痛。而無定所。滿口牙浮。痛痒不一。或噁氣吞酸。鼻聞焦臭。喉間豆腥氣。心煩鼻

塞咽噎不利。咯之不出。嚔之不下。或噴嚏而出。或因舉動而吐。其痰如墨。又如破絮。或如桃膠。或如蜆肉。或心下停水。鐵閉。滯窒妨悶。噎噎連聲。狀如膠氣。或寢夢如刑戮。刀兵劍戟。或夢入人家。四壁圍繞。暫得一竇。百計得出。則不知何所。或夢在燒人地上。四面烟火。枯骨焦氣。撲鼻無路可出。或因觸發忿怒。悲啼雨淚而寢。或時郊行。忽見天邊兩月交輝。或見金光數道。回頭無有。或足膝痠軟。或骨節脚腰腎疼。痛呼吸難任。或四肢肌骨間痛如擊戮。乍起乍止。並無常所。或不時手臂麻疼。狀如風濕。或如芒刺在背。着膚。或如毛蟲所螫。或四肢不舉。或手足重滯。或眼如薑

蜚膠黏痒。瀋開闔甚難。或陰晴交變之時。胸痞氣結。閉而不發。則齒痒咽痛。口糜舌爛。及其奮然而發。則噴嚏連聲。初則唾稠黏。次則清水如注。或眼前黑暗。腦後風聲。耳內蟬鳴。筋攣肉惕。治之者。或曰腠理不密。風府受邪。或曰上盛下虛。或曰虛。或曰寒。或曰發邪。惟洞虛子備此苦疾。乃能治療。病勢之來。則胸腹間如有二氣交紐。噎塞煩鬱。有如烟火上冲。頭面烘熱。眼花耳鳴。痰涎涕淚。並從肺胃間涌起。凜然毛豎。噴嚏千百。然後遍身煩燥。則去衣凍體。稍止片時。或春秋乍涼之時。多加衣衾。亦得暫緩。或頓飲冰水而定。或痛飲一醉而甯。終不能逐去病根。乃得神祕沉

香丸屢獲大效。愈人萬數。但不欲輕傳匪人。故以詩隱括之。詩曰。甌裏看翻甲帶金。於今頭戴草堂深。相逢二八求斤正。硝煨青礞倍若沉。十七兩中沉半兩。水九梧子意須斟。驅除怪病安心志。水瀉雙身却不任。大黃蒸八兩。黃芩八兩。青礞石一兩。硝煨如金色。沉香半兩。

孫兆治綵白舖劉員外。患傷寒六七日。晝夜不得眠。方眠卽起。方起卽倒。未嘗少息。時復身上冷出汗。孫診之。尺寸脈皆沉。關中亦沉。重脰之鼓擊於指上。此寒痰積聚於胸中也。遂用陳皮半。夏乾薑三物各一兩爲飲。生薑半兩槌碎。以水兩碗。煎七分去渣。分二服。服藥經時遂睡。經一晝夜。

不甦既覺下痰一塊如雞子大其病遂愈凡痰皆有冷汗其症明矣

張子和治一婦人心膈上結硬如斗按之若石人皆作痞治  
鍼灸毒藥禱祈無數如捕風然一日張見之曰此寒痰也  
脰其兩手寸關皆沉非寒痰而何以瓜蒂散吐之連吐六  
七升其塊立消過半俟數日後再吐之其涎沫類雞黃腥  
臭特殊約二三升凡如此者三以人參調中湯五苓散調  
服以平矣

朱丹溪治白雲許先生始因飲食作痰成脾疼後累因觸冒  
風雪腿骨作疼衆皆以脾痰骨疼爲寒雜進黃牙等藥雜



治十餘年間，艾炙數萬計，或似有效。及至病再作，反覺加重。至五十一歲時，又冒雪乘船，而病愈加。至坐則不能起，扶起亦不能行。兩胯骨不能開合。若脾疼作時，則兩胯骨痛處似覺稍輕。若飲食甘美，脾疼不作，則胯骨痛增重。諸老袖手計無所出。朱謂此初因中腕有宿食積痰，雜以冲冒寒濕，抑遏經絡，血氣津液不行。痰飲注入骨節，往來如潮。其涌而上則爲脾疼，降而下則爲胯痛。非涌泄之法，不足以治之。時七月二十四日，遂以甘遂末一錢入豬腰子內，煨以食之，連瀉七行。至次日兩足便能行步。至八月初三日，嘔吐大作，不能起床。顆粒不食，但時煩躁，氣弱不能

言語諸老皆歸罪於七月之瀉而又知累年之熱補俱悞  
皆不敢用藥朱嘗記金匱云病人無寒熱而短氣不足以  
息者此實也其病多年鬱結一旦以刀圭之劑泄之走動  
猖狂之熱未有制御之藥所以如此仍以吐劑達其上焦  
以次第治及其中下二焦於初三日用瓜蒂吐不透初六  
日用梔子又吐不透初九日用附子三枚和漿與之始得  
大吐嘔噦終日前後所吐共得膏痰沫液一大水桶初十  
日遂以朴硝滑石黃岑石膏連翹等涼藥咬咀一斤蒸濃  
汁放井水中極冷飲之十一十二十三十四日每日食上  
件藥一盞十五日腹微滿大小便皆祕悶朱欲用大承氣

下之諸老皆以爲不可。十六日六脈皆歇止。朱診其脈獨

歇止於四酉二時其餘時刻平和如舊。朱曰卯酉爲手足

陰陽之應。卯時屬大腸。酉時屬胃。此大腸與胃有積滯不

行。當速瀉之。爭論不已。至十八日遂作紫雪半斤。十九日

紫雪成。成每用一匙頭。以新汲井水化下。至二十日天未

明。已服紫雪五兩。神思少安。腹滿亦減。秀按觀于此案丹

識定力色色可臻絕頂若少一游移大事去矣景岳輩每疵議丹溪之學不知遇此大症能措手否遂收起

紫雪不與。二十一日大爲小便閉。作痛所苦。遂飲以蘿蔔

汁半茶盞。隨手痛止。小便立通。二十二日小腹滿痛不可

捫摸。神思不佳。遂以大黃牽牛作丸服。至三百丸。至二十

三日已時。大小便併通。如爛魚腸三碗許。臭惡可畏。是日神思少安。脰其脈不歇止矣。二十四日腹大絞痛。殆不能勝者。約一時許。腰胯沉重且墜。兩時不出聲。不能言。瀉下穢物如桮油條者一尺許。肚中如燒。片時方定。至二十五日神思漸安。夜間得睡。二十六日漸出聲音語。自初二日至此。並顆粒不會入口。語言並不出聲。至二十七日方啜半盞稀粥者四次。似有生意。至次月初四日方平安。其脈自嘔吐至病安日。皆平常弦大之脈。唯有中間數日歇止少異耳。至次年四月復行倒倉法。方步履如初。

徐東臯治匡掌科夫人年三十餘。病胃腕連胸脇痛。日輕夜

重兩寸關脈弦滑有力。諸醫以爲積滯凝寒。用發散及攻下藥。繼用鐵刷散。四磨飲等方。俱不效。後至湯水皆吐而不納。經月不食。痛且益甚。徐謂其爲痰鬱明矣。但痛久弱甚。不敢行吐法。奈何。偶一醫謂五靈脂沒藥素用有效。眾皆哂之。曰。此藥用之久矣。多矣。徐謂再用亦無妨。何哂之有。彼用酒調服。病者到口便吐。隨吐綠痰兩碗許。痛卽止。遂納飲食。此蓋痰在上。下之亦不去。必得吐法而後愈。經曰。有故無損。此之謂也。歟。

全書

孟望湖淮安人。耳中聞人聲。悉是祖考談其家。擾撓不休。邀劉春齋醫治。診之曰。暴病謂之胃火。怪病謂之痰。用滾痰

丸下之而痊

續金陵瑣事

一男子吐痰胸膈不利飲食少思服海石瓜蒌之類不應曰此脾氣虛弱不能消導而爲痰當健脾爲主彼不信又服驅逐之劑其痰如漏四肢浮腫小腹腫脹小便瀉滯曰此復損脾腎所致也先用金匱加減腎氣丸補中益氣湯治之諸症漸減又用八味九兼前湯而愈

一男子素吐痰遇怒其痰益甚胸膈痞滿此肝木制脾土也  
用六君子湯加木香治而愈

一婦人吐痰頭暈帶下青黃用四七湯送白丸子小柴胡加白朮茯苓治之而安

舊僚錢可久素善飲面赤痰盛大便不實薛以爲胃痰焦帶  
用二陳芥苈連山梔枳實乾薑澤瀉升麻一劑吐痰甚多  
大便始實此後日以黃連三錢泡湯飲之而安

一婦咳嗽其痰上壅日去五六碗作氣虛水泛爲痰用六味  
丸料及四君子各一劑而愈

陳三農治一人痰出盈盆不止脈豁大無力此內傷不足之  
症用人參附子各五錢乾薑葶撥枳榔枳壳一劑而愈

一人滿口痰珠至舌尖則成大泡綿綿不絕此火熱在胃大  
寒在肺也肺與胃息息相通斷無胃熱而肺反寒之理  
矣且試觀其用藥殆胃熱輕而肺寒重耳用

參附湯保定肺氣後砂仁益元散散瀉胃火而安

一人痰涎壅盛汗出不止此脾虛不能攝痰而肺失所養切不可作痰治只補脾胃爲主用參朮煨薑各二錢半夏一錢煎服愈

陸養愚治董潯陽夫人稟氣怯弱性情況鬱年三十得一病晚間發熱天明始止飲食漸減煩躁不安初服補血養陰年餘轉羸瘦又服參耆補氣不效醫謂脈已歇止恐不能久診之右手果然左手但微弱而數詢其月事則先期而少曰先期是血熱應左手之數少是血虛應左脈之微脈脈相應右手歇止此必鬱痰伏在氣分故脈結不至非死脈也第發熱必有所起之處令詢之則曰右脇一團熱起



漸延遍身。再問熱起處。必有結而成形者。按之果有柔塊。如碗狀。曰不足憂也。攻去其塊。諸症自愈矣。爲製一方。香附一斤。醋製。與巴豆一兩。同炒。至巴豆黑色去之。醋打麩糊爲丸。梧子大米飲下五十九。日三服。又用四物湯加山梔貝母白蔻仁木香薑棗煎。日一劑。半月塊消。肌肉漸長。一月精神爽健矣。

陸肖愚治李安吾正室不育及納妾則俱孕生子出痘正者死而妾者生悲愁彌月。遂胸脇脹痛。每臥必令人於背上搥之。良久方得就枕。片時臥不能仰。仰則氣涌而喘。食減肌消。月事數月不行。脈之寸沉而數。關沉而滑。尺沉而弱。

脈與病應。此鬱火成痰之症也。用調氣養榮湯加白芥子。倍震天麩。數劑胸脇少舒。可仰臥矣。第大便五日不行。小腹脹急。與滾痰丸二錢。又慮元氣不足。改用補氣養榮湯二劑。大便去燥矢數枚。後出皆痰積。脹痛減後。與補藥間服月餘而安。

吳遜齋體肥。素有酒積。胃腕作疼。近又肢節疼而下體更甚。或以爲風用史國公酒酒療之。時作時止。改用虎潛河車等丸。則疼處且腫。脈之六部皆緩滑。而關稍帶弦。此濕痰流注關節而痛。非風亦非虛也。治法宜先用丸劑。清中宮之積痰。繼用煎劑。疎筋絡之壅滯。則肢節之痛除。而胃腕

之疾亦愈矣。依法服之果然。丸方：霞天麴、山查、橘紅、白朮、茯苓、枳實、神麴、竹瀝。打糊爲丸。食遠白湯送下。煎方：蒼朮、苡仁、半夏、南星、白芥子、威靈仙、秦艽、炙甘草、青木香。煎成入酒一小杯。半飽時服。

潘元石怒後縱飲，遂患吐逆，飲食半留半出。甚則嘔物如褐，色胸脇脹痛徹背，或以翻胃治之。反潮熱煩燥，又以肺癰治之。飲食減而嘔脹益甚，或見吐出之物，謂肺爛矣。診之見其肌肉未消，聲音不改，兩寸滑數。左關弦，右關滑。兩尺寸平。曰：此非肺壞也。第爲鬱怒所致耳。怒則血菀於上，與痰膠結，濁陰不降，而臏脹生焉。法當涌之。用常山五錢，紅

花五錢。酒二碗煎一碗。令通口服之一涌。而出初見褐色痰塊。後多紫黑。約有盆餘。胸膈頓寬。背亦不痛。不作嘔矣。再以清氣養榮湯調。

陸祖愚治沈振宇妾患鬱痰鬱火症。醫咸謂不起矣。診之形容枯槁。咳咯涎沫。六脈沉滯。隱隱似有似無。重按至骨。或有力。或無根。或遲或數。已飲食不進。似胃氣將絕者。但自能起坐。聲音嚮亮。知爲痰涎壅隔。血氣凝塞。故脈亦不流通耳。用二陳加寇仁蘇子黃連白芥子貝母石菖蒲等味。一劑未效。再診聞病人喜聞爆竹硝黃之氣。遂於前方加薑汁竹瀝。每劑入牛黃半分調服。症脈漸起。再與加減。五

六日後進蘇合丸一丸。能飲粥。再與六君子加減調理。月餘而安。

李江州因下第歸。飲食不思。精神倦困。醫謂遠歸久曠。投以補劑。胸膈痞塞。大便艱難。不寐。又與養血安神。煩躁而小。腹脹滿。診之見其面容昏滯。六脈沉滑。乃以枳實黃連瓜。萸陳皮貝母檳榔元明粉。兼服潤字丸三錢。半日未應。又以前丸二錢催之。良久腹中鳴。轉下矢氣。去稠黏臭穢。五色錯雜。約半桶頓快。繼以前湯丸少少與之。兩三日間糞微黃。改用參朮歸芍健脾養血調理而安。

費表嫂患胸之下臍之上溫溫作痛。可揉可按。凡溫中消導。

清火。歷試不效。胗之六脈沉弦而滑。以痰治之。數劑而痛止。精神未復。而勞於女工。且患血崩。食入不化。遷移數日。胸腹腫脹。其熱如火。湯藥難投。致呻吟不絕。人事不省。脈之寸關沉伏不見。而尺尚沉滑有神。曰。以沉痰之爲崇也。元氣雖弱。痰結不得不通。徐靈胎謂人虛症實。不必顧忌。但急去其實。則精神自復。此類是也。用滾痰丸徐徐投之。至半夜胸前隱隱有聲。五更下稠痰盆許。神氣頓蘇。胸膈少利。再以養榮合二陳調理半月而愈。

張宇清少時體羸多病。專主溫補。病愈而火症時發。乃滋水制火。其疾如失。六味之力也。迨壯年肥盛。濕痰醞釀於中。

仍滋陰不徹六旬外痰症陡發復以六味加二母歸芍麥  
冬服後痰涎壅塞四肢厥冷口開眼合人事昏沉胗之六  
脈洪滑而數遂用加味導痰湯繼之蘇合丸兩劑纔覺精  
神清問用何藥以前方告乃怒曰我生平最忌燥劑豈可  
服此今後斷不可用乃即心知父之非非每日以地黃湯  
一劑與驗過暗以導痰之藥以進病愈後洞悉前情不勝  
歉仄

孫文垣治李古愚每食後即大便腹皮稍脹急胸膈飽悶服  
參朮則痞悶愈甚小水清長脈之左寸瀼右寸滑按之如  
黃豆大且鼓指關尺皆弦小左寸迢迢有神據脈乃積痰

鬱於肺而莫能出。以致大便之氣不固也。當效丹溪治乃  
叔用吐法吐去上焦痰積。大便自實矣。先用苦梗蘿蔔子  
各三錢。白豆仁橘紅山梔各一錢。以川芎五分生薑三片  
葱三根水煎服之。取吐服半時許。吐出清痰。惡心未已。乃  
痰積膠固。未易出也。又用蘿蔔一合搗漿水。加蜂蜜。與半  
碗飲之。始吐膠痰二碗許。平日每小水則大便並行。吐後  
小水始能單去。連三四次。胸腹寬舒。初亦以吐爲懼。至是  
豁然稱快。大便五日一行。再以二陳加白朮旋覆花麥芽  
調理全愈。

李士材治章給諫暑月心中大痛。醫與香薷飲痛轉增。而寸



口弦急。此痰食交結也。服砂仁二陳二劑。痛雖畧減。而困苦煩悶。更以胃苓湯加半夏二錢。大黃三錢。下黑矢數枚。痛減三四。仍以前湯用大黃四錢。下膠痰十餘碗始安。

徐主政勞且怒後。神氣昏倦。汗出如浴。語言錯亂。危困之極。脈大而滑且軟。此氣虛有痰也。用補中益氣湯料併四劑。爲一劑。用參至一兩。加熟附子一錢。熟半夏三錢。四日稍甦。更以六君加薑汁一鐘。服數日。兼進八味丸。兩月而安。王郡侯患痰嗽。輒服清氣化痰丸。漸至氣促不能食。李曰。高年脾土不足。故有是症。若服前丸。則脾土益弱矣。投以六君子湯。加煨薑三錢。益智仁一錢五分。十劑而痰清。更以

前方煉蜜爲丸約服一斤飲食乃進

朱文學遍體如蟲螫口舌糜爛朝起必見二鬼執盤食以獻  
向李泣曰某年未三十高堂有垂白之親二鬼旦暮相侵  
必無生理胗其寸脈乍大乍小意其爲鬼祟細察兩關弦  
滑且大遂斷以痰投滾痰三錢雖微有所下而病患如  
舊更以小胃丹二錢與之復下痰積及水十餘碗遍體之  
痛減半至未明早鬼亦不見矣更以人參三錢朮二錢煎  
湯服小胃丹三錢大瀉十餘行約二十碗許病若失矣乃  
以六君子爲丸服四斤而愈

張路玉治一燕人體肥痰盛善肉善飲患痰鳴喘嗽數年食

傷恒發發則六脈遲滑時見歇止聲如拽鋸遍地皆痰每

歲或一二發或三五發深初初冬尤甚遂用倒倉法此亦可用

滾痰丸治之倒倉法未可輕試也自言肢體皆輕症遂愈二年後因不禁

牛肉復發然其勢較前不過十一是亦不慎口腹所致耳

郭邑侯夫人素有敗痰失道左右兩脇俱有結塊大如覆杯

發則咳嗽喘逆腹脇掣痛六脈至促按之少力用六君子

湯加膽星枳實香附沉香二劑服之大吐稠痰結垢一二

升因嘔勢太甚促往診之至則嘔吐已甯脈息調勻不必

更藥矣

黃履素曰立齋治痰每言腎虛水泛爲痰法當補腎予壬申

秋咳嗽多痰自知因於色遵先生法恪服六味丸更不治  
痰嗽月餘竟愈時師治痰最忌用熟地以爲膩膈是烏知  
箇中妙理哉

龔子才治周藩海生陽生患痰嗽喘熱左足腫痛日輕夜重  
每年發一二次已三十年遍治勿效診之左微數右弦數  
此血虛有濕痰也以四物湯加蒼朮黃柏木瓜檳榔木通  
澤瀉空心服以治下元茯苓補心湯臥時服以治上焦各  
三服而愈後以神仙飛步丸空心服清氣化痰丸臨臥服  
各一料全愈

張三錫治一中年婦每夜發熱天明方止症兼惡心不食肢

倦且云體素肥、今漸消瘦、因憶古人有言、昔肥而今瘦者、痰也、痰滯中宮、阻礙升降、宜乎不食、且作惡心、痞悶、血無所滋、因而不足、故夜熱、乃以二陳治痰、參補其中氣、枳實麥芽寬中、香附炒、梔子清火、柴胡退熱、凡二十劑、間服橘半枳朮丸、一月愈、後進人參湯、體漸復舊。

一人素肥盛、半年漸瘦、兩膝與背互痛、兩尺沉滑、古人有言、昔肥而今瘦者、痰也、遂以加減豁痰湯、連進數服、一日食後、偶作惡心、乃以瓜蒂散一錢投之、吐稠痰半升而愈。

朱丹溪治一人、項強痛不可忍、不可以回顧、作痰客太陽經

之症、治之用二陳湯加酒芩、姜活、紅花、服後二日而愈。

張路玉治吳別駕夫人患痞眩嘔逆向因下體畏寒肢體麻木久服八味參附不徹六脈弦滑按之則濡此中焦素蘊痰濕陽氣不能周於四末之象得桂附辛熱之力有時雖可暫開究非真陽之虛且有地黃之滯所以痞暈漫無止期遂與局方七氣加沉香一服豁然再劑神爽食進而安薛立齋治一儒者脾腎素虛而有痰或用導之之法痰甚作渴頭暈煩熱謂中氣虛弱而變症用補中益氣湯而愈後勞役發熱此氣虛不能上升也用前湯加蔓荊子而愈後又勞神畏見風四肢逆冷口淡痰多此脾氣虛寒真病以六君子加炮姜肉桂而愈

一男子素腎氣虛而咳痰亦用導痰之法虛症悉具痰涎土  
涌小便頻數謂足三陰虛而復損也朝用補養脾氣湯培  
養脾肺之虛氣夕用六味丸加五味子收斂耗散之精而  
愈

大尹陳克明導痰後痰益多大便不實喜極熱飲食手足逆  
冷謂命門火衰而脾肺虛寒不能攝涎歸源用六味丸而  
愈

進士張禹功飲食停滯胸滿吐痰或用藥導之痰上上涌眩  
暈熱渴大便秘結喜冷飲食手足發熱謂腎水虛弱津液  
難降敗液爲痰用六味丸而愈

儒者楊文魁素唾痰諸藥不應服牛黃清心丸吐痰甚多或頭或熱從脇起左脈洪大有力右脈浮大而無力薛曰此三陰虧損火不能歸源用補中益氣加麥冬五味及加減八味丸補其化源而愈。

秋官張碧崖面赤作渴痰甚頭暈此腎虛水泛爲痰用地黃

丸而愈。

雄按三陰虧損補中益氣湯何得浪施

儀制賀朝卿吞酸胸滿痰盛作瀉飲食少思用清氣化痰等藥前症益甚兩膝漸腫寒熱往來謂脾胃虛濕熱下注用補中益氣倍參朮加茯苓半夏炮姜而愈。

考功楊林蒼嘔吐痰涎胸腹脹痛飲食少思左關脈弦長按



之微弱。此木剋土。用六君子加柴胡山梔木香而愈。

二守陳子忠飲食少思吐痰口乾常服二陳枳實黃連之類脾胃受傷乃問於薛薛述東垣先生云脾胃之症實則枳實黃連瀉之虛則白朮陳皮補之彼遂以二味等分爲丸常服由是多食而不傷過時而不饑。

趙以德云予近治一男子肩井後腫痛身熱且嗽其腫按之不堅此乃酒痰流結者遂用南星半夏瓜蒌根芩連竹瀝作煎飲燒葱根敷腫處另用芥子白礬作小丸就煎藥吞二十九服後痰隨嗽出半日約去三四碗病即愈。

全上

羅成之既得丹溪之學歸隱崇明三沙張太尉士誠患痰疾

氣怔忡諸名醫治療不效。迎成之胗之主以倒倉法張卒  
用其方。諸病悉除。賜勞甚厚。醫史全上

陸愚愚治孫景陽室年近五旬向患痰火發則頭空眩暈飲  
食減少旋發旋愈蓋有年矣近發轉甚將及月餘診之六  
脈洪滑而數按之無力肢冷面赤肌肉黃瘦不時眩暈甚  
則昏不知人水穀不進其似不可攻然其脈來有神當棄  
症憑脈乃用枳實瓜蒌胆星貝母芩連橘紅牙皂入姜汁  
竹瀝服之吐痰數碗四肢漸溫再用川牛黃五分配以蠟  
丸頓服三丸徐徐頻飲竹瀝催之腹響後服潤字丸三錢  
便垢穢若干病頓減後以清火消痰健脾養血調理而安。

吳淑止室。軀體壯盛。自來有痰。初出口時稀白。澄清唾地。良  
久反極稠膩。過勞卽眩暈昏冒。近則兩三日一發。始則叫  
號。旣而昏憤。角弓反張。食頃乃甦。四肢厥冷。胸腹滿硬。六  
脈如細。而且澀。以爲寒痰凝滯中焦。用二陳導痰湯。半夏  
與四五錢。服後一夜不安。痰壅愈甚。口舌燥渴。因想脈症  
不同。此當棄脈從症。改用貝母芩連桔梗花粉前胡胆星  
瓜蒌竹瀝姜汁煎湯。吞潤字丸五分。數服後胸膈柔軟。昏  
暈已除。大便數日不行。用滾痰丸三錢。不應。又以潤字丸  
三四錢。催之。始得更衣。症減半。兩日後遂晡熱唇紅面赤。  
乾唾無痰。胸膈不暢。竟似弱症。乃清晨服丸藥。生地麥冬。

銀柴胡黃連知母鼈甲秋石歸芍杜仲食後服煎藥半貝  
母黃連查橘枳朮前胡花粉白蔻仁如是出入增損養血  
順氣清火消痰兩月全愈。

薛立齋治一男子素耽厚味胸滿痰盛此膏粱之人內多積  
熱與法製清氣化痰丸而愈彼以爲有驗修合餽送脾胃  
虛者無不受害

一婦人元氣素弱痰氣時作或咽間不利或胸痞等症以爲  
鬱結傷脾以加味歸脾湯治之而愈後遇大怒前症仍作  
惑於衆言以爲痰飲妄用祛痰之劑吐瀉數次變諸異症  
口噤不省薛以爲脾胃復傷日用六君子一劑米飲濃煎

常服匙許。至四日漸進粥食。乃服前藥。問以歸脾和其胃  
調養兩月餘。諸症悉愈。

傳青主治一老人患痰涌喉間。氣不得出入其間。具棺待殮。

先生胗之曰。不死令搗蒜灌之。吐痰數升而甦。劉紹攷九疇古文

王肯堂曰。予初喜唾痰愈唾愈多。已而戒之。喉間梗梗不可

耐。輒呷白礬湯數口。咯入口中。用舌攪研令碎。因之而嗽

之百餘。津液滿口。卽從鼻中吸氣。嚥下以意送至丹田。默

存少頃。咽間清泰。如未清再嗽再嚥。以化盡爲度。方咯出

時其味甚鹹。漱久則甘。世人乃謂痰濁之物無澄而復清

之理。何其謬哉。吾嘗渡河見舟人掬濁水而入之甕。糝入

礬末數分。卽時澄清。此可悟治痰之法也。

丹月賀魯菴年七十餘。膈間有不快。飲食少思。初無大害。就醫京口。投以越鞠丸。清氣化痰丸。胸次少寬。日日吞之。遂不輟口。年餘困頓不堪。僦舟來訪。問脈於王。則大肉已脫。兩手脈如遊絲。太谿絕不至矣。見王有難色。因曰。吾亦自問必死。但膈滿太甚。大便秘結不通。殊以爲苦。但得少寬。卽瞑目無憾也。因求王疏方。以至親難辭。教用人參白朮之類。大劑進之。少竟如廁。下積痰升餘。胸膈少寬矣。更數日而歿。蓋時二方。乃時師常用之物。本欲舒鬱。適增其痞。本欲清痰。適速其斃。豈可恃哉。

薛立齋治一人胃弱痰盛口舌生瘡彼食滾痰丸愈盛反瀉不止惡食倦怠此胃氣受傷也以香砂六君子湯數劑少可再以補中益氣湯加茯苓半夏二十餘劑而愈夫胃氣不足飲食不化亦能爲痰補中益氣乃治痰之法也苟虛症而用峻利之劑鮮不危矣。

施沛然治莫進士公謨患咳嗽日吐痰數盃形體瘦削僉曰火症純用柔劑診之曰此肝木乘脾也脈浮而關弦面黃而鼻青補之則瀉瀉之則劇用六君子加炒芍姜汁製連二劑不信仍用山梔黃柏之類更教以豬首佐饗飧施曰三日大瀉絕粒奈何經曰陰劑柔勝積凝爲洞泄寒中之

屬則真火微而榮衛至。三日後大瀉脈脫鼻息如冰口不能言。彼醫曰脈脫矣。大勢其在今日乎。急投附子。或可救也。曰無庸。昨梔柏而今附子烏附。何冰炭反掌耶。寒涼過劑。脾氣大傷。食復滯之。按之則楚。先取山查作液少服。旋進獨參湯。

沈明生治玉峯李坡侯之恙也。病萌於己亥夏風鶴之驚。至九月間夜讀忽覺神思昏沉。中心若墜。嗣後怔忡不已。一友見其素稟清弱。勤於鉛槧。虛症昭然。勸令服參。越兩月困怠轉加。眩暈特甚。則以參少力薄。故益至五錢。一劑約三四兩。後見病日深。輟參勿服。歷扣醫家。或以爲陰火亢



盛當成勞瘵者。或謂其冬得春脈。當其時不能再見者。或  
斷之終至癩癩者。醫更藥雜。歲將暮矣。延胗曰。從前所議  
皆不悞也。所以不卽愈者。未治痰也。今當耑事豁痰。徐議  
其虛可耳。遂用二陳湯加鈎藤。菖蒲等味。漸進煎劑。書一  
案云。思慮傷神。痰乘包絡。以致虛靈之宰。不獲自持。時覺  
心繞千絲。時覺腹無一物。獨處則萬緒紛紜。臨事則五色  
眩瞽。痰上逆也。痰爲火擾。夜臥難甯。痰助陽明。多食不飽。  
流於精道。則夢失。見之脈候。則滑弦。治宜先標後本。驅其  
壅閉。俾神明之官。仍安厥位。繼以補血養心。庶滋潤之品。  
不致泥膈。而餘疴不治自愈矣。歸至甯神至寶丹一料送。

服入春全愈。

錢國賓治無錫劉元女咳嗽吐痰氣短經閉骨瘦如柴但不  
夜熱以新壻不相顧病益劇劉延診以決死生六脈結滯  
或五七至中一止十餘至中一止兩更實實凡勞症脈當  
芤細弦牢短促今見痰脈非勞脈也以導痰湯枳實半夏  
胆星蒼朮茯苓陳皮白芥子各一錢甘草三分加熟大黃  
二錢二三劑下痰少許身體困極以參湯調理漸安令服  
八珍湯而愈

劉雲密曰愚於戊戌歲冬深終之氣主氣寒水既與司天相  
合而客濕土又與在泉相合更加於主氣寒水之上其病

於陽氣甚矣。氣乃肺主之。故肺易受寒邪。既病於主氣之  
肺。陽陽氣益不得施化。而水中之陽化更微。致濕淫滋患。  
故濕痰生聚於胃而不行。是濕痰愈覆其陽。則肺生鬱熱。  
遂口舌爲燥。而肺所治之上焦亦俱不爽。且移於所合之  
大腸而化風矣。治之者宜麻黃杏仁輩以散寒。炒乾姜製  
白朮以除濕。第所鬱之火。驟以姜朮投之。適益其勢耳。乃  
散寒以麻杏。而除濕暫用二陳。加南星乃入蛤粉於中。以  
鎮陰潛而散陽鬱。其痰漸化而熱亦行。徐以乾姜白朮輩  
理中。乃得全愈。

# 飲

孫兆治俞伯道、忽患微熱、心中滿、頭有汗、不能解、眾醫以爲濕病、用表藥、有謂食在膈者、治之皆不效、召孫至、曰、用半夏茯苓湯、遂瘥、眾問故、曰、頭有汗、心下滿、非濕症、乃水結胸膈也。水既去、其病乃愈。且如濕氣、心下滿、自當遍身汗。若有食心滿、頭豈得有汗。若言是表、身又不疼、不惡寒、表症何在。故凡水結胸膈、脇頭必有汗耳。

雄按此案已列卷一傷寒門

張子和曰、有一婦人、年三十餘、病滑泄、經年、皆云虛中有積、以無憂散、五七日一服、至二十服不效、又服纏積丹、軟金

丹丸諸藥皆不效其人服藥愈速病勢愈甚飲食日減人或謂曰此休息痢也宜灸中腕及左右穴也下氣海及膀胱穴以三里引之每年當冬至日夏至日灸之前後計萬餘壯忽門外或者曰此病我屢識蓋傷飲之故即日桃花正開俟其落時以長棘針刺之得數十莖勿犯人手以白麵和作餅子文武火燒令熟嚼爛以米飲湯下之病人如言服之不一二時瀉如傾前後六七日計數十行昏困無所知覺惟索冷水徐徐而飲至六七日少省後食日進神日昌氣血日和。不數年生二子。

子和治郭敬之留飲。面目浮腫。不能食。脚腫連腎囊痛。先以

苦劑涌之後以舟車丸濬川散瀉之病去如拾遺又一田  
叟姓楊其病嘔酸臭水十餘年本留飲諸醫皆以燥劑燥  
之中腕臍所以火艾燔針刺之瘡未嘗合張以苦劑越之  
其涎如膠乃出二三升談笑而愈

李七老病涌水症面黃而喘兩皆腫按之陷而復起行則濯  
濯有聲常欲飲水不能睡臥張令上涌去痰而汗之次以  
舟車丸濬川散下之以益腎散復下之以分陰陽利水道  
之劑調之水盡瘥

一婦從少年時因大哭罷飲冰困臥水停心下漸發痛悶咸  
以爲冷積治以溫熱之劑及禁食冷物一聞茶氣病輒內

續香齋醫案卷十一  
三  
作如此數年、燎灸燒艾瘡孔數十、餘年後小大便秘悶、  
兩目如昏、積水轉甚、流於兩脇、世謂水癖、或謂支飲、硃漆  
稜莪攻磨之藥、竟施之矣、食日衰、積日茂、上至鳩尾、旁至  
兩脇及臍下、但發之時、按之如水聲、心腹結硬、手不可近  
者、月發五次、甚則欲死、已二十餘年、張診其脈、寸口獨沉  
而遲、此胸中有痰、先以瓜蒂散涌痰五七升、不數日再越  
痰水及斗、又數日上涌數升、凡三涌三下、汗如水者亦三、  
其積皆去、以流濕飲調之、月餘大瘥、

中丞常子正苦痰飲、每食飽、或陰晴節變、率十日一發、頭痛  
背寒、嘔吐酸汁、卽數日伏枕不食、服藥罔效、宣和初爲順

昌司錄於太守蔡達道席上得吳仙丹方服之遂不再作  
每遇飲食過多腹覺滿脹服五七十九便已少頃小便作  
茱萸氣酒飲皆隨小水而去前後痰藥甚眾無及此者用  
茱萸湯泡七次挾芥等分爲末煉蜜丸梧子大每熱水下

五十九其效如神

朱氏集驗方  
本草綱目

陸養愚治施南石二十九歲患晡熱至天明方退夜熱尤甚

咳嗽無痰咳則痛引胸脇熱甚則咳亦甚咳甚則痛亦甚  
初服芎蘇散喘急殊甚易以前胡杏仁桑皮蘇子輩亦不  
效後以陰虛治之二冬二母服數月飲食漸減肌肉羸瘦  
或謂勞瘵已成不可療矣最後一醫診得脈弦數左關尤



甚此肝火也。用柴胡、青皮、黃連、赤芍、山梔、白芥子數劑亦無驗。於是苦於藥餌。不延醫。二二月診之。大脈沉數而滑。右關尺更有力。其脇痛若從右而應乎左。因思仲景云。飲在脇下。咳則引痛。謂之懸飲。今咳痛明是其症。第十棗湯非常用之方。且病人狼狽已極。亦必不肯服。乃以潤字丸料加入甘遂和丸。令一二分一服。日二服。每日加一分。加至五分一服。使便出稠痰碗許。中有一塊。半碗半軟如雞子。大脇痛如失。熱嗽減之十之六七。又用人參、白朮、歸芍、茯苓、貝母、甘草作煎劑。與丸藥間服。丸藥仍減一分。直待便中無痰始止。丸藥用前煎藥日一帖。調月餘全安。

雄案  
體虛

病實深得緩攻之法迫衰其半又合寓攻于道補之道

陳三農治一婦患眩暈腰痛過寅卯二時則日夜昏迷不省人事身如在浮雲中脈細數弦滑細爲濕數爲熱弦爲飲濕熱痰飲留滯胸膈隨氣升降上涌則爲眩暈下墜則爲腰痛痰飲沃心包致竅不通故昏不省人事至巳午時心火助其濕熱鼓擊痰涎故昏痴益甚也此必痛飲所至卯之果然遂以稀涎散涌酸臭痰數升仍以舟車丸泄如漏屋水者五六次諸症均愈

一貴婦患溢飲遍身虛腫用金沸草散一劑汗出腫減繼以澤瀉湯加枳實旋覆花前胡四劑而安

一婦患時疫飲水過多胸膈堅痞咳逆倚息短氣不臥湯飲入而吐出諸藥罔效作停飲治以五苓散一劑愈

一婦患霍亂飲陰陽水左腹堅硬痛極作留飲治以半夏旋覆花各三錢澤瀉青皮枳實白朮乾姜各一錢吳茱萸二分一劑愈

李士材治秦景明素有痰飲每歲必四五發發卽嘔吐不能食此病久結成窠囊非大涌之弗愈也須先進補中益氣十日後以瓜蒂頻投投涌如赤豆沙者數升已而復得水晶色者升許如是者七補之七涌之百日而窠囊始盡崑崙服六君子八味丸經年不輟

吳孚先治西商王某。氣體甚厚，病留飲，得利反快，心下積堅，滿鼻色鮮明，脈沉。此留飲欲去而不能盡去也。用甘遂、甘草半夏、白芍加白蜜五匙頓服。前症悉痊。或問甘遂與甘草其性相反，用之無害而反奏效，何也？曰：正取其性之相反，使自相攻擊，以成疏瀹決排之功。西人賦性厚，尤當用之。

張景岳尊人早年善飲，後及四旬，遂得痰飲之疾，嘔酸脹滿，飲食日減，眩暈不支，驚惕恍惚，痰癰等症，相繼迭出。百方治痰無效，因慕張子和吐法之妙，遵而用之。初用獨聖散，茶調散及藿汁之類，一吐稍效，再吐再效。自此屢用不止，雖諸症漸退，而元氣勿復也。如此年餘，漸覺純熟，忽悟其

理遂全不用藥。但於五鼓睡醒時。仰臥用噯提氣。氣有不  
充。則噯氣爲噯。隨噯隨提。痰涎必隨氣至。雖最深之痰。無  
不可取。其最後出者。形色臭味紫氣酸惡。不堪言狀。每吐  
後。或至唇咽腫痛。但以涼水一二口漱。噯解之。吐畢早膳。  
用屏五味。用薄粥一二碗。以養胃氣。自四旬後。絕不用酒。  
行吐法四十餘年。自六旬外。則一月或半月。必行一次。凡  
吐後神氣必倍旺。陽道必勃然。一切內傷外感。無不盡却。  
蓋道用督。此則用任。所用不同。所歸一也。不惟却病。而且  
延年。後至八旬外。猶能登山。及燈下抄錄古書。無病而卒。  
葉天士曰。按張子和儒門事親云。凡人之病。自外而入。由  
內而起。皆邪氣也。邪氣加諸身。速攻之可也。及其聞攻。則

不悅聞補則樂之至於無邪無積之人始可議補有邪有積而議補者如鯀湮洪水之徒也故立汗吐下三法以去病病在表者汗之在上者吐之在下者下之以病去爲先病去之後以穀肉果菜補之非藥補也景岳言子和吐法之妙不知汗下之法更妙然以法惟在上者吐之非一概可吐也又有補論一篇甚言誤補之害惟庸醫治病純講補其虛不敢治其實世人皆以爲平穩而自誤景岳但見其吐法不見其補論一篇乎子和之學亦宗河間與東垣丹溪並傳大用寒涼攻擊以治病毫不補以補之適足爲害也景岳重子和而毀河間丹溪豈子和另有溫補之書抑不敢議其非歟

張三錫治一人肩背與膝相引而痛寸脈弦知痰飲爲患也投小胃丹一服吐痰半升間日再進一服瀉痰小有如膠者一升許病良已

張子和治一人病留飲者數十年不愈診之左寸脈三部皆

微而小。右手脈三部皆滑而大。微小爲寒。滑大爲燥。以瓜蒂散涌其寒痰數升。汗出如沃。次以導水禹功去腸中燥垢亦數升。其人半愈。然後以痰劑流其餘蘊。以降火之劑開其胃口。不踰月愈。

朱丹溪治一人。素耽於酒。患遍身關節腫痛。此愈彼劇。胸膈不寬。此酒濕症。痰飲在胃。流注經絡。卽流飲症也。用二陳湯加酒苓、蒼朮、姜活、威靈仙、澤瀉、倍葛根而愈。

許叔微自患飲癖三十年。始因少年夜坐寫文。左向伏几。是以飲食多墜左邊。中夜必飲酒數盃。又向左臥。壯時不覺。三五年後。覺酒從左下有聲。脇痛食減。嘈雜飲酒半盞卽

止十數日必嘔酸水數升。暑月止右邊有汗，左邊絕無。遍訪名醫及海上方，間或中病愈，得月餘復作。其補如天雄、附子、礬石、利如、牽牛、甘遂、大戟，備嘗之矣。自揣必有澼囊如水之有科，曰不盈科不行。但清者可行，而濁者停滯無路以決之。故積至五七日必嘔而去。脾土惡濕，而水則不流。莫若燥脾以去濕。崇土以填科，曰乃製蒼朮丸。服三月而疾除。蒼朮一斤，去皮切片，末之。用白芝、蔴半兩，水盞研瀘取汁。大棗十五枚，爛煮去皮核，以蔴汁勻研成稀膏，搜和入白熟杵丸。如桐子大，乾之。每日空腹溫湯吞下五十丸。加至百丸。忌桃李雀鴿。初服時必膈微燥，且以茅朮製。



之覺燥甚卽進山梔散一服久之則不燥也。山梔散用山  
梔一味乾之爲末沸湯點服。

馬元儀治沈表姪因悲哀勞役面色枯白形體憔悴右脇有  
塊凝結作痛痛則嘔手足厥逆飲食不思大便時澹時結  
吐出痰飲動輒盈盆或一日一發或間日一發苦楚萬狀  
診其脈左三部弦而勁急右三部虛微無力方用附子理  
中加桂湯稍安。越三日又發與前方不應乃倍加附子甚  
安。後復發前方又不應因思仲景傷寒治法有用真武湯  
一法原以真火飛越水氣上逆故用此以復陽收陰坐鎮  
少陰北方之位。究其功用全在行水醒脾之妙。今因勞鬱

所傷中氣損甚由是所勝之木乘脾所不勝之水侮之而逆。木橫則痞結作嘔。水逆則痰飲泛溢。若非真武何以攝元陽而鎮陰邪耶。遂用此方倍加分兩。多人參。連進三十餘劑。嘔漸已。痰漸少。令早服八味丸。晚服附桂理中丸。調理諸症悉愈。惟結塊不除。則以久積陰寒難解。恐成痼疾也。用真武湯甚合法而多加人參未免又沿俗蓋參性膩滯最不宜於飲症也。此症元氣復後卽宜間用攻劑以盡根株。徒事溫補安能望結塊之去耶。

繆仲淳治丹陽葛文學。字十內人。因作家勞鬱。患飲每每發。嘔吐不已。腸如欲出。所吐俱清水。動以盆桶。計日夜不止。不思飲食。就醫金壇諸醫。以健脾行氣。理鬱清痰藥投之。

愈劇困頓待斃計無復之矣。繆視脈審病。知為飲無疑。乃

用姜製半夏四兩。廣皮四兩。茯苓四兩。豬苓二兩。澤瀉米

泔浸炒二兩。旋覆花三兩。厚朴姜汁炒一兩。五錢。白朮二

兩。枳實麩炒一兩。川連一兩。木香五錢。加入參一兩。三錢。

一劑吐止。再劑霍然。隨啖粥糜。脾氣漸復。至今每病作檢

方服之即平。此丸方也用稀米糊加姜汁和丸如綠豆大。每服五錢。淡姜湯下。如作煎劑取二十倍中。

一倍加白蔻仁。木香。香汁。姜汁。和服。因寒濕者加蒼朮二兩。木香五錢。白豆蔻五錢。因鬱者加紫蘇四錢。去蒼朮。

雲間康孟修患寒熱不食久之勢甚危以治寒熱劑投不應

徧檢方書與王宇泰議投五飲丸立瘥蓋飲症原有作寒

熱之條故治飲病自退矣。廣筆記

吳橋治汪錢始壯輒患嘔逆胸膈痛諸醫悉以膈治骨立而  
羸久之隨絕而汗如流水漿不能入口診其脈卽浮濡不  
任按無他端曰此停飲爾悞以膈治病者心悸則氣瀆於  
胸中血從氣行氣阻則血亦阻矣此二缶撞鐘惑也第先  
屏二缶然後治之瘀血當下病者憮然爲間曰敬如公言  
遂修行氣一劑飲之飲未畢而痛止徐下黑糞瘀血畢病

乃平

太函集

程氏有少婦病小腹痛吐痰多嘔清水發熱泄瀉肌削而屏  
饗殮六脈沉細弦數曰此積飲也法當發其積而病可除  
第病久而屏伐無太過劑以和中去濕小腹大痛而昏旣

則嘔吐盈盆沈沈皆綠水。眾異曰何爲有此。橋曰吾固以爲濕也。也。地下濕則生苔。其綠同。尋無恙。上全

羅練年近壯病中腕疼痛連背脇及心間吐清水久之痛甚如剗刀人事昏昏族醫技窮謂六脈絕矣橋後至則曰停飲也痛甚故脈伏非絕也遂以溫補之劑投之一服而脈

見再服而愈。太函集

徐靈胎曰凡病必有邪。如人病湯水下咽少頃卽傾囊湧出者此乃胃中積水寒飲故食入卽拒法當扶陽滌飲驅開寒邪然後補其中氣亦必兼滌飲之藥不可竟用參朮補佳寒飲若無邪而現症若此乃胃絕之徵亦不必治矣洞

廷一金姓者患嘔吐症其先人與葉氏甚相契葉氏竭力治之年餘而病者幾殆因求治於余余曰蓄飲也世無知者爲製一方其病立已其人因受業於余

# 吞酸餽雜

潘墳曰余昔年脾胃受病每日申未時飯至二鼓食消方寢夜半睡醒噯氣吞酸糟粕乘氣浮上起坐摩娑久之復寢漫服枳朮平胃散或分消或疏導久不效自思年六旬外恐脾胃弱不能運化却去晚餐凡黏硬果物及濕熱酒麪一切不入口不知何以致此因讀東垣脾胃瀉論乃知陽

氣下陷陰火上衝脾胃不實故耳。得一方曰補脾胃瀉陰火升陽湯藥品主佐在本方。并服藥時日所宜所忌切中病情。又讀調理脾胃治驗。謂不可用淡滲之劑。抑遏陽氣。反助陰邪。必加升陽風藥。以姜獨活升麻防風炙甘草根。截入煎藥。水煎服。乃依方服之。片時後陽氣縷縷而上。不數日陰火漸伏。脾胃實而愈。

高鼓峯治杭人沈孟嘉妻患吞酸膈痛。屢年矣。肌肉枯削。幾於絕粒。診之六脈細數。此木乘脾土也。先投六君子湯加炮姜十餘劑。覺吞酸減半。繼用補中益氣湯加半夏炮姜十餘劑。而吞酸盡去。膈痛亦除。次用歸脾湯倍木香加炮

姜吞八味而全愈。

薛立齋治一婦人飲食後或腹悶或吞酸自服枳朮丸飲食日少胸膈痞滿腿肉瘦痛畏見風寒或用養胃湯腿痛浮腫益甚月經不行此鬱結所傷脾虛濕熱下注清晨四君子湯芎歸二陳午後以前湯送越鞠丸諸症漸見愈又用歸脾八珍二湯兼服兩月餘而經行。

一婦人胸滿少食或腹脹吞酸或經候不調此中氣虛不能施行化也。用補中益氣加砂仁香附炮姜而進飲食更以六君芎歸貝母桔梗而經自調。

一婦人飲食少思胸中嘈雜頭暈吐痰此中氣虛而有熱用



六君子湯加黑山梔桔梗而愈。後因勞碌頭暈發熱吐痰不食。用補中益氣加半夏茯苓天麻而痊。

一婦人中腕膮雜口中辛辣或咳嗽吐痰發喘面色或白或赤。此脾氣虛而肺中伏火也。用六君子加山梔桔梗柴胡及炒黑片苓芩治之尋愈。

一婦人嘈雜吞酸飲食少思大便不實。此脾氣虛寒而下陷。用補中益氣湯加茯苓半夏炮姜漸愈。又常服人參理中丸而安。

一婦人飲食後嘈雜吞酸。此熱鬱爲痰。用六君子湯送越鞠丸漸愈。又用加味歸脾湯而痊。後因怒兩脇脹痛中腕作

酸用四君子湯送左金丸漸安仍用六君子湯送下越鞠丸而瘥

朱丹溪治一人因濕熱病嘔吐酸水如醋用二陳湯加姜炒芩連蒼朮白朮梔子藿香香附砂仁而愈

陳三農治一婦每食止碗許稍加非大便泄瀉卽噎噦吞酸腹脹痞悶此脾虛寒不能化也用六君子加茱連藿香香附砂仁神麴煨姜而愈

薛立齋治一婦人飲食少每碗許稍加非大便不實必吞酸噯腐或以爲胃火用二陳黃連枳實加內熱作嘔曰未傳寒中故噯氣吞酸脹滿痞悶不信仍用火治虛症並至月

經不止。始信以六君子加炮姜木香。數劑元氣漸復。飲食漸進。又以補中益氣飲食漸進。加炮姜木香茯苓半夏。數劑全愈。後因飲食勞倦。兼之怒氣。飲食頓少。元氣頓怯。用前藥便加發熱。誠似實火。服洪大按之而虛。兩如如無。此命門火衰。用補中益氣姜桂及八味丸。兼服兩月餘。諸症悉愈。此症若因中氣虛弱者。用人參理中湯。或六君子加木香炮姜。不應。用左金丸。或越鞠丸。虛寒者加附子。或附中理湯。無有不愈。

一男子虛弱。惡食。雖熱食亦少。作脹吞酸。日削瘦。服參苓等藥。及炙脾俞等穴。不應。用八味丸治之而愈。此真氣不足。

不能生土虛火上炎之症也

一婦人年二十餘，飲食每每因怒氣，吞酸噯腐，或兼腿根焮  
疼，服越鞠丸等藥不應。此脾氣虛濕氣下注而然。以六君  
子湯香附砂仁藿香炮姜數劑少愈。更以六君湯數劑而  
愈。

一男子瘰癧已愈，患吞酸服參朮藥不應。彼謂餘毒，薛治以  
附子理中丸而愈。

張景岳曰：予向在都中治一搢紳，病吞酸，告以爲寒，彼執爲  
熱，堅持造酒之說以相問難，莫能與辨。竟爲苓連之屬所  
斃。此見理不真而固執，以致釀成大害者。選

# 頭

徐靈胎曰頭風一症往往本熱而標寒清火之藥固能愈風火輕症或有寒邪犯腦及風寒外來則溫散之法固不可畧而外提之法尤當博考也。

凡屬形體之疾皆當兼外治不明外治之法服藥雖中病僅得醫術之半耳

又曰頭風之疾輕者易愈其重者風毒上攻絡血橫逆重則厥冒久則傷目必重劑並外法諸法方能有效

有人三代不壽問彭祖祖觀其寢處果有穴洞當其腦戶合

塞之遂得壽蓋隙風人耳吹腦則陽氣散頭者諸陽所最

以主生也

延壽書

竇材治一人起居如常但時發頭痛此宿食在胃腕也服丁

香九十粒而愈

陽明食積頭痛

張子和治南卿陳君將赴秋試頭痛偏腫連一目狀若半壺

具脈洪大張出視內經面腫者風此風乘陽明經也陽明

氣血俱多風腫宜汗乃與通聖散入生姜葱根豆豉同煎

一大盞服之微汗次日以草莖入鼻中大出血立消

陽明風熱

頭痛

王定國病風頭痛至都梁求明醫楊介老治之連進三九即

時病失懇求其方則用香白芷一味洗晒爲末煉蜜丸彈子大每嚼一九二茶清或荆芥湯化下遂名都梁丸其藥治頭風眩暈女人胎前產後頭痛友血風頭痛皆效百一選方

按此方惟陽明風熱宜之餘不可服

張大復曰偏頭風之苦病者不能自言方亦多岐而罕效戊

申子忽病此政悶鬱時周叔明以餅法見寄未服也五月

五日顧民服貽二餅貼太陽上一夕良已法用南星半夏

白芷三味等末爛搗生姜葱頭爲餅不服不攻不熏視諸

方更簡便也

筆談按此方風痰用之

姚應鳳治嚴州施盛宇三載患頭痛不可忍姚曰法當取首

中骨今八月時收斂難猝治期以明歲春乃割額探去其

骨出瘀血數升頓愈

錢塘縣志

此症似與腦

雄按未

中石蟹畧同

免涉誕

龔子才治杜侍御患頭痛如刀劈不敢移動懼風怕語言耳

鳴目中溜火六脈緊數有力與酒浸九蒸九曬大黃為末

三錢茶調服一劑而愈

此亦陽明血熱為病病在至高之地故大黃必用如是製法

孫文垣治蔡樂川內人患頭痛如刀破髮根少動則痛連滿

頭痛倒不省人事踰半時乃甦遍身亦作疼胸膈飽悶飲

湯水停膈間不下先一日因怒吐水數次虻蟲三條今或

惡風或惡熱口渴或不渴而大便秘脈則六部皆滑大有

力此痰厥頭痛也先以藿香正氣散止其吐繼以牛黃黑



虎丹清其人事。頭仍痛甚。又以天麻、藁本各三錢，半夏二錢，陳皮、白芷、薄荷、麻黃、生姜、葱白煎服，得少汗而頭痛少止。至晚再服之，更痛止大半。人事未全清，此蓋中州痰盛，非下不可。乃用半夏五錢，巴霜一分，麩糊爲丸，每服三十丸。生姜湯下。下午大便秘行三次，皆稠粘痰積也。飲食少進，餘症差可。惟遍身疼未盡去，改用二陳湯加前胡、石膏、藁木、薄荷、枳殼、黃芩、石菖蒲調理而安。

木盛  
土衰

朱丹溪治一人因浴冷水發熱頭痛脈緊，此有寒濕也，宜溫藥汗之。蒼朮、麻黃、乾葛、甘草、陳皮、川芎二劑得汗後知病退。又與下補藥：陳皮、川芎、乾葛、白朮、蒼朮、人參、木通、甘草。

四劑姜水煎服

濕熱

一婦人頭痛發熱而渴白朮陳皮川芎乾葛木通甘草水煎

溫服

陽明病

○ 婁全善治一老婦人頭病歲久不已因視其手足有血絡皆

紫黑遂用三稜針盡刺出其血如墨汁者數蓋後視其受

病之經刺灸之而得全愈卽經所謂大痺爲惡及頭痛久

痺不去身視其血絡盡出其血是也

三陽風熱

○ 李時珍治一人病氣鬱偏頭痛用蓖麻子同乳香食鹽搗貼

一夜痛止

治標妙法

○ 李士材治蔣少宰頭痛如破昏重不甯風藥血藥痰血久治

少陰以痛

其以痛

無功脈之尺微寸滑腎虛水泛為痰也。地黃四錢。山藥丹皮澤瀉各一錢。茯苓三錢。沉香八分。日服四劑。兩日輒減。六七更以七味丸人參湯送。五日其痛若失。近日上盛之病最多觀此

河悟一切少陰病

吳孚先治一人患頭痛不可禁。脈短而澁。吳曰頭為諸陽之首。若外邪所乘。脈當浮緊而弦。今反短澁。短則陽脫于上。澁則陰衰於下。更加手足厥冷。名為真頭痛。與真心痛無異。法在不治。為猛進參附。或冀挽回萬一。如法治之果愈。

李成章官六安衛千戶善針灸。或病頭痛不可忍。雖震雷不

聞李診之曰此蟲啖腦也合殺蟲諸藥為末吹鼻中二三日

蟲即從眼耳口鼻出即愈

明史

雄按此症雖奇實有是病  
發人多患之彼處呼為大

白蟻亦因風  
熱所生也

一人素病黃忽苦頭痛不已發散降火歷試無效診得脈大

而緩且一身盡痛又兼鼻塞乃濕家頭痛也投瓜蒂散一

七內鼻中黃水去一大杯而愈

張三錫屢見苦頭痛百法不效詢之曾生過楊梅瘡用土茯苓

苓四兩白蘚皮苦參金銀花各三錢黃柏一錢皂角子三

十粒苡仁木通防風各二錢氣虛加參耆血虛加四物大

獲其驗身痛亦效

治法彙  
濕毒

梅毒引風

此二梅毒  
加大大黃  
見效

一人頭痛脈滑而數。乃痰火上攻也。二陳荆芥羌活酒芩不

應加石膏二劑稍可。終未盡除。前方加熟大黃三錢。食遠

煎服。病去如脫。全上 陽明痰火

一人苦頭痛。眾作外感治。診得右手寸口脈大四倍於左兩

尺。洪盛乃內傷氣血頭痛也。外兼自汗倦怠。以補中益氣

湯加炒黃柏一劑。知二劑已。氣虛

一人頭痛而面色青黑。身體羸瘦。左寸關俱不應。指兩尺獨

洪盛。因作陰虛治。用滋陰四物加黃柏知母元參。二服減

半。十日痊。血虛

一婦苦頭痛。誤為外感治。發散消導。愈投愈甚。診之氣口急

大而數按之卽濡。右脈而虛大詢之先不熱。服藥後始熱。曰風寒必先發熱。在一二日間。豈有先不熱而後熱者。此氣虛頭痛也。觀其氣短不足以息。餘皆可知。今發散過度。復耗其氣。又復下之。復損其血。氣血兩傷。宜乎虛火獨熾。而身反熱也。非大補詎能挽回。遂以補中益氣湯大劑。加熟附子一片爲嚮導。雄按此藥未嘗無疵服下卽熟睡。覺而痛止。第人事不清。復加筋惕肉跳。振振不甯。彼歸咎於補劑。曰虛極所致。復更一醫用柴胡表藥。致一身之火遊行於外。變爲斑爛。彼益信爲傷寒矣。化斑承氣日進。遂不救。同上

一人頭痛身形拘急。惡寒便秘。惡心作食鬱。治不應。診得氣

口脈和平。獨尺數而細。且行步艱難。乃脚氣欲動也。從脚

氣治而愈。同上

一人頭痛作外感治不應。左脈平和。氣口獨盛。症兼飽悶惡

心。乃食鬱也。消導而愈。全上 陽明病

一人牙與頭角互痛。乃少陽陽明二經病盛之故。清胃散對

小柴胡去半夏。人參加薄荷石膏。二劑瘳。全上

一老嫗頭痛連額。發散降火備用不效。面上皆出小紅泡。有

微水不甚潰。一月後痛悉移於右左眼胞上。紅腫且癩。於

言動飲食不甜。用辛涼愈甚。六脈濡弱如蛛絲。初按少弦

因作氣虛治。六君倍黃耆加蔓荊子。三服後漸安。心跳不

眠愈急。乃以調中益氣湯加茯神元參棗仁柏子仁連進數服頓愈。全上

東垣常病頭痛發時兩頰青黃眩暈目不欲開。嬾言身體沉重。兀兀欲吐。潔古曰。此厥陰太陰合病。名曰風痰。以局方

玉壺丸治之。灸俠谿即愈。是知方者體也。法者用也。徒執

體而不知用者。弊。體用不失。可謂上工矣。醫說續編

湖南押衙顏思退治頭風掣痛。用蠟二斤。鹽半斤。相和於錫

鑪中。熔令相入。捏作一兜。熬勢可合。腦大小搭頭。量至額

頭痛立止。經驗方全上

王叔權云。予年踰壯。寒夜觀書。每覺腦冷。飲酒過量。腦亦痛

頭痛立止。經驗方全上



甚後因灸顛會穴而愈有兵士患鼻衄不已予教令灸此穴卽愈有人久患頭風亦令灸此穴卽愈但銅人明堂經只云主鼻塞不聞香臭等疾而已故予書此以補其治療之缺然以腦戶不宜針觀之顛會亦不宜針鍼經只云八鍼云下不宜鍼恐未盡也

叔權母氏隨叔權赴任爲江風所吹身體頭動搖如在舟車上如是半年乃大吐痰徧服痰藥並灸頭風諸穴方愈

有士人患腦熱疼甚則自牀下頭以腦拄地或得冷水粗得減而疼終不已服諸藥不效人教灸顛會而愈熱疼且可灸况冷疼乎凡腦痛脾瀉先宜灸顛會而強間等穴蓋其

次也。

以上並  
資生經

薛立齋治一儒者酒色過度頭腦兩脇作痛以爲胃虛而肝病用六味地黃料加柴胡當歸一劑頓安。

商儀部勞則頭痛作陽虛不能上升以補中益氣湯加蔓荊子而痊。

王肯堂治一人寒月往返燕京感受風寒遂得頭痛數月不愈一切頭風藥無所不服厥痛愈甚肢體瘦削因思此症明是外邪緣何不解語云治風先治血血行風自滅本因血虛而風寒入之今又疎泄不已烏能愈哉又云痛則不通通則不痛乃用當歸生汙活血木通通利關節血脈其

人能酒。用酒一斗。入二藥其中。浸三晝夜。重湯養熟。乘熱飲之。致醉則去枕而臥。然有火鬱於上而痛者。宜酒合石膏之類治之。又方用芎歸熟地連翹各二錢。以薄荷二錢放碗內。將滾湯沖下。鼻吸其氣。候溫卽服。服之立愈。然亦爲血虛者設耳。

8 馬元儀治一人患頭痛。經年不愈。早則人事明了。自午至亥。神氣昏憤。不甯。作風治。治無效。診之兩脈俱沉且滑。此太陰陽明痰厥頭痛也。用礞石滾痰丸間服。導痰湯以蕩滌之。次以六君子少加秦芫全蝎調理而安。

8 張樹滋妹患頭痛累月。診之陽脈大陰脈澁。曰此陰衰於下。

陽亢於上。上盛下虛之候也。法宜六味地黃丸加青鉛五錢。俾清濁定位。斯不治痛而痛自止矣。所以然者。以陽氣居上。體本虛也。而濁氣干之。則實陰氣居下。體本實也。而氣反上逆。則虛頭爲清陽之位。而受濁陰之邪。陰陽混亂。天地否塞而成病矣。治之不察其脈。概以頭痛爲風火。專行透解之劑。有不益虛其虛者乎。

朱某患頭痛累月。苦不可忍。咸用散風清火之劑。診其脈浮虛。不鼓。語言嬾怯。肢體惡寒。此勞倦傷中。清陽之氣不升。濁陰之氣不降也。故汗之反虛。其表清之益。傷其中。其惡寒乃氣虛不能上榮而外固也。况脈象浮虛。體倦語怯。尤

為中氣氣弱之驗與補中益氣湯

雄按此湯升清則有之如何能降濁升清降濁

加蔓荊為使令至高巔 一劑知二劑已

一人頭風畏冷首裹重綿三十年不愈以蕎麥粉二升水調

作二飴更互合頭上微汗即愈

李樓怪症奇方王帶存曰此方先裝溪伯曾治族祖

經  
驗

繆仲滄治梁溪一女子頭痛作嘔米飲不能下曰因於血熱

血虛火上炎也麥冬五錢橘紅木瓜扶苓各二錢白芍三

錢枇杷葉三大片蘇子錢半甘菊錢半烏梅二箇竹瀝一

杯蘆根汁半碗二劑嘔止頭尚痛加天麥冬二錢頭痛止

加土茯苓二兩小黑豆一撮全愈

廣筆記

沈觀頤中丞傳自一道人頭風神方予僕婦患此痛甚欲自  
縊服二劑數年不發土茯苓四兩忌鐵金銀花三錢蔓荊子  
防風明天麻各一錢元參八分辛夷川芎各五分黑豆四  
十九粒燈心二十莖芽茶五錢河水井水各盪半煎一盞

服廣筆  
記

廣筆記治半邊頭風屬火症者用之大黃末三分黃芩末一  
錢二味和生白酒一碗頓熱調勻服之即愈

立齋治一婦人腦左腫痛左鼻出膿年餘不愈時或掉眩如  
坐舟車正許叔微所謂肝虛風邪襲之而然也以川芎一  
兩當歸三錢羌活旋覆花細辛蔓荊子防風石膏蔓本荊

芥穗半夏麴乾地黃甘草各五錢。乃製一料。每服一兩。姜水煎服而愈。

劉雲密曰。一婦季冬受寒。至於中春。巔頂並左後腦痛。是原病手足太陽寒水寒久鬱化熱上行。以病於手太陽。因風升之化不達。而病亦在左厥陰也。經謂過在巨陽厥陰者。誠然診者云。手太陽熱甚於風。足厥陰熱勝於濕。更謂脾肺亦有鬱熱。余止治手太陽而微兼肺。以手太陽之氣化在肺。主氣者也。心有微熱。並治足厥陰。以風升之化達。而手太陽之氣化乃暢。更微利小腸。以通血脈。而和其氣。並心經之熱亦去。故不必多治他經也。按此亦治巔頂之一

因見寒者温治之未盡耳

酒片苓二分半酒枯苓分半蔓  
荆子二分半防風分半黃連二

分半柴胡三分藁本三分升麻二分川芎二分酒黃柏三  
分當歸三分木通四分牛膝三分水煎一劑立愈

嘉祐初仁宗寢疾藥未驗間召草澤醫始用針自腦後刺入

針方出開眼曰好惺惺翼日聖體良已自爾以穴目為惺

惺穴經初無此名或曰即風府也

畫謾鍊宋  
張舜民

吳橋治方簡妻病五年食體不盡一器至夜則頭岑岑遮絕

遮甦達旦乃定橋至曰食少久臥肌宜腴今且腴而脈不

數奚病為或婦當娠大損血於頭審是治二年可受胎復

產男而起矣蓋婦嘗妊哭姑髮根有疣如豆大出血數升

匿勿令人知尋免男弗育也治不補氣專補血累二年而



舉子命之曰去病遂如常太函集

# 眉髮鬚

李林甫婿鄭平為省郎林甫見其鬚髮斑白因曰上明日當

賜甘露羹鄭郎食之能烏髮翼日食之一夕兩鬢如鬢瑯琊

代醉編

李卿換白髮方云刮生老姜皮一大升于鐺中以文武火煎

之不得令過沸其鐺惟得多油膩者尤佳更不須洗刮便

以羗皮置鐺中密封固濟勿令過氣令一精細人守之地

色未分時也黎明便須煎之緩緩不得令火急如其人稍疲

卽換人看火一伏時卽盛置於磁鉢中研極細李方雖云  
一伏時若火候勿至日西卽成藥也使時以簪腳蘸取如  
麻子大先于白髮下點藥訖然後拔之再點以手指熱擦  
之令入肉第四日當有黑者生神效

梅師治年少白髮拔去白者以白蜜塗毛孔中卽生黑髮不  
生取桐子搗汁塗上必生黑者

千金療髮黃熊指塗髮梳之散頭入床底伏地一食頃卽出  
便盡黑不一升脂驗

薛立齋治一男子因大怒發熱眉髮頓落蓋髮屬腎而眉屬  
肝此肝腎素虛爲怒所激陰火愈盛銷鑠精血而然也用

六味丸料。加柴胡、山梔、黃柏，數劑漸生。又二十餘劑而完。  
一男子染時瘡，服換肌散之類，眉毛頓落，遍身作痒。或時赤  
暈，乃燥藥損其陰血，陽氣偏旺而然。朝用四物湯，倍熟地，  
加茯苓、白朮、丹皮、山梔、甘草，夕用六味丸料，加當歸、黃耆，  
治之。瘡既愈，眉毛亦生。

一男子素不慎房勞，其髮忽落，或發熱惡寒，或吐痰頭暈，或  
口乾作渴，或小便如淋，兩足發熱，或冷至脛，屬足三陰虧  
損而陰火內熾。朝用十全大補，夕用六味丸料，加炒黑黃  
柏、枸杞，治之。諸症悉退，而髮漸生。

一男子遍身瘙痒，服祛風辛燥之劑，眉髮脫落。此前藥復傷

肝腎精血虛而火內熾所致。朝用八珍湯加麥冬、五味、夕用六味丸料加當歸、黃耆治之。風熱退而眉髮生矣。

一儒者遍身作痒，破膿血淋漓，眉毛脫落，如癘風症。久服祛風等藥，致元氣虧損。用補中益氣湯加茯苓而愈。後失調理，日晡熱甚。用八珍湯加五味、麥冬，五十餘劑而痊。

繆仲淳烏鬚明目丸。女貞子酒拌炒九蒸九晒淨末一斤，甘菊花十二兩，何首烏赤白各半，如法蒸晒淨末二斤，牛膝酒蒸一斤，桑葉一斤，生地酒洗淨二斤，甘枸杞一斤半，乳拌茯苓酥一斤，麥冬一斤半，槐角子十兩，蒼朮蜜酒拌蒸晒十二兩，人參一斤，人乳拌烘乾，山萸肉酒蒸十二兩，烏

飯子之黑者取汁熬膏每斤加煉蜜半斤丸如梧子大每服五錢日三服白湯送下忌白菜蕪牛肉牛乳桃李蒜雀蛤

繆仲淳定烏鬚方何首烏勿去皮黑豆同牛膝蒸製如常法最後用人乳拌晒三四十次赤白各二斤女貞實酒拌丸蒸九晒二斤旱蓮草熬膏十二兩烏飯子卽南竹子也熬膏十二兩蒼朮米泔浸蒸晒三次去皮切片十二兩真川椒紅去白膜開口者十二兩沒石子十兩爲細末以旱蓮草膏烏飯子膏同煉蜜爲丸如梧子大每五錢空心饑時各一服白湯下

# 面

孫兆治樊樓店家劉三一日滿面皆黑色有相者斷云不過月餘死既逾月且安適孫入店與客飲酒遂拜孫述說其病狀孫診之曰非病也乃爲臭氣所熏穢氣畜于面部不散故有此色問劉汝一月前聞甚一陣非常臭氣不能避耶劉曰一日登溷其廁臭氣不可聞隱忍良久下廁明日遂有此疾孫曰去至臭無過香我家有南人將至售香可用沈檀二香各一兩碎擘焚于爐中安帳內以熏絹被蓋定勿令香氣散可端坐香邊瞑目靜坐候香氣散方可出

帳明日引鑑照之。劉依其言。面色漸變。旬日如故。

樓全善曰。腎臭腐屬水。脾臭香屬土。廁臭者腐臭也。故聞之則入腎而面黑。沈香者香臭也。故熏之則脾土勝腎水而色還也。

蘇子由面有瘡。高安丐者趙生謂子由曰。君好道而不得要。陽不降陰不升。故肉多而浮。面赤而瘡。吾將教君椀水。以灌漑子骸。經旬諸疾可去。子由用其說。信然。惟怠不能久。故不能極其妙。

龍川志畧

治面部生瘡。或鼻臉赤。風粉刺。用盡藥不效者。惟有此藥可治。神妙不可言。每以小許臨臥時洗面令淨。如面油用之。

近眼處勿塗數日間瘡處自平赤亦消如風刺粉刺一夕

見效敏捷點方用生硫黃五分香白芷五分芫青七箇去翅足全蝎

一個洗炒瓜婁五分膩粉五分蟬退五個洗去泥右為細末麻油黃蠟

約度如合面油多少熬熔取下離火入諸藥在內每用少

許塗面上醫說續編

趙君猷撫幹所傳云有貳卿趙再可知湖州時與一僧相厚

而僧患酒齷鼻端生赤贅數枚大者如橘小者如梅李下

垂過口言語飲食皆所妨廢良自厭苦之郡有一小兵事

刀鑷人但聞其善取醫症不知其能治酒齷也一旦自言

于僧請醫此疾即以藥傅之凡半月餘每日取惡物如膿



血自皮膚出者甚多其贅後悉成痂落去皮面瑩然遂以

十千為謝且語貳卿備直齋閣而求得其方以傳秀邦治

人良驗用黃丹五文餅藥五十文著大罐子盛硃砂三十文研極細用巴豆十個

去殼膜紙裏右件同入餅藥罐子中慢火熬三沸取下續壓去其油

入研細生礦灰三錢酒齷鼻用鵝毛掃在紅處一日一次

上藥以追出毒物病退即止雀子斑用小竹捧兒挑藥點

患處纔覺微腫即便洗去恐力太猛並集成同土

陳三農治隣婦面上一熱即通身躁熱而汗隨之日夜六七

次百治不愈細思之經曰面熱者足陽明病此脾陰不足

而胃火有餘也以山藥為君歸芍地黃為臣以補脾陰之

不足用石膏生甘草以瀉胃火。黃耆麥冬五味以固腠理。加竹葉以去煩熱。二劑愈。

朱丹溪治一婦人面頰兩腮熱腫。此膈壅之病也。乾葛桔梗各錢半。升麻一錢。蘇葉錢半。薄荷一錢。炙甘草七分。羌一片。水煎食後服。

王莽遺孔休玉休不受莽曰君面有疵。美玉可以滅瘢。休由不受莽曰君嫌其價重乎。遂槌碎進休。休方受之。

薛立齋治吳黃門之顛赤腫痛。此胃經風熱上攻所致。以犀角升麻湯二劑而平。又姜大理患此處前方爲人所惑。謂湯內白附子性溫而不服。另用荆防敗毒散愈甚。後雖用

此湯尚去白附子亦不應後用前方三劑而愈本草云白附子味甘辛氣溫無毒主面上百病及一切風瘡乃風熱之主藥內經曰有是病有是藥苟不用主病之藥病焉得而愈哉。

吳進士面患瘡已潰作渴自服托裡藥及降火藥不應診其脈浮而弱丹溪云潰瘍作渴屬氣血俱虛况脈浮弱投以參耆各三錢歸朮熟地各二錢數服渴止又以八珍湯加黃耆數劑脈斂而愈。

韓氏子年十四早喪天真面紅腫如風狀不時舉作或誤用癘風藥內虛發熱口燥煩渴此內傷不足陰火上炎之類

赤遊風症也。藥宜滋其陰，則火自退。用地黃湯加參耆四十劑。又用此作丸服，斤許，不兩月而痊。癩瘍機要

許學士治王檢正，患鼻額間痛，或麻痺不仁。如是數年，忽一日連唇口頰車髮際皆痛，不開口難言語，飲食亦妨。在額與頰上常如糊，手觸之則痛。作足陽明經絡受風毒傳入，血凝滯而不行，故有此症。或者以排風小續命透髓丹之類與之，皆不效。乃製犀角升麻湯，贈之數日而愈。犀角升

麻防風羌活川芎白附白芷黃芩甘草右粗末，每服四錢。

水煎，日三四服。陽明經絡環唇挾舌起于鼻合額中循頰車上耳前遇客主人循髮際至額顙今所

患皆一經絡也。

玉橫老母年七十餘，累患頰車痛，每多言傷氣，不寢傷神，則大發，上連頭，下至喉內，及牙齦，皆如針刺火炙，手不可犯，乃至口不得開，言語飲食並廢，自覺火光如閃電，尋常涎唾稠黏，如絲不斷，每勞與饑則甚，得臥與食則稍安，知其虛也。始以清胃散、犀角、地黃湯，人參、白虎湯，羌活勝濕湯，加黃芩、甘桔，皆不效。後改用參耆朮草葛歸升柴桔梗之類，稍佐黃芩、山梔、牛蒡、連翹，空腹進之，食遠遠則服，加減甘露飲，始漸安。然老人性多躁，而不耐閒，勞與多言，時有之，不能除去病根，然發亦稀少，卽發亦不如往歲之劇矣。又從子語，因喪子鬱結，復多餌鹿角膠諸種子藥，或于食

後臨臥輒進之。以至成積于胃。遂患面痛如老母之症。服清胃散。甘露飲。重加石膏。太過。而見虛症。又服參耆等補藥。而復見火症。門人施生以越鞠丸。加山梔。連翹。貝母。橘紅之屬。開其鬱結。而始安然如舊日矣。

續名醫類案卷十六終

1655

續名醫類案卷十七

錢塘魏之琇編集

海昌王士雄孟英  
定州楊照藜素園  
同校

目

孫兆治國婆婆患眼冷淚、眼科官治二三年不效、上召孫、孫至曰、臣非眼科、但有藥耳、容進方、用石決明一兩、赤小豆兩半、半夏五錢、生斑猫二十一粒、炒去頭足、木賊五錢、爲末、薑汁丸、如桐子大、每服二十九、薑湯下、方進聖旨、下眼科詳定、奏曰、此方與眼科甚不相涉、斑猫有毒、恐傷臟腑。



不敢用合再取聖旨。國婆婆聞之曰。眼科醫官不惟不能。亦不愿使我治也。但合此藥。總傷無怨。上聞之。孫自進藥。服經十餘日。愈八分。二十日全愈。時眼科並降兩官。孫賞

錢三十萬。

雄按眼科雖降官其言未可為非婆婆眼雖愈其方未可為訓學者勿盡信書也。

竇材治家中女婢。忽二目失明。視之又無暈翳。細思此女年少。精氣未衰。何緣得此症。良由性急多怒。有傷肝臟。故經脈不調所致。遂與蜜蒙花散一料。如舊光明矣。

張子和治女僮目忽暴盲。不見物。此相火也。太陽陽明血氣俱盛。乃刺其鼻中攢竹穴。與頂前五穴。大出血。目立明。

李民範日常赤。至戊子年火運。君火司天。其年病目者。往往

暴盲火運災烈故也。李是年目大發張以瓜蒂散涌之。赤立消不數日又大發其病之來也。先以左目內皆赤發牽睛狀如鋪麻。左之右次銳眥發赤。左之右赤貫瞳子再涌之。又退凡五次。亦五次皆涌之。又刺其手中出血及頭上鼻中皆出血。上下中外皆奪。方能戰退。然不敢觀書。及見日。張云當候秋涼再攻則愈。火方旺而在皮膚。雖攻其裡無益也。秋涼則熱漸入裡。方可擒也。惟宜暗處閉目。以養其神水。暗與靜屬水。明與動屬火。所以不宜見日也。蓋李因初愈後曾冒暑出門。故痛連發不愈如此。涌洩之後。不可常攻。使服鼠麴子以退翳。方在別集中。

趙君玉日暴赤腫、點洗不退、偶思張語曰、凡病在上者皆宜吐、乃以茶調散涌之、一涌赤腫消散、君玉歎曰、法之妙、其速如此、乃知法不遠人、人自遠法耳。

王之一子十餘歲、目赤多淚、衆工無效、張曰、此兒病目、還當得之母腹中被驚、其父曰、妊娠時在臨清被圍、乃令服瓜蒂散、加鬱金、上涌而下泄、各去涎沫數升、人皆笑之、其母亦曰、兒腹中無病、何吐瀉如此、至明日其目耀然、爽明、其日又與頭上出血、及眉上鼻中皆出血、吐時次用通經散二錢、舟車丸七十粒、自吐却少半、又以通經散一錢投之、明日又以舟車丸三十粒投之、下十八行、病更不作。

士人趙仲溫赴試病兩目赤腫睛翳不能識路大痛不任欲  
自尋死一日與仝儕釋悶坐於茗肆中忽鉤窗脫鉤而下  
正中溫額上髮際裂三四寸紫血流數升血止目快能通  
路而歸來日能辦屋脊次見瓦溝不數日復故此不藥不  
針誤出血而愈夫出血者乃發汗之一端也亦偶合出血  
法耳。

一小兒名德孫眼發赤其母買銅緣欲洗兒目煎熟家人誤  
與兒飲之須臾大吐吐訖立開

婁全善男目珠至夜疼連眉稜骨及頭半邊腫痛用黃連膏  
點之反甚諸藥不效灸厥陰少陽疼隨止半日又作月餘

續名醫類案卷十七  
以夏枯草二兩、香附二兩、甘草四錢爲末，每服錢半，清茶調下，咽疼減半，四五服良愈。

一男子所患與前症皆同，但黑睛有白翳二點，諸藥不效，亦以此藥與東垣選奇湯加四物及黃連煎間服，並灸厥陰少陽而安。

王海藏妻姪女形肥，笄年時得目疾，每月或二月一發，發則紅腫難開，如此者三年，服除風散熱等劑，左目反有頑翳，從銳眥遮瞳人，右目亦有翳，從下而上，經云從內走外者，少陽病。從下上者，陽明病。此少陽陽明二經有積滯也。脉短滑而實鼓，還則似短濇，潔古云短爲積滯，遏抑臟腑宜

下之遂用温白丸減川芎附子之二多加龍胆草黃連如東垣五積法。從二丸加起每日加一服。加至大利。然後減丸。又從二丸減起。忽一日干利中下黑血塊若干。如黑豆大而堅硬。從此漸痊而翳盡去。以上三則皆醫學綱目

○ 盧州知錄彭大辨在臨安暴得眼赤後生翳一僧用蘭香子

本名羅勒又名香葉又名醫子草

洗曬每納一粒入眥內閉目少頃連膜

而出一方為末點之李時珍嘗取子試之水中亦脹大蓋

此子得濕即脹故能染惹眵淚浮膜耳然目中不可著一

塵。此子可納三五顆亦不妨礙亦一異也。本草綱目

○ 張大復云子曰初眇有教服三花五子丸者或云緩甚寔益

三元五子丸

于用乎遂止揚州張斗嶽謂子淮僧某者久眇哲然問之  
則服三花五子丸也此古本所載耳而修合之法稍異則  
效不效應焉比歸請以相與予病且老無事于方然願得  
之以濟同病者張信士通劔術其言多不妄筆談

張三丰真人治目疾碧雲膏臘月取羯羊膽十餘枚以蜜裝

滿紙套籠住懸簷下待霜出掃下點之神效即二百味草花膏另一製

法

兗州朱秀才忽不見物朝夕拜天因夢神傳方用好燄硝一

兩銅器鎔化入飛過黃丹二分片腦二分銅匙急抄入確

內收之每點少許即愈張三丰仙方

宋丞相言黃典史病外障翳夢神傳一方用太陰玄精石陰  
陽火煨石決明各一兩蕤仁黃連各二兩羊子肝七个竹  
刀切晒為末粟米飯丸梧子大每卧時茶服二十九服至  
七日烙頂心以助藥力一月而愈朱氏集驗方

魏全家富母忽然失明王子貞卜之曰明年三月一日從東  
來衣青者療之必愈至時候見一人著青綢襦遂邀為重  
設飲食其人曰僕不解醫但解作利耳為主人作之乃持  
斧就舍求犂轆見桑曲枝臨井上遂斫下其母兩眼煥然  
見物此曲枝桑蓋井之所致朝野僉載

王璽集要詩云赤眼之餘翳忽生草中鵝不食為名塞於鼻



寒身并除風

魚胆眼石

天之眼

雜名醫集卷十七

中頻頻換三日之間復舊明。又倪惟德原機啟微方用鵝

不食草本名石胡荽晒乾二錢青黛川芎各一錢為細末噙水

一口每以米許啗入鼻內泪出為度一方去青黛本草綱目

經驗方治目障翳以熊膽少許淨水畧調開盡去筋膜塵土

入沐片一二片或淚痒則加生薑汁些少時以銅筋點之

絕奇赤眼可用余家二老婢俱以此效熊膽善辟塵試之

之法淨一器塵其上投膽一粒許則凝塵豁然而開同上

○朱丹溪治飛絲入目紅腫如眯痛澼不開鼻流清涕用京墨

膿磨以新筆塗人目中閉目少時以手張開其絲自成一

塊看眼白上却用綿輕輕拭出即愈如未盡再治又飛

絲入目、用頭垢點入目中、即出神效、又眯目、鹽與鼓置水

中浸之、視水其渣立出、同上

龔子才治一人兩眼角出烟霧、此肝火也、以柴胡黃連等分、

大劑水煎、臨臥頻頻服之、數劑乃瘥、仍宜入血藥為要

華州陳明遠瞽十年、漢卿視之曰、可針也、為翻睛刮翳、欬然

辦五色、同上

福建按察使沈文敏、其母隨養時、雙目失明、延一醫療之、云

障翳已重、藥不能效、乃先藥之、使不知痛、尋以物撥轉眼

睛向內、一面向外、封閉三日而開、視物無一不見、云眼睛

惟兩角有筋係之、故可撥轉、然非削鼻、聖手不能也、菽園雜記

中西醫  
辨刀法

辨刀法

京師法雲寺僧律師、失明數年、夢中有人授一方、治內外障、

但神水在者皆可療焉。二兩。二兩上脫一味疑為首烏抄本但字下空一字又焉字似

烏字之訛。蔓青子、枸杞、蒺藜、甘菊、荆芥、穗各一兩、當歸、地黃、川

芎、赤芍、防風各一兩半、十一味末之、水、麵糊丸、桐子大、空

腹食前、溫水下三二十九、僧服之、目復明、因目曰、夢靈丸

元遺山續

黃堅志

曰、彥良壯歲常患赤目、一道人曰、但能不赤頭、則不病、此彥

良記之。七十餘更無眼疾。延壽書

有人年八十餘、眸子瞭然、夜讀蠅頭字、云、別無服藥、但自小

不食畜獸肝、人以本草羊肝明目疑之、余曰、羊肝明目性

也。以食百草故他肝不然。畜獸臨宰之時，忿氣聚於肝。肝主血。

不宜于目明矣。延壽書

陳坡次女痘後餘毒上攻，遂成內障。遍試諸藥半月不驗，後

得老醫一方，用蛇蛻一具，淨洗焙燥，又天花粉等分，細末

之以羊子肝破開入藥在內，麻皮縛定，用泔水煮熟切食

之，凡旬餘而愈。其後程甥亦用此效。槎菴小乘

萬密齋治孫撫軍淮海患目疾，因宦學政時多閱卷而得。今

每閱文案則眼珠脹痛，用八珍湯為主人參、茯苓、炙甘草

酒洗當歸、酒炒白芍、酒炒生地、黃去白朮。以其燥也川芎。以其

加麥冬、五味子、柏子仁、棗仁、黃連減半，共十一味。孫曰：何

不用菊花蔓荊子曰凡目疾有外因內因由風熱得之為

外因宜發散所謂火鬱則發之也由久視傷血得之為內

因宜以養血為主所謂目得血而能視也服十數劑全愈

○孫文垣治吳小峰與弟小川俱病目專科治之益甚其目始

紅腫次加太陽痛繼以白星翳叠出脉之小峯濡緩而大

兩目血縷入貫瞳人薄暮則痛虛小川則洪大鼓指黑珠

有浮翳膜隱澁難開大小便皆不利實故于小峯用補先

以清肝散與之夏枯草五錢香附四錢甘草錢半細茶五

分以撤其痛治標藥兩進而痛止方法與前婁全善案同繼用人參荻

苓熱地杞子桂心牛膝破故紙白蒺藜丹皮治本則桂紙

蒺藜當酌用

于小川用瀉。內用瀉肝湯及當歸龍薈丸外用象牙冰片  
未點之。凡點眼藥研須極細七日全愈。經云實者正治。虛者從治。小

川之症唯厥陰肝火熾盛。肝常有餘。有餘者瀉之。正治也。  
小峯則下虛。又爲怒所激。怒則火起于肝。肝爲藏血之地。  
故血絲貫瞳人。而薄暮作痛。故先用清肝散。以去其痛。再  
用甘溫補下元之虛。俾火得歸原。此從治也。若用苦寒降  
火之劑。恐血凝而痛加。且火激而愈熾矣。

姪孫眼紅腫脹。或以苦寒治。時疾之劑與之。眼愈腫。且增兩  
太陽痛。再加石膏病不減。且遍身脹悶。寢食俱廢。脈之弦  
大無力。乃用蔓荊子。桑白皮。柴胡。香附。夏枯草。甘草。芽茶。

一帖痛定。兩帖腫消。四帖全愈。

一女孩右目紅腫。腹中飽。乃能開。飢則不能開。此疳積寒症也。以夏枯草二錢。甘草穀精各一錢。香附一錢。五分煎服。四帖而安。

孫氏婦年過四旬。眼赤腫。太陽痛。大便三日不行。經水四日未止。諸治不效。右目內眥突生。一白泡垂與鼻齊。大二寸餘。耑科見而却走。以爲奇疾。時眩暈。不能少動。動則嘔吐。益劇。孫脉之兩寸關俱滑。大有力。兩尺沈微。此中焦有痰。肝胆有火。爲怒所觸而然。經云。諸風掉眩。皆屬於肝。諸逆衝上。皆屬於火。蓋無痰不作暈也。然未其白泡乃火性急。

于小川用瀉。內用瀉肝湯及當歸龍薈丸。外用象牙冰片

未點之。凡點眼藥研須極細七日全愈。經云實者正治。虛者從治。小

川之症唯厥陰肝火熾盛。肝常有餘。有餘者瀉之。正治也。

小峯則下虛。又為怒所激。怒則火起于肝。肝為藏血之地。

故血絲貫瞳人。而薄暮作痛。故先用清肝散。以去其痛。再

用甘溫補下元之虛。俾火得歸原。此從治也。若用苦寒降

火之劑。恐血凝而痛加。且火激而愈熾矣。

姪孫眼紅腫脹。或以苦寒治時疾之劑與之。眼愈腫。且增兩

太陽痛。再加石膏病不減。且遍身脹悶。寢食俱廢。脈之弦

大無力。乃用蔓荊子。桑白皮。柴胡。香附。夏枯草。甘草。芽茶。



一帖痛定。兩帖腫消。四帖全愈。

一女孩右目紅腫。腹中飽。乃能開。飢則不能開。此疝積寒症也。以夏枯草二錢。甘草穀精各一錢。香附一錢五分煎服。四帖而安。

孫氏婦年過四旬。眼赤腫。太陽痛。大便三日不行。經水四日未止。諸治不效。右目內眦突生一白泡。垂與鼻齊。大二寸餘。耑科見而却走。以爲奇疾。時眩暈。不能少動。動則嘔吐。益劇。孫脉之兩寸關俱滑。大有力。兩尺沈微。此中焦有痰。肝胆有火。爲怒所觸而然。經云。諸風掉眩。皆屬於肝。諸逆衝上。皆屬於火。蓋無痰不作暈也。却未其白泡乃火性急。

速怒氣加之氣乘于絡上而不下。故暴脹垂下也。古壯士一怒目皆裂。與此理同。治常抑肝木。鎮痰火。先用薑汁益元丸以壓火止吐。再以二陳湯加酒連酒芩天麻滑石吳黃竹茹枳實。一帖吐止。稍能運動。仍以二陳湯加芩連菊精草夏枯草香附苡仁吳茱萸。四劑赤腫消。白泡斂。經止而愈。俞東扶曰。此案見證甚怪。治法甚穩。因知醫病祇要明理。毋庸立異也。

呂東莊治吳綺厓弟。患左目痛連腦。醫以頭風治之不解。初時發寒熱。後遂壯熱不止。呂診之曰。火伏于內。風燥泉涸。木乃折矣。非得汗不解也。或曰汗須用發表藥。獨非風燥

乎且發汗藥須擁被悶卧乃得身熱甚苦此奈何難得呂

曰庸醫發汗皆屬強逼故須擁被悶卧然而汗不可得也

說破此輩伎倆正是教人苦心今藥非此類雖薄衾舒體時雨自至豈能

阻遏哉語欠圓活乃用龍腦白朮飲子必逍遙無疑夜分大汗淋漓

次日頭目爽然矣龍腦白朮飲子無從考核有謂即趙氏加減逍遙散未知是否原注按

議論超妙而所用之方仍是風劑似與泉涸二字失照應矣

吳孚先治一人目痛及化葉一片刺鼻之迎香穴出血而痊

鼻內迎香穴乃手足陽明交經也治法本張子和

王宗蒼目珠紅赤驚悸腸鳴色天不澤左手浮空右關尺重

按無力吳曰此肝腎交虛不能制遊行之火非肺家實火

也。朝服加味歸脾湯。夕服八味丸。不一月白珠紅退。脈漸  
冲和矣。

楊賁亨治一貴人患內障性暴躁。時時持鏡自照。計日責效。

數醫不愈。召楊診曰。公目疾可自愈。第服藥過多。毒已流  
入左股。旦夕間當發毒。竊爲公憂之。旣去貴人日夕視左  
股。撫摩惟恐其發也。久之目漸愈。而毒不作。貴人以楊言  
不驗。召詰之。對曰。醫者意也。公性躁欲速。每持鏡自照。心  
之所屬。無時不在于目。則火上炎。目何由愈。故詭言令公  
凝神于足。則火自降。目自愈矣。雄按此移情妙法。醫能隅  
反勝用逍遙越趨諸方矣。

兵行詭道。惟醫亦然。貴人曰。良醫也。厚禮而遣之。

筠齋漫  
錄江西

通志載  
此大畧

范武子嘗患目痛，就張處度求方。處度因嘲之曰：古方宋陽里子少得其術，以授魯東門伯。魯東門伯以授左邱明，及漢杜子夏、鄭康成、魏高堂隆、晉左太冲。凡此諸賢，並有目疾。相傳此方云：一、減思慮。二、專內視。三、簡外觀。四、旦晚起。五、夜早眠。熬以神火，下於氣海，蘊于胸中，然後納諸方寸。修之一時，近能數其目睫，遠視尺筭之餘，長服不已，洞見牆壁之外，非但明目，乃亦延年。

全

黃履素曰：子少時神氣不足，患目，每用目少過，輒酸澁無光者累日。博考方書，多云六味地黃丸可治目，子連服二三

料目疾轉甚改用別方補腎氣血之藥始得少愈後讀醫學鉤元有目病不宜服六味丸辨謂澤瀉茯苓滲水山茱

萸不宜于目。

山萸味酸肝開竅于目經云肝病者毋多言食酸凡肝腎病皆不宜此三味不惟目也

之甚詳以予驗之此論良是然從今思之目病有屬血虛亦有屬氣虛者予血固不足氣則尤虛薛立齋治兩目翳澁不能瞻視以爲元氣下陷用補中益氣湯倍加參耆而愈予悔往時不多服前湯而專事于補腎養血致久不痊迨四十後以指麻多服前湯原無意于治目而目光漸充始信往時之誤予幼時患風弦爛眼甚受其累百藥罔效遇一陳姓醫士于長安邸授予白朮藥令敷于眼背患處

續名醫集卷二十七  
隨敷隨愈。取效如神。不肯傳方。予略訪之云。有吐蛻在內。吐蛔者。小兒口中吐出蛔虫。收乾候用。其中想更有製就蘆甘石配之者。真奇方也。

張三錫治一人病目久不能治。涼藥盡試不應。診之。兩手微弱。命服八珍加麥冬。一月如舊。乃知飲食不運。腸胃枯澁。髮落皮皺。噎膈淋閉等症。目昏耳聾。悉由氣液血脉榮衛衰少。不能升降出入。虛火阻滯而然。故元府閉則小便淋濁。火炎上則目視昏花。有如隔簾視物之象也。丹溪東垣治目昏。用參芪補養氣血。久靡不獲效。以氣血旺則元府得利。升降清明也。

倒毛法

一人目赤黑珠傍暗赤成瘡耳中痒作腎臟風治用四生散每作三二服即愈時稱為聖散聖惠方白附子黃芪獨活沙苑蒺藜也

一人拳毛倒睫用木螿子一个去殼為末綿裹塞鼻中左塞右右塞左一二夜其睫自分治法彙

陸肖愚治孫憲副夫人固怒氣患兩目赤痛兩太陽亦痛治及半月赤痛益劇且腫大如桃經行數日不止大便數日不行飲食不進頭眩吐逆脉之左弦右滑上下俱陽分有餘曰相火寄位于肝胆怒氣觸之其發如龍雷不可逆折病雖上劇而下緩然實因下而逆于上也用醋炒柴胡青



皮吳茱萸炒黃連鹽水炒黃柏酒炒黃芩白芍丹皮青黛  
竹茹爲煎劑以抑青丸合龍薈丸一日夜煎丸各二服遂  
減大半第大便未行經血未止煎劑仍前以抑青丸合潤  
字丸投之便行極澁進粥安睡明日諸症俱愈後以清氣  
養榮湯調理之。

一老人年八十四夜能細書詢之云得一奇方每年九月二  
十三日桑葉洗目一次永絕昏暗。宜五月五日六月六  
日立冬日採者佳

○ 倪新溪母陶氏哭子喪失明已十一年忽一人踵門曰吾能  
療瞽時其孫上成均宗黨會饌具在其人曰諸君但少留  
此視之發囊出針針其目兩眇目頓能見物撫其孫頂曰

吾久不覩汝，今成人矣。新溪德之手，百金謝其人，不受而去。衆以爲神。雲間雜誌

九江有夫，毆其婦，致雙睛突出。適有兵過其門，令勿動，取手

巾，水濕盛睛，旋轉使其系不亂。然後納入，卽以濕巾裹住。

令三日勿開。其婦性急，閉二日，遂解巾，眼好如故。但遇風

寒，常發痛云。解早之故也。奇疾方王帶存抄輯

晉顧含養嫂失明，嘗藥視膳，不冠不食。嫂目疾，須用蚺蛇膽。

含計盡不得，有一童子以一合授含，開乃蚺蛇膽也。童子

出門化爲青鳥而去。嫂目遂瘥。晉書

王叔權云，卽執中子遊學會稽，早觀書，辰牌方食，久之患目澁。

倦遊而歸同舍遺以鹽精數次揩目而疾除鹽精且爾則青鹽之治目固也古方用青鹽揩牙因掬在手洗目而目明鹽精乃鹽倉地下之精英資生經

○唐丞相李恭公扈從在蜀中日患眼或澁或生翳膜或即疼

痛或見黑花如豆大累累數日不斷或見如飛蟲翅羽百

方治之不效僧智深云相公此病緣受風毒夫五臟實則

瀉其子虛則補其母母能令子實子能令母虛腎是肝之

母今腎受風毒故令肝虛肝虛則目中恍惚五臟亦然脚

氣消中消渴諸風等皆由腎虛也此僧深得經旨雖未能暢發所以終是唐人高

手諸說紛紛徒亂人意耳地黃丸悉主之用生地黃熟地黃各一斤石

解防風皆去蘆枳殼炒去穢牛膝酒浸杏仁去皮尖各

四兩右為細末不犯鐵器煉蜜丸如桐子大空心以豆淋

酒下五十丸豆淋酒法黑豆半升淨揀簸炒令烟出以酒

三升浸之不用黑豆用此酒煮獨活即是紫湯百乙方

陸景淵之子患爛弦風眼兩背皆痛淚漬兩頰皆即成瘡百

藥不效因理故書得此方試點之須臾藥淚俱下循瘡中

流出其間有小虫自此遂愈甚妙黃連一兩淡竹葉一兩

柏樹皮乾用一兩而半濕用二兩右三味收咀以水二升

煎至五合稍冷用滴目眦及洗爛處日三四用全

咒偷針眼已結赤腫未成膿者神驗取患人衣衫角以手緊

爛眼皮方

捻定于所患眼大背上搵之每一搵卽念一聲移甚底移  
極眼如此一氣念七過搵七遍訖隨身就手撚令緊打一  
結結定自然便退直候眼安方解切在志誠不須令病人  
知咒語或欲自移亦甚可全上

朱丹溪治一人病眼至春夏便發當作鬱治用黃芩酒浸南星

薑製香附蒼朮俱童便浸連翹各二兩山梔炒一兩川芎童便浸一兩半陳皮

酒浸草龍胆酒蒸羅蔔子青黛各半兩柴胡三錢為末神麴糊丸服

之旬月而愈治法

華川陳明遠患瞽十齡百藥屢嘗而不見効自分為殘人松

陽周漢卿視之曰是醫翳雖在內尙可治用針從眥入睛

背捲其翳下之。目歛然。辨五色。陳以爲神。續粹

趙良仁云、丹溪先生嘗用參膏治一老人目暴不明昏暗。如

夜正靈樞謂氣脫者。目不明是也。余亦曾治一土人患頭

風連左目壅痛。從戴人法。于百會上星出血。皆不效。遂在

頭偏左之足太陽所過第二行。與上星對平。按之痛甚。處

出血立愈。由是而言。針之與藥。必切中病所。藥與邪對。然

後可愈。前人之方。不過立規矩耳。藥要或問

繆仲淳從父病後眼花。服此立愈。蓋肝腎二經虛也。真甘枸

杞一斤。去蒂。真懷生地黃。一斤極肥大者。酒洗淨。河水砂鍋內熬膏。

以無味爲度。去渣重湯煮。滴水成珠。便成膏也。每膏一斤。

入煉蜜六兩。空心白湯化下。廣筆記

○黃學諭潛白患風淚眼。每出則流淚盈頰。繆仲淳疏一方寄

之。穀精草為君。疾藜和枸杞之屬佐之。羊肝為丸。不終劑

愈。全上

▷薛立齋治一男子眼赤痒痛。時或羞明下淚。耳內作痒。服諸

藥不效。氣血日虛。飲食日減。而痒亦盛。此脾腎風熱土攻

也。以四生散。白附子黃芪獨活砂苑疾藜酒調四服而愈。又一人頭目

暈眩。風膚瘙痒。搔破成瘡。以八風散治之亦愈。

○張石頑治澄和尚患眼疾二年。服祛風清熱藥過多。致耳鳴

嘈嘈不止。大便艱苦燥結。近左眼上有微翳。見燈火則大

如斗見月光則小如螢張曰此水虧而陰火用事也月乃陰精腎水內涸不能泛濫其光故視之甚小燈本燃膏之焰專擾乎陰不能勝其灼爍故見之甚大合脉叅證知爲平日勞傷心脾火土二臟過燥並傷腎水真陰也遂疏天王補心丹與之他如徐中翰燕及見日光則昏眊如蒙見燈火則精彩倍常此平昔恒勞心腎上盛下虛所致上盛則五志聚於心胞暗侮其君下虛則相火失職不能司明察之令得燈燭相助故精彩勝常此與嬰兒胎寒夜啼見火則止之義不殊專事眼科者能悉此義否

土齋曰世傳明皆初生小泡視其背上卽有細紅點如瘡以



針刺破眼時卽瘥故名偷針實解太陽經結熱也。人每試之有驗。

張子顏少卿晚年常目光閃閃然中有白衣人如佛相者子顏信之彌謹乃不食肉不飲酒然體瘠而多病矣一日求汪壽卿診卿一見大驚不復言但投以大丸數十小丸千餘粒囑曰此十日內服之當盡却以示報既如約視所見白衣人變黃而光無所見矣乃欲得肉食欲思飲酒又明日黃亦不見竟氣象異他日矣乃詣壽卿以告卿曰吾固知之矣公脾初受病爲肺所乘心脾之母也公旣多疑心氣不固自然有覩吾以大丸實其脾小丸補其心肺爲脾

之子既不能勝其母而病自愈矣。

道山清話  
未選入

△

沈存中云子為河北察訪使時病目赤四十餘日黑睛傍黯赤成瘡晝夜作楚百治不效。郎官邱革相見問子病目如此。曾耳中痒否。若耳中痒即是腎家風。有四生散療腎風。每作二三服即瘳。間里號為聖散子。予傳其方合服之。午後一服臨卧一服。目反大痛。至二更乃能眠。及覺目赤稍散不復痛矣。更進三四服。遂平安如舊。是時孫和甫學士帥鎮陽。聞予說大喜曰。吾固知所以治目矣。向久病目嘗見呂吉甫叅政曰。頃目病久不差。服透冰丹乃瘳。如其言修合一劑試服了二三十服。目遂愈。乃知透冰丹亦療腎

風耳。未選

入

龔子才治一人兩目作痛服降火祛風之藥兩目如緋熱倦殊甚用十全大補湯數劑諸症悉退後服補中益氣湯兼六味丸而愈復因勞後目澁體倦仍取十全大補而痊

一人目赤不明服祛風散熱藥反畏明重聽脉大而虛此因勞心過度飲食失節以補中益氣湯加茯神棗仁山藥五味頓愈又勞役復甚用十全大補兼前藥而痊

前日與歐陽叔弼晁無咎張文潛同在戒壇子病目昏將以熱水洗之文潛曰目息黠洗目有病當存之齒有病當勞

也雄按此治目疾之妙法蓮華經也庸人自擾宜乎育矣不可固也又記魯直語云治目

當如治民。治齒當如治軍。治民當如曹叅之治齊。治軍當如商鞅之治秦。頗有理。故追錄之。

東坡志林

△相公崔公慎由廉察浙西。左目皆生贅。如息肉。欲蔽瞳人。悶極。諸醫方無驗。譚簡見曰。此立可去。但能安神不撓。獨斷于中。則必效矣。崔公曰。如約。雖妻子必不使知。譚又曰。須用九日。清明亭午。于靜處療之。若其日果能遂心。無憂矣。是時月初也。至六七日間。忽陰雨甚。譚生極有憂色。至八九大開霽。問崔公飲酒多少。崔曰。量雖至小。亦可引滿。譚大喜。是日于使宅北樓請飲酒數杯。端坐無思。俄而譚以手微捫所患。曰。殊小事耳。初覺似拔之。雖痛亦可忍。又聞

動剪刀聲。乃白崔曰：此地稍暗，請移往中庭坐。既定，聞櫛然有聲。先是譚請好綿數兩，染縫。至是以絳綿拭病處，兼傳以藥，遂不甚痛。請開眼看，所贅肉大如小子，指堅如乾

筋。遂命投之江中。後數日，詔徵入秉鈞。

因語錄  
唐趙璘

○魏玉橫曰：金封翁年近七旬，病暈厥，卽類中風也。小愈後，眼花不良，干步或教以一味白蒺藜水，泛爲丸，每早晚服四

錢，既可祛風，又能明目，且價廉而工省，纔服數日，覺口咽苦燥，再服遂陡然失明，重以鬱怒，暈厥復作，目閉不語，汗出如珠，延診脈已散亂，姑以熟地二兩、杞子一兩煎服，一

時醫至不敢主方，欲就中加附子一錢，謂重劑純陰宜少。

入陽藥。余曰：此症外間多用參附湯，有致筋枯皮黑，人未死而半身先死者，以衰微之陰被劫也。

雄按此真閱歷之言，余亦目擊多人。

矣。今症屬三陰虧竭，五志之火上炎，故卒然暈厥，且病人

以誤服白茯苓之燥，失明而病作，寧可再服附子，醫乃默然去二味，服下神氣漸甦，乃減半入沙參、麥冬、沙苑、蒺藜而愈。今常服之，兩年許能辨磁器花色矣。後復更醫，不知何病而卒。

盧玉川年六旬外，久病脇痛，凡一切香竄古方莫不遍嘗，後一醫與丸方，以胡盧巴爲君，餘多伐肝之品，服之脇痛果暫愈。既而一目失明，猶不謂藥之誤也，再服則兩目俱損。

脇痛轉甚。延診以大劑生熟地、杞子、女貞、沙參、麥冬、萸仁與之一服。卽愈。始悟向藥之非。然目中黑水、神光枯竭。已久不能復矣。

一人年二十左右。求診無他病。唯日入則兩目無所見。此卽諺語所謂雀盲是也。其脈唯左關大。左尺極微。語之曰。君得毋新婚乎。曰然。與生地、杞子、牛膝、甘菊、沙參、麥冬、女貞四劑而愈。因戒其房幃。樽節。否則再發。成廢人矣。

方懋春內人患瘡。荆防二味爲時師治瘡所不可缺者。服四劑。不慮其芳香燥烈。竟致兩目赤腫。眵淚成障也。已逾月。漸次失明。診之兩寸上溢。且弦數。令以前方加當歸、白芍。

數服而愈。其姪亦同此患。時已瞳人。迸出不及藥矣。

消障救睛散。石蠅錢半。生研。羚羊角一錢。草決明一錢。連翹錢半。白蒺藜一錢。龍胆草五分。酒炒灰。甘菊八分。木賊草五分。漢防已一錢。茺蔚子一錢。水二盅。煎八分。食遠服。王晉三曰。白睛胬肉。狀若魚胞。世人咸用外點鈎割。殊非正治。余因製此方。以石蟹爲君。性大寒而燥。去溼。翳消。胬肉如鼓。應桴。堪稱仙品。佐以羚羊角之精靈。熄肝風。散惡血。草決明療青盲。去白膜。連翹瀉客熱。散結氣。專泄大小眚之熱。酒炒龍胆草。退溼熱之鬱翳。白蒺藜散風破血。木賊防已。療風勝溼。甘菊化風。茺蔚行血。諸藥皆入肝經。仍能



上行於肺。用之屢驗。

○尤在涇曰：目赤腫痛，人知降火，而不知活血。所以多不得力。只用四物湯內地黃用生。芍藥用赤。加蒸大黃、赤茯苓、薄荷葉治之甚妙。此戴復菴法也。余謂目赤腫痛，人知活血，而不知治痰。脾胃壅滯，積熱生痰。積痰生熱，輾轉相因。氣沖頭目，昏痛不已者，須用半夏、石菖蒲、黃芩、枳實、茯苓、陳皮、微兼菊花、白蒺藜之屬治之。

耳

許叔微治一男子年二十歲，因瘡毒後腎經熱，右耳聽事不

明每心中拂意則轉覺重虛鳴疼痛地黃湯生地枳殼羌活桑白皮磁石甘草防風黃芩木通右為粗末每服四錢水煎日二三服不拘時候

綱目

朱丹溪治馮官人左耳鳴此因勞得之法當補陰而鎮墜之

黃耆人參當歸陳皮茯苓升麻酒柏防風甘草白芍食前

熱飲飲了去眠一

綱目其方則似補氣而升舉之非補陰鎮墜也

薛立齋治一人耳內不時作痛痛時欲死痛止如故六脉皆

安非瘡也。話間忽作。度其有蟲。令急取猫尿滴耳。果出一

臭蟲。遂不復痛。或用麻油滴之。則蟲死難出。或用炒脂麻

枕之。蟲亦出。但不及猫尿之速也。

取猫尿法用生羌擦猫鼻其尿自出

趙養葵治一小兒患耳膿醫以藥治之經年累月不效殊不知此腎疳也。用六味丸加桑螵蛸服之愈。

吳孚先治張司馬素有火症兩耳腫痛係少陽風熱勸延針灸科刺聽會合六臨泣尋愈。

柴嶼青治汪謹堂夫人兩耳蟬鳴昕夕不歇服過人參熟地四兩無少效柴曰腎開竅于耳心亦寄竅于耳治耳必責之腎固矣。但診得兩尺尚屬有神決非腎虛左寸亦平緩無病。惟右寸關洪大。此肺胃兩部風熱所壅而致。遂不治病而治脉。雄按鼻塞治心耳聾治肺非僅治脉也。用清解之劑。不數服而右

耳已愈。再服數劑兩耳全愈。因思耳目口鼻雖于五臟各

有分屬而內實相通治病惟以切脈爲憑夫固有治在此而效在彼者全在一心之圓機活法也

李元淳尚書在河陽日蝮蛇入耳無計可爲將悶有聲至以

頭擊門柱奏狀危困御醫療之不驗忽有人獻方用胡麻

油作餅枕卧須臾自出乃愈

圖經本草綱目

江湖記聞云有人壁風入耳頭痛不可忍百藥不效用稻稈

灰煎水灌入卽死而出也又蒿草搗汁滴入亦能出百蟲

入耳

本草綱目

薛立齋治一婦人耳內或耳後頂側作痛寒熱口苦月經不

調此肝膽經火兼傷脾胃用四君加柴胡升麻黃耆白芍

而愈。後因勞役怒氣嘔吐脇脹。用六君子湯加山梔柴胡而安。

一婦人耳內外腫痛胸脇不利寒熱往來小便不調此肝火傷血先用龍胆瀉肝湯四劑諸症頓退又用加味逍遙散而愈。又因怒復作用小柴胡湯而痊。

一婦人經行後因勞怒發寒熱耳作痛以經行為血虛用八珍湯加柴胡怒氣為肝火用加味逍遙散勞役為氣傷用補中益氣湯加山梔而愈。

一婦人素鬱怒耳內作痛腫焮寒熱面色青黃經行則變赤用加味歸脾湯加味道遙散而愈。

一婦人懷抱素鬱。因怒耳作腫痛。經行不止。發寒發熱。面色青赤。肝脉弦數。此久鬱傷脾。暴怒傷肝。先用加味小柴胡湯。隨用加味逍遙散而痊。

一婦人因怒發熱。每經行兩耳出膿。兩太陽作痛。胸脇乳房脹痛。或寒熱往來。或小便頻數。或小腹脹悶。皆屬肝火血虛。先用梔子清肝散二劑。又用加味逍遙散數劑。諸症悉退。乃以補中益氣而痊。

喻嘉言議王。大司馬耳鳴症曰。人之陽氣走上竅。而下入於陰位。則有溺泄腹鳴之患。陰氣走下竅。而上入於陽位。則有窒塞耳鳴之患。故人當五十以外。腎氣漸衰於下。每每

從陽上逆。腎開竅於耳。而以肝木爲之子。是以謀慮鬱怒之火一動。卽疏洩母氣。而陰氣從之上逆。與聾病相去天淵。聾病者。竅中另有一膜遮閉。外氣不得內入。故以開竅爲主。方書所用菖蒲麝香。及外填內攻等法。皆爲此而設。耳鳴乃陰氣沖至上竅。亦隔一膜。不能越出竅外。止於竅中。薄薄有聲。如蛙鼓蟬鳴。外入之聲。爲內聲所混。聽之不清。若氣稍不逆上。則聽稍清。氣全不逆上。則聽全清矣。治此之法。以重用磁石爲主。以其重能達下。性主下吸。又能制肝木之上吸也。用地黃龜膠羣陰之藥輔之。更用五味山萸之酸。以攻之。令陰氣自旺於本宮。不上觸於陽竅。然

後清清明朗。聲入卽通。無壅碍也。方書指爲少陽胆厥陰肝。二經熱多所致。然少陽之氣能步走上竅。皆絡於巔頂。無觸筋冲耳之理。不當與厥陰混同立說。通聖散一方。汗下兼用。乃治壯火之法。惟滾痰丸少壯用之。多有效者。以黃芩大黃沉香之苦。最能下氣。而礞石之重墜。與磁石之用相仿也。高年之人。腎水已竭。真火易露。故腎中之氣。易出難收。况有厥陰之子。爲之挹取乎。然則壯水之主。以制陽光。如蓋中添油。燈焰自小。豈非良治哉。

一婦人耳內腫痛。出水寒熱口苦。腫連頸項。飲食少思。此肝火甚也。用小柴胡湯加山梔丹皮稍愈。又加味逍遙散漸



愈用八珍湯加柴胡丹皮山梔調補肝脾全愈。

一婦人耳內腫痛胸脇不利寒熱往來小便不調此肝經發熱也。用龍胆瀉肝湯四劑諸症頓退。用加味逍遙散而愈。又因怒復作。用柴胡清肝散而痊。

一婦人耳內不時脹痛內熱口乾勞則頭暈吐痰下帶此肝脾氣虛也。朝用補中益氣。夕用加味逍遙散而痊。

一寡婦耳內外作痛不時寒熱脉上魚際此血虛之症用小柴胡加生地以抑其血而愈。又頂間結核如貫珠寒熱晡熱用加味歸脾湯加味逍遙散調補肝脾而愈。

一婦人耳內外或作痛或赤腫或寒熱月經旬日而止潮熱

內熱自汗盜汗此肝脾氣血俱虛而有熱用歸脾湯六味丸而愈

一婦人性急或耳內作痛或耳外赤腫發熱脇脹日晡益甚此怒氣傷肝氣血俱虛朝用加味逍遙散加黃柏桔梗夕用歸脾湯送地黃丸而愈

一孀婦耳內外作痛或頂側結核內熱晡熱月經不調吐痰少食胸膈不利此鬱怒傷肝朝用歸脾湯以解脾鬱生脾氣夕用加味逍遙散以清肝火生肝血而愈

一女子耳下腫赤寒熱口苦月經不調小腹內結一塊此肝火氣滯而血凝也先用小柴胡加山梔川芎丹皮又用柴

胡清肝散而痊。

一婦人耳腫痛發寒熱與荆防敗毒散四劑表症悉退以散腫潰堅湯數劑腫消大半再以神效瓜蔓散四劑而平。

一男子肝經風熱耳下腫痛發熱脈浮數以薄荷丹治之愈。  
薄荷皂角連翹三稜首烏蔓荆豆豉荆芥

一男子每怒耳下腫或脇作痛以小柴胡湯加青皮木香紅花桃仁四劑而愈。

一婦人耳鳴內熱經行不調肢體倦怠飲食無味以肝脾虛熱用四君加柴胡山梔丹皮甘草而愈。

一男子耳內出膿或痛或痒服聰耳益氣湯不應服防風通

聖散愈甚以補腎丸治之而愈

魏玉橫曰朱余二女中表姊妹也年十六七朱則耳痛常發癰瘰因感冒痛暴甚耳門連頂皆腫以養青湯加黃芩羚羊萸仁二劑而愈余則耳痛常流膿水因患瘡醫與荆防發之遂出血不止隔間曹辣前方去羚羊加知母赤芍二劑血止數劑膿水乾二人脉皆關弦寸鼓乃腎與肝胆之火也

余某早失怙恃困苦顛連年十四就西溪吳氏質庫食力值冬月查盤提唱勞劇忽右耳暴痛不可忍如刺如錐約一日夜內起一疱迸出黃水涓滴不絕數日乃乾第水出則

痛減水乾則痛除。自後過勞，卽發其痛，至欲求死。如是者年必數次。偶問一醫，彼見少年得此，謂由暴怒傷肝，瘀血爲患。教服抵當丸，不知此屬勞傷肝腎，龍雷之火上攻而然。幸合藥時，肆中無蝨蟲水蛭，竟因循不服。後年二十餘，右耳漸聾，病遂不作。蓋此中經絡枯絕，火亦不能透達也。

雄按：余亦十四歲失怙而廢書，服賈雖困苦備嘗，而尙不致有疾者，以母氏主持家事也。讀此，旣感少境之與先生相類，又憾學術空疎，不能起老母之危疴，涕淚交流爲之掩卷。

葉天士治丁某，腎開竅於耳，心亦寄竅於耳，心腎兩虧，肝陽亢逆，故陰精走泄，陽不行依。是以耳鳴時閉，但病在心腎。其原實由於鬱，鬱則肝陽獨亢，胆火上炎。清晨服丸藥以

補心腎。午服湯藥。以清少陽。以胆經亦終於耳也。水煮熟地四兩。麥冬一兩半。龜板二兩。牡礪兩半。白芍兩半。北五味一兩。建蓮兩半。磁石一兩。茯神兩半。沉香五錢。辰砂五錢。爲衣煎方。夏枯草二錢。丹皮一錢。生地三錢。山梔一錢。女貞子三錢。赤茯苓半。生甘草四分。

徐靈胎曰。方極清和可喜。耳聾之法多端。大端不過清上鎮下二條。此案方極穩當。至於外治之法。及虛寒等症。亦不可不知也。

# 鼻

張子和治常仲明嘗于炎暑時風快處披露肌膚為風所賊

三日鼻塞雖坐於暖處少通終不大解使服通聖散入生

薑葱根豆豉同煎三兩服大發汗鼻立通矣此由傷風而得

有人患鼻中有瘰肉垂出鼻外不聞香臭用瓜蒂細辛等分

為細末以綿包如豆許塞鼻中須臾鼻即通瘰肉化為黃

水點滴至盡三四日愈又聖惠方用陳瓜蒂以羊脂和傅

上日三次效醫學綱目

薛立齋治一男子面白鼻流青涕不聞香臭三年矣此肺氣虛也

用補中益氣湯加山梔麥冬而愈

陳都憲夫人患鼻疳爛通鼻孔用鹿角一兩白矾一兩瓦上

煨過人頭髮五錢。燈火上燒過爲末。用花椒湯洗淨。糝藥  
疳上三四次。卽愈。如不收口。瓦松燒灰存性。研末乾糝之  
卽收。

一人酒齷鼻紅赤。用金花丸晚服。

苓連梔柏大黃桔槿  
白葛粉井水爲丸

用六

味。地黃丸全料。加當歸二兩。苦參四兩。空心服。不兩月而  
愈。

孫文垣治吳儀制尙卿弱冠時病鼻塞。不能歎者四年。且衄  
寒月更甚。口渴咽喉邊有痰核。脉之右寸關洪滑。此肺經  
痰火症也。與前胡秦芫葛根薄荷石膏天花粉元參貝母  
山梔甘草白藥子桔梗丹皮四帖而衄止。夜與牛黃三清



丸數粒噙之。鼻氣卽通利。能嗅噙未旬日全愈。

一婦人方妙齡。表虛易感風寒。致成鼻淵。流清涕不止。便覺頭暈。兩太陽常痛。且多噴嚏。脈之兩寸洪大。用秦艽酒苓桑白皮馬兜鈴各八分。白芍一錢。滑石石膏各二錢。枳殼蔓荊子各五分。甘草三分。四帖而愈。

病鼻赤者。乃陽明胃經火上炎。一方只食鹽一味。研細。每晨起撮少許擦齒。噙水蕩漱。旋吐掌中。掬以洗面。行之月餘。而鼻色復舊。且有益于齒。蘇談

吳孚先治一人。患鼻淵十載。乃脾肺氣虛下陷。須用補中益氣湯。百劑方愈。不信用白芷防風辛夷川芎等味。病轉甚。

復求治。與前方百帖而痊。

丹溪治一中年人右鼻管流濁且臭脉弦小右寸滑左寸濇

灸上星三里合谷。次以酒苓二兩蒼朮半夏各一兩辛夷

川芎白芷石膏人參葛根各五錢分七帖服之全愈。乃痰

鬱火熱之症也。大還

一人鼻中流臭黃水腦亦痛名控腦沙有蟲食腦中用絲瓜

簾近根三五尺許燒存性為細末酒調服即愈。又灸法顙

會。在鼻中直上入髮際二寸再容豆是穴通天。在顙會上一寸兩旁各一寸灸七壯隨鼻

左右灸。常見灸後去臭肉一塊從鼻中出臭不可言而愈

有人卒食物從鼻中縮入腦中介介痛不得出以牛脂或羊

彙

脂如指頭大內鼻中以鼻吸入須臾脂消物逐脂出也治法

孫文垣治從姪中叔以暑月赴南雍一日假出索茶飲之趣  
從左鼻逆流而出入腹者十之三治幾一月卽粥飯亦多  
鼻出矣服藥漸加惡心頭暈肌削四肢無力診畢詢醫作  
何症投何劑曰僉謂此疾書所不載治法無稽或云胃火  
或云諸逆上衝皆屬肝火所用非黃連解毒卽三黃石膏  
及諸苦寒之劑自以多飲火因酒動理或爲然然竟無效  
曰治病貴辨經絡之貫通與臟腑之出入豈拘拘徒守方  
書而已哉經云咽喉者水穀之道路氣之所以上下者也

頤頰者分氣之所洩也。人之涕出不收者。頤頰不開也。此症亦類是耳。頤頰不開。故氣上而不下。會厭弱而不能揜其氣喉。夫鼻干氣喉相通。惟不揜。故飲食逆從鼻竅而出。不見常人偶氣逆。則飲食從噴嚏出乎。今右脉緩弱無力。氣虛明矣。經云形寒飲冷則傷肺脾胃喜溫而惡寒。因多服寒涼。所以惡心頭暈肌削也。蓋肺屬金而主氣。金氣旺則收斂下降。氣下降則飲食自不逆矣。六君子湯加辛夷。桑白皮。苡仁。沈香。一進而勢緩。三進而止大半。七劑全安。王執中母氏久病鼻乾。有冷氣。問諸醫者。醫者亦不曉。但云疾病去自愈。既而病去亦不愈也。後因灸絕骨而漸愈。執

中亦常患此偶絕骨微疼而著艾鼻乾亦失去初不知是  
灸絕骨之力後閱千金方有此症始知鼻乾之去因灸絕  
骨也若鼻涕多宜灸顙會前頂大人小兒之病初無異焉

許知可自停飲食已必嚏服棗膏丸而愈

本事方

孫氏姑鼻不聞香臭有年矣後因他病友人繆仲淳爲處方  
每服用桑皮至七八錢服久而鼻塞忽然通矣

魏玉橫曰沈晉培年三十許患鼻淵黃濁如膿時醫以爲風  
熱上淫干腦與薄荷辛夷川芎蒼耳白芷蔓荊古方治之  
不效反增左邊頭痛所下涕亦唯左鼻孔多就診曰此肝  
火上炎爲疾耳與生熟地杞子沙參麥冬十餘劑而愈是

症由傷風用力去涕而得者易愈。若因火盛而成，必由水虧而致。蓋肝脉上絡巔頂，督脉會腦爲髓海，爲龍火鬱蒸，故膿濁腥穢源源而下。有若淵然久之，督脉之髓亦隨輸泄，致成勞損者，有之。醫學自立齋以前，宋元明初諸公未詳肝腎之治。至國朝諸老亦漸講明。然多襍耆朮桂附，惟集靈膏一方最善治法，秉載之。但云吳中一醫用之所向神效，是亦知其然而未知其所以然也。故守兔園一冊，其覆餗多矣。

一瞽者徐姓，年三十來，鼻淵年餘，醫亦與辛散，服之覺反甚，遂堅守不藥之戒。此古人心靜自能消息病情，故不爲庸

手所誤後遇予教服集靈膏十餘帖而愈。

一費氏子年二十餘亦患此症時師與辛夷蒼耳芎芷荆薄荷之屬至百二十劑後就診于予兩手脉神氣索然告以不可治矣果月餘而歿。

廣筆記曰經云膽移熱於腦則爲鼻淵夫髓者至精之物爲水之屬腦者至陽之物清氣所居今爲濁氣邪熱所干遂下臭濁之汁是大能消物腦有所傷也治法先宜清肅上焦氣道繼以鎮墜心火補養水源此其大略耳藥多取夫辛涼者辛爲金而入肺有清肅之義故每用以引散上焦之邪如薄荷荆芥甘菊連翹升麻鼠粘子天麻之屬鎮墜

心火補養。水源如犀角人參。天冬麥冬。五味硃砂甘草。山藥生地茯苓丹皮之屬。然須兼理肺肝。蓋鼻乃肺竅。而爲腦氣宣通之路。又治乎上焦。而行清肅之令。胆爲脊升少陽之氣。與厥陰爲表裏。而上屬於腦。戴人有云。膽與三焦。尋火治內經。謂膽。愒由肝。義亦明矣。理肺用桑皮鼠粘桔梗。二冬花粉竹瀝。清肝胆以柴胡白芍。羚羊角竹茹棗仁。川芎。或者謂世人多用辛溫辛愒之藥。取效。此義何居。蓋辛愒甘溫。多能宣通發散。故病之微者。亦能奏效。此從治。劫法。非不易常經。明者察之。



# 口

張子和治相臺監酒岳成之病瘡、滑泄、日夜不止、腸鳴而口瘡、俗呼爲心勞口瘡、三年不愈、令以長流水同薑棗煎五苓散、五七錢、空心使服之、以治其下、以宜黃連與白茯苓去皮、二味各等分爲末、以白麪糊爲丸、食後溫水下三五十九丸、以治其上、百日而愈。

作溼  
火治

一男子病口瘡數年、上至口中、至咽喉、下至胃脘、皆痛不敢食、熱物一涌、一泄、一汗、病去其九、次服黃連解毒湯、不旬

日旨釋、作實  
火治

一男子年二十餘、病口中氣出、臭如發、厠雖親戚莫肯與對語。張曰、肺金本主腥、乃金爲火所煉、火主焦臭、故如是也。久則成腐、腐者腎也。此熱極則反兼水化也。病在上宜涌之。先以茶調散涌之、去其七分。夜用舟車丸、濬川散下五行。比旦而斷。嗚呼、人有病口臭、而終其身者、世說以爲肺系偏、而與胃相通、故臭妄論也。

立齋治廷評曲汝爲、口內如無皮狀、或咽喉作痛、喜熱飲食、此中氣真寒、而外虛熱也。用加減八味丸而愈。虛寒

一人胃弱痰盛、口舌生瘡、服滾痰丸愈甚、反瀉不止、惡食倦怠、此胃氣被傷也。與香砂六君子湯、數劑少可、再以補中

益氣湯加半夏茯苓而愈。

立齋治一男子口臭、牙齦赤爛、腿膝痿軟、或用黃柏等藥益甚、時或口鹹、此腎經虛熱。以六味丸悉愈。虛熱

孫文垣治汪東之、手談過勞、口中生瘡、凡進大苦大寒之劑、十餘日瘡益甚、延及於喉、藥食難進、脈之六部俱豁大無力。有耑科欲敷口疳藥、令以荊芥湯洗而引之、攪出稠涎、二三碗傾於地。偶二雞爭啄之、立斃。其毒如此、亦症之奇者。乃囑其用藥、只可吹入喉中、必俟喉全好然後敷舌、舌好再敷口、唇毋得概敷、令毒無出路。反攻入喉、則誤事矣。謂其父曰、此虛陽口瘡也、非附子理中湯不可救。曰、瘡乃

熱症。况上身已熱。又天時酷暑。大熱之劑。其敢進乎。曰此陰盛格陽之症。悞服寒涼。激之。試探兩足必冷。按之果然。遂與人參白朮各三錢。大附子炮薑炙甘草各一錢。水煎冷服。服後卽酣睡達旦。次早能食粥半盞。足膝漸暖。藥仍如舊。適散步午歸。見舉家號慟。曰本熱病誤服熱藥。今舌腫大。塞滿口中。不能言語。不可爲矣。駭其驟變。再服之。則六脈斂而有神。面色亦和。獨舌脹大。心知爲寒涼敷藥所致也。乃詰之曰。今日可用數藥否。曰。已二次矣。令急取官桂研末五錢。以生薑自然汁調塗舌上。塗訖則涕淚流出。口內涎垂。舌頓消去。卽令取粥與食。使壓之。庶虛火不再。

升。蓋舌滿脹者。乃敷藥寒涼。閉其毒氣。毒無從出故耳。以桂調薑汁塗之。辛散之義也。

黃師文父病口瘡。師文治之不愈。心訝之。乃密訪諸婢。果其父嘗晝同一婢子寢。明日瘡作。師文卽詳其時節。明日卽用其父所寢時。令其父淨濯足。以其藥貼腳心。瘡不外吳茱萸生

附子等藥  
北窗炙輒

盧不遠治李某口舌生瘡。幾三年矣。脈浮細急數。按之空虛。而尺尤甚。用立齋虛火不歸經法。以加減八味九料。二劑卽愈。

柴嶼青治吳穎菴少庭尉甥。年三十。口舌生瘡。下部泄瀉。

脈尺弱而無力。寸關豁大。此陰盛於下。逼陽於上。若用涼藥清火。則有礙於脾。用燥藥治脾。則有礙於舌。惟有引火歸源之法。竟用附子理中湯。冷飲送入。味丸三錢。兩服頓愈。

光祿卿李瀛少夫人患口瘡。醫屢投清火寒涼之劑。無效。更兼泄瀉。飲食少思。始求治。按其右關微弱。知係胃虛。穀少。復爲寒涼損傷。致脾胃虛衰之火。被逼上炎。則爲口瘡。元藏虛寒。則爲泄瀉也。惟補其火。散其寒。則火得所助。接引而退舍矣。方用人參白朮附子炮薑炙甘草。李君畏不敢與服。逡巡數日。勢益困勉。用前方連進數劑。卽安。蓋口瘡

非止一端。有上焦實熱。中焦虛寒。下焦陰火。各經傳變所致。必須分別治之。不可執也。

陸養愚治姚明水。天稟素弱。脾腎兩虛。幸能節養。兼服溫補之劑。中年頗健啖。因無子。置妾。遂患口瘡齒痛。初以涼膈散數錢服之。卽愈。自後常發。常服。至半年許。滿口腐爛。飲食不進。脈之兩寸浮數而微。關尺浮弱而澁。謂形雖有餘。精仍不足。當嚴守禁忌。服滋補藥。涼劑不可再投矣。用八物湯。倍地黃。以峻補腎水。加桂附各一分。引火歸原。經謂折之不去。求其屬以衰之是也。煎就涼服十劑。其患如失。

薛立齋治儒者劉允功。形體魁偉。冬日飲水。自喜壯實。薛曰。

此陰虛也不信一日口舌生瘡或用寒涼之劑肢體倦怠發熱惡寒乃與六味地黃補中益氣而愈

王肯堂治常熟嚴養翁相公春秋高而求助於厚味補藥以致胃火久而益熾服清胃散不效加山梔荅連而益甚以爲涼之非也疑其當補聞王善用人參因延診而決之纔及門則口中穢氣達於四室向之欲噦此正清胃散症也獨其熱甚當用從治而既失之今且欲從而不可矣當求其屬而衰之用天冬麥冬生地熟地石斛升麻犀角蘭香之類大劑投之數日而臭已止矣經云諸病寒之而熱者取之陰所謂求其屬也火衰於戊故峻補其陰而熱自己



後因不屏肉食。胃火復作。大便秘。目翳耳鳴。不能自忍。雜進寒涼。時或利之。遂致不起。嗟乎。苟知其熱涼之而已。則塗之人。皆可以爲盧扁。何事醫乎。鬱崗齋筆塵

邑侯許少微患口糜。王謂非乾薑不能愈。許猶疑之。後竟從王言而愈。從子懋錡亦患此甚危急。熱甚。惟欲飲冷水。王用人參白朮乾薑各二錢。茯苓甘草一錢。煎成冷服數服。乃已噫。此豈可與拘方者道耶。

口瘡無論新舊。遇夜臥時。將自己兩掌丸。以手握緊。左右以手揉之。三五十遍。每夜睡覺輒行之。愈於服藥。蘇談

一齋治一男子口舌生瘡。服涼藥愈甚。治以理中湯而愈。

又一男子口舌生瘡飲食不甘勞而愈甚亦與前湯頓愈  
一男子口糜爛服涼藥愈甚脈數而無力以四物加酒炒梔  
柏元參一劑頓退四劑而痊

一男子口舌生瘡脈浮而緩飲補中益氣湯加炮薑更以桂  
末含之即愈又一男子患之勞而愈盛以前藥加附子三  
片三劑即愈丹溪云口瘡服涼藥不愈者此中焦氣不足  
虛火泛上無制用理中湯甚則加附子

一婦人常口舌糜爛頰赤唇乾眼濇作渴脈數按之則濇此  
心肺壅熱傷於氣血爲患名熱勞症也當多服滋陰養血  
藥彼欲速效用敗毒寒劑攻之後變瘵症而歿婦人良方

云婦人熱勞者。由肺壅熱。傷於氣血。氣血不調。臟腑壅滯。熱毒內積。不得宣通之所致也。其候心神煩躁。頰赤頭痛。眼濇唇乾。四肢壯熱。煩渴不止。口舌生瘡。神思昏沈。嗜臥少寐。飲食無味。舉體痠疼。或時心怔。或時盜汗。肌膚日漸消瘦。故名熱勞也。

焦秀才病口苦。羅謙父製龍膽瀉肝湯治之。得效。內經云。有病口苦。名曰膽瘰。乃肝主謀慮。膽主決斷。爲清淨之府。肝取決於膽。膽或不決。爲之恚怒。怒則氣逆。膽汁上溢。故口苦。或熱盛使然也。寶鑑

羅謙甫治梁齊民膏粱多飲。因勞心過度。肺金有傷。以致氣

出腥臭涕唾稠黏咽隘不利。口舌乾燥。以加減瀉白散主之。難經云。心主五臭。入肺爲腥臭。此其一也。因大飲大熱之氣所傷。從心火刑於肺金。以桑皮地骨皮苦微寒。降肺中伏火。而補氣爲君。以黃芩知母苦寒。治氣腥臭。清利肺氣爲臣。肺欲收急。食酸以收之。五味子酸溫。以收肺氣。麥冬甘寒。治涕唾稠黏。口苦乾燥爲佐。桔梗辛溫。體輕浮。治痰逆利咽膈爲使。服數劑而愈。

尤在涇曰。王肯堂治許少薇口糜。謂非乾薑不愈。卒如其言。又從子懋語亦患此。勢甚危急。欲飲冷水。與人參白朮。乾薑各二錢。茯苓其車各一錢。煎成冷飲。日數服。乃已。蓋土

溼則火斂。人多不能知此。所以然者。胃虛食少。腎水之氣。逆而乘之。則爲寒中。脾胃虛衰之火。被迫上炎。作爲口瘡。其症飲食少思。大便不實。或手足逆冷。肚腹作痛。是也。

# 唇

李大富而極鄙吝。唇生肉鬚一尺長。痛不可忍。或云用刀。或云用藥。鄰有金先生者曰。我能治。須講定謝金。方醫。衆親友講以十兩爲謝。金用末藥一匕。爐中燒烟熏之。卽落去。一寸袖手索謝。李先付一兩。五日已好。及講完前約。乃堅不與矣。金笑曰。逆知其然也。明年必發。卽百金不用藥。後

果發遂死焉。扁鵲謂重財者為六不治之一見續金陵瑣事

晉魏詠之生而免缺有善相者謂之曰卿當富貴年十八聞

荊州刺史殷仲堪帳下有名醫能療之貧無行裝謂家人

曰殘醜如此用活何為遂齋數斛米西上以投仲堪既至

造門自通仲堪與語嘉其盛意召醫視之醫曰可割而補

之但須百日進粥不得笑語詠之曰半生不語而有半生

亦當療之况百日耶仲堪於是處之別室令醫善療之遂

閉口不語惟食薄粥百日而瘥槎菴小乘

薛立齋治一婦人懷抱久鬱患繭脣襍治消痰降火虛症悉

具盜汗如雨此氣血虛而有熱也用當歸六黃湯內黃芩

連柏俱炒黑。二劑而盜汗頓止。仍用歸脾湯。八珍散兼服。元氣漸復。更以逍遙散加歸脾湯間服。百餘劑。唇亦瘥。

一婦人唇裂內熱二年矣。每作服寒涼之劑。時出血水。益增他症。此胃火傷血。而藥傷元氣也。用加味清胃散而愈。後因怒。唇口腫脹。寒熱作嘔。此屬肝木乘脾土。用小柴胡加山梔。茯苓。桔梗。諸症頓愈。復以加味逍遙散調補元氣而愈。

一婦人生育多胎。月經不調。兩足發熱。至年餘而身亦熱。勞則足腿痠疼。又年餘唇腫裂痛。又半年唇裂出血。形體瘦倦。飲食無味。月水不通。唇下腫如黑棗。此肝脾血虛。火盛。

也彼不信用通經藥而破。

一婦人忿怒而脣腫或用消毒之藥脣腫出血年餘矣此肝木尅脾土而血傷也須養脾胃滋化源爲主彼執用前藥反進蝕狀如翻花瘤而破。

一婦人懷抱久鬱或時胃口嘈辣胸膈不利月水不調晡熱食少體倦脣腫已年餘矣此脾經鬱火傷血用歸脾湯加薑汁炒黃連山梔少佐吳茱萸嘈辣頓去飲食稍進乃去黃連加貝母遠志胸膈通利飲食如常又用加味道遙散歸脾湯間服百餘劑月水調而脣腫愈。

州守劉克新患繭脣時出血水內熱口乾吐痰體瘦腎虛之



症悉具。用濟陰地黃丸。年許而愈。

一儒者因勞役感暑。唇生瘡。或用四物湯加知柏之類而愈。後復作。彼仍用前藥益甚。腹中陰冷。乃用補中益氣湯加茯苓半夏治之而愈。

一男子素善怒。唇腫脹。服清胃等藥。時出血水。形體骨立。用補中益氣湯加半夏茯苓桔梗。月餘唇腫漸消。元氣漸復。又以四物加柴胡炒梔丹皮升麻甘草數劑。乃去梔加參朮而痊。

一男子內熱作渴。咳唾痰涎。大便乾澀。自喜壯實。此脾腎陰虧。陽旺之症。當壯水之主。不信。自服二陳芩連之類。次年

下脣漸腫。小便赤澀。執守前藥。脣出血水。大便黑塊。小便淋瀝。再求治曰。大便結黑。小便淋瀝。肝腎敗也。脣口腫白。脾氣敗也。辭不赴。竟歿。

# 止齒

元亨在大聖中結道友。登嶽頂。至明皇館故址。得斷碑數行。彷彿有古文。洗滌之。得歌一首。曰。豬牙皂角及生薑。犀角升麻蜀地黃。木律旱蓮槐角子。細辛荷葉要相當。青鹽等分同燒煨。研細將來使最良。揩齒固牙髭髮黑。誰知世上有仙方。荷葉下注云。翦荷葉心子也。因錄以歸朝之名。卿

巨公皆依之修用其效響應。

皇朝類苑

朱端章云余被檄任淮西幕府時牙疼大作一刀鑷入以草藥一捻湯泡少時以手蘸湯挹痛處卽定因求其方用之治人多效乃皺面地菘草也俗人訛爲地葱沈存中筆談專辨地菘其子名鶴虱正此物也錢季誠方用鶴虱一枚擢置齒中高監方以鶴虱煎米醋漱口或用防風鶴虱煎水噙漱及研草塞痛處皆有效。

本草綱目

周密志雅堂雜抄治齒痛腫云用黑豆以酒煮汁漱之立愈。

王脩竹云其閣中嘗用驗。

仙人鄭思遠常騎虎故人許隱齒痛求治鄭曰虎鬚及熱插

齒卽愈。拔數莖與之。醫說

澤州李繼之忽病牙痛、皺眉不語。樂景先見之曰：何不樂也。

曰：牙痛。樂曰：曾記載人云：陽明經熱有餘也，宜大下之。乃

付舟車丸七十粒。服畢，遇數知交留飲，強飲熱酒數杯。藥

爲熱酒所發，盡吐之。吐畢而痛止。李大笑曰：戴人神仙也。

不三五日又痛，再服前藥百餘粒。大下數行，乃愈。儒門事規

姚應鳳視一人唇有紅痣，無他病苦，乃謂之曰：此齒蓋三年

必死。其人怒不應。三年齒潰，詣求救。謝曰：君天譴也不能

過期矣。果歿。錢塘縣志

龔子才治一人齒浮作痛，耳面黧色，口乾作渴，日晡則劇。此

脾虛弱也用補中益氣湯加減八味丸而痊。

一男子每足發熱牙卽浮腫此足三陰虛火用加減八味丸而不復作。

李小園患滿口牙齒疼痛潰爛動搖飲食不下乃牙疳也諸醫不效忽遇道人傳一方用川椒炒一錢五分銅青一錢硼砂一錢三味爲末每少許擦患處流涎立瘥。

易思蘭治一人患齒病每有房勞齒卽俱長痛不可忍熱湯涼水俱不得入凡有惱怒痛亦如之十年前尙輕十年後殊甚每發必三五日呻吟極楚竟絕慾服補腎丸清胃飲俱不效一日疾作七日不飲食診其脈上二部俱得本體。

惟二尺洪數有力。此腎經火邪太盛也。以滋腎飲餌之。且嗽且嚥。下二盞。隨覺丹田熱氣升上。自咽而出。復進二盞。其痛頓止。齒卽可叩。永不再作。其方黃柏三錢。青鹽一錢。升麻一錢。水五碗煎湯。頻漱之。嚥下。其人問曰。吾病齒二十一年。試藥不下百餘。皆未效。君用三味而奏功。何也。曰。齒屬腎。諸痛屬火。今診得脈洪數有力。愈按愈堅。蓋沈濡而滑者。腎脈也。洪數有力者。心脈也。腎脈不沈濡而洪數。是所不勝者。侮其所勝。乃妻入乘夫。腎經中已有火邪矣。如遇房勞。則相火一動。邪火上冲。故齒長而痛也。又腎者肝之母。肝者腎之子。肝主怒。怒氣一發。則子益母氣。木來生

火而火愈熾矣。齒豈不長而痛乎。其用清胃飲者。以牙齦屬陽明胃也。此惟胃脈洪數者為宜。今胃脈平和。是胃無恙。用清胃飲何益也。非惟無益。且寒涼傷胃。反飲食不進矣。又腎主骨。齒乃骨餘。腎經火盛。致令齒長。復用補陰丸治之。中有乾薑等熱藥。以火濟火。其痛愈甚。故用黃柏為君。以滋腎水。泄腎火。青鹽為之引。升麻升出腎經火邪。藥一入口。便覺丹田火熱上升。自咽而出。腎藏一清。齒自安矣。何必清胃補腎哉。

俞東扶曰。此案醫理講得最精。由於脈象認得的真。而更運以巧思。斯發無不中矣。清胃散之庸誠不足責。卽泛用

滋陰藥亦難應手。只此三味。銓解甚明。信乎缺一味不可。多一味不必也。余鄉有患齒痛數年。諸藥不效者。葉天士用山萸肉、五味子、女貞子、旱蓮草各三錢、牛膝、青鹽各一錢而全愈。此取酸鹹下降。引腎經之火歸宿腎經。可與易公方並垂不朽。雄按謝再華室患上齦右痛。匝月益劇。四晝夜不能合目。渾身肉顫足冷。面紅舌赤無津。余視之。患處不腫。脈軟無神氣。衝覺冷。乃肝火爲患也。以鹽湯送下滋腎丸三錢。一睡而愈。

呂東莊治許開壅病齒上齦。從耳根痛起。便苦楚不可耐。醫用平胃降火藥。日增劇。診之。關滯而只衰。授方以熟地爲



君杜仲爲臣。女貞、甘草、黃柏、山藥、山黃爲佐。其尊人青臣舉以問醫曰：此方何如？醫曰：大謬。不可服。問其謬狀曰：齒病爲陽明之火，與腎何干，而俱用補腎藥耶？青臣曰：果爾，則吾知此方之妙矣。乃更邀往視。呂曰：病見於上，而治當從下起，此有步驟，不可責速效也。仍用前藥數劑。繼用人參、白朮、茯苓、神甘草、白芍、棗仁、遠志、當歸、黃耆、丹皮。數劑痛已減而未去也。診其兩尺已應。右關以上皆平和，惟左關尚鬱塞。曰：今當爲君立除之。遂用補中益氣湯加龍膽草。卽愈。後小發，復加減前方愈之。因囑之曰：此雖小疾，而其根在下，當謹調攝，毋使頻發也。

孫文垣治昆池內人患牙痛。一晚暈厥三次。次日兩頰紅腫。痛不可支。且洒淅惡寒。寢食以廢。與清胃湯加石膏爲君。白芷爲臣。連翹爲佐。北細辛爲使。服之痛如失。外以明礬爲末。大五倍子一枚。入礬滿之。炭火炙。以礬紅炙爲末。不時擦牙痛處立止。此方多效。

孫夔齋因食雞嚼骨迸碎其齒出血至暈。自後遇雞鳴時輒痛不可忍。餘時則否。凡燕會遇雞湯羹則痛發。卽不染指痛亦然。如是數年。其家禁不畜雞。親舊欲招之者必先戒厨人弗用也。後有人教食黃鼠狼。家人乃設法捕得一頭。烹而進之。孫以其物異。心惡之。強飲湯數啣爾。後遇雞輒

啖如常了無所苦矣。新案

文潞公方治牙齒風熱上攻腫痛獨活地黃各三錢為末每服

三錢水一盞煎和滓溫服。卧時再用。本草

薛立齋治毛宗伯齒痛胃脈無力用補中益氣加生地丹皮治之而愈

楊考功齒動作渴屬脾胃虛弱陰火熾甚用補中益氣加炒黑黃柏四劑。又服加減八味丸諸症頓愈。

王侍御齒搖齲露喜冷飲食此胃經溼熱先用承氣湯以退其火。又用清胃散以調理而齒固。繼用六味丸以補腎而痊。

一男子晡熱內熱牙痛齦潰常取小蟲此足三陰虛火足陽明經溼熱先用桃仁承氣湯二劑又用六味丸而愈

茯苓石膏龍骨各一兩寒水石二兩半白芷半兩石燕子大者一枚小者一雙末之早晚揩牙龋峙王文漢卿得此方於鱗撫折守折守得於國初洛陽帥李成折年逾九十牙齒都不疏豁亦無風蟲王公今九十食肉尙能齒決之信

此方之神也

續夷堅志

薛立齋治一婦人因怒齒痛寒熱作嘔用清胃等藥益甚此肝火傷胃寒藥復傷故也用六君子加白芍柴胡山梔而愈

一婦人發熱齒痛日晡益甚。月水不調。此脾經血虛。用逍遙散加升麻尋愈。後因怒復痛。仍以前藥加川芎而痊。

一婦人胃中嘈辣甚。則熱痛。後患齒動。此胃中痰火也。用二陳加芩連下越鞠丸而瘳。

一婦人因怒牙痛寒熱。此肝火侮脾土。用小柴胡加芎歸苓朮山梔而疼痛止。用加味道遙散而寒熱退。

一婦人每產後齒齲動搖皆痛踰月乃止。此氣血虛動也。後復懷妊臨月。與十全大補湯二劑。合產後煎服。其齒不動如故。

廷尉張中梁齒動搖用安腎丸考功楊仲玉齒動用補中益

氣湯。侍御王濟川齒搖齟露。用承氣湯。文選鄭伯興齒腦痛。用羌活附子湯。顏金憲齒痛。用涼膈散。郭職方過飲。用清胃散。黨吏部風熱。用犀角升麻湯。朱工部血氣虛。用十全大補湯。沈大尹頭腦齒痛頭重。手足厥冷。此風寒入腦。用麻黃附子細辛湯並愈。

一男子齒痛脈數實而便秘。用防風通聖散即愈。

一男子齒痛胃脈數而有力。以清胃散加石膏荆防。二劑而

痊。

一男子齒痛甚胃脈數實。以承氣湯一劑即止。

一男子齒痛脈浮無力。以補中益氣湯加黃連生地石膏治

之不復作。

一老人齒痛、午後即發、至晚尤甚、胃脈數而實、以涼膈散加  
荆防石膏。

王教授云、有老婦人舊患牙疼、人教將兩手大指交叉、以大  
指頭盡處爲穴、灸七壯、永不疼、恐是外關穴也、穴本手少  
陽、去腕後二寸、陷中、泉州一稍子妻、舊亦苦牙疼、人爲灸  
手外踝穴、近前些子、遂永不疼、但不知千金所謂足外踝  
耶、手外踝耶、識者當辨之。  
百乙方

辛帥舊患傷寒、方愈、食青梅已、而牙疼甚、有道人爲之灸、屈  
手大指本節後陷中、灸三壯、初灸覺病、牙痒、再灸覺牙有

聲。三壯疼止。今二十年矣。恐傷豁穴也。銅人云此穴治齒痛。手陽明脈入齒縫中。左疼灸右。右疼灸左。效。左

昔率為樂清主簿者。蛙牙疼不可忍。號呼之聲徹於四鄰。用

藥不效。有丐者獻一方。用之即安。以漢椒為末。及巴豆一

粒。同研成膏。飯為丸。如菉豆大。以綿裹安在蛙牙孔處。立

效。同上

馬敏叔說一村媪苦牙痛。百藥不效。用絲瓜兒。俗呼為磨蘿。

燒灰存性。為細末。擦痛處立止。同上

香白芷。太平州道地。者不拘多少。硃砂一分。白芷。並另研。右為細末。入硃砂拌勻。

煉密如櫻桃大。每用一丸。擦痛立止。廬州郭醫傳云。渠親



曾累取效盡勝他藥。此藥乃濠梁一村婦人以醫治帥母夫人者。倉卒不用硃砂及蜜亦可其功只在香白芷耳。趙從簡府判所用只白芷細辛二味等分。亦每作效。同上

李莫安撫女子退齒踰年不生甚以為撓。因過平江會李亮卿語之。李云子有一方已經試驗用之一月齒遂生。用雌

烏雞雄烏雞糞

以二雞各畜之

舊鞋底

麻底尤佳

右三物等分燒灰存

性。研細入麝香少許同研傅於齒齦。

同上

立齋治黨吏部頰頤腫焮至牙齦右關脈數。此胃經風熱上攻也。以犀角升麻湯治之而消。

郭職方齒腫焮至頰頤素善飲治以清胃散數劑而愈。一男

子患齒痛服清胃散不應服涼膈散而愈盛子用補胃丸治之而愈。

固齒方取老鼠頭骨牙同鹽煨存性研細以擦動牙即堅固不搖。

來天培治一婦人五旬患齒痛連腦兩頰赤腫惡寒發熱脈細而滿此肝脾鬱結爲患治以逍遙散加熟地石膏荆穗杞子一劑而腫痛減再劑而諸症釋然。

### 脫齡

羅太無治一人伸頸而頰車蹉但開不能合以酒飲之令大

醉睡中吹皂角末搐其鼻嚏透即自正矣。

醫學綱目

龔子才治一人因怒氣大叫下頰脫落任掇不上衆莫措手  
令以烏梅槌餅塞於兩頰至牙盡頭控處張口流涎須臾  
隨手掇上。

張三錫治一婦人錯下頰古謂脫金鈞兩手脈弱用八珍湯  
加升柴遂全愈先用手法掇上正骨科當知。

雄按余治一人以大劑熟地柏杞龍眼肉而愈。

1656  
1656